

ПЕТӢ 1926 ВОСЯНЬ

ЛЭДЗӢНЫ: ПЕЧАТЬ ДА ЮӢР СЕТАН КОМИ РЕСПУБЛИКАСА АГЕНТСТВО,
КОМИ РЕСПУБЛИКАСА ГИЖЫСЬ КОТЫР

ВОЙВЫВ КОДЗУВ



ISSN 0134-4323

БЫД ТӢЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

6

ЛОДДЗА-НОМЪЯ (ИЮНЬ)

2015

ТАЙӢ НОМЕРЫН:

БЫДЖЫД ПОВЕДАЛЫ — 70

Василий ЛОДЫГИН. Габовсаяс. Поэма	3
Олег УЛЯШЕВ. Немеч пӧнар. Висът	16
Алексей ВУРДОВ. Нывлӧн луннебӧг. Висът	20
Александр ЛЬЮРОВ. Менам другъяс йылысь повесть	29

Елена САМАРИНА. «Югьд шондӧ моз меным мыччысьлӧн»	55
Валентин ЧУПРОВ. Победа лун некор оз вун	61
Иван НОГИЕВ. Разведчиклӧн туй	64

Михаил ИГНАТОВ. Эжва йывса Игнат орд	70
--	----

ЧЕЛЯДЬЛЫ

Владимир ЛЫТКИН. Ӗтнас. Висът	78
-------------------------------------	----

12+

Обложка вылын снимокыс Алексей Полугрудовлӧн.

© «Войвыв кодзув» («Северная звезда»), 2015 г.

СЫКТЫВКАР

СЕВЕРНАЯ ЗВЕЗДА



*Ежемесячный
литературно-художественный
журнал*



Учредители:

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ
ОТДЕЛЕНИЕ ОБЩЕРОССИЙСКОЙ ОРГАНИЗАЦИИ
«СОЮЗ ПИСАТЕЛЕЙ РОССИИ»**



Издатель:

АУ РК «ИЗДАТЕЛЬСКИЙ ДОМ КОМИ»

ДИРЕКТОР: ПОПОВ В.В.



РЕДАКЦИОННАЯ КОЛЛЕГИЯ:

Главный редактор

ПОЛУГРУДОВ А.В.

Ответственный
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.

ТИМИН В.В.



Василий ЛОДЫГИН



Габовсаяс

ПОЭМА

1

Джуджыд парма шөрыс,
Көні йөзыс шоч,
Эмышт на көн вөрыс,
Шусьö Перым водз.

Тані, Воч ю бокас,
Эм на Габов грезд.
Йөзыс киа-кока,
Тырмö нянь и пес.

Дас квайт керка сөмын
Петкөдлөны бан,
Но став олан рөмөн
Луныс мунö тан.

Му да вөр-ва помысь
Олө китыр йөз.
Уджныс эз на помась,
Эм и вөв, и мөс.

Юыштлөны кодъяс,
Палялөны бөр.
Шойна вылын содö
Кулысьяслөн йөр.

Коркө вөлі школа,
Лавка, шойччанін,
Весиг пельшөр оліс —
Бура ыджыд чин.

Өні нинөм абу,
Бытьтö эз и вөв.

Грездсö пуктысь Габö
Эськö эз ов чöv.

Эськö сійö шуис:
«Нямöдъяс жö тi!
Та вöсна мöй пуим
Танi коркö ми?

Та вöсна мöй вöчим
Уна видз да му?
Та вöсна мöй кöдзим
Уна ид да сю?

Та вöсна мöй кисьтiм
Сы мында ми пöсь,
Быдтор вылö письтiм,
Вöлим бордъяöсь?

Эз öд йöзлөн юрөн
Гортад овны ков.
Оз öд вина-сурөн
Кыпöдлыны лов.

Та вылö мöй менам
Мырсисны нель пи?
Быдөн вöли енма,
Быдөн — борд да би.

Татчöдз öмöй воис
Лодыгинлөн вуж?
Мый со тадзи лоас,
Мövпыштны эг куж.

Прöща Енлысь корöй,
Гашкö да, оз ёр,
Да и лоас гора
Миян Воч ю дор».

Янöдiс жö эськö
Митрей Иван пöль —
Кывнас нэмсö веськыд,
Ловнас абу гöль.

Сійö эськö шуис:
«Сё ерöмакань!
Дыш висьöм мöй суис?
Зэв тай абу шань.

Кыдз нö абу яндзим
Лэдзчысьнысö тадз?
Усьöма дзик гачныд,
Кöдзалöма пач.

Ныр увсьыныд сөмын
Пуктыланндыд видз.
Лунсө коллялөмөн
Ставыс тиян лич.

Керкаяс он лэптöй,
Ставыс тиян важ.
Киясныд век зептын,
Лун-лун тиян гаж.

Велалөмныд стенмө
Сөмын кайны ті.
Та вöсна мөй менам
Усисны вит пи?

Вөлі кык кө, усис
Эськө öти юр.
Петкөдінныд кусьым,
Тиян олөм — дур!

Сьөлөманыд тырыс
Өмөй көдзыд лым?
Тиян вöсна бырас
Өмөй Габовным?

Вай жö кыптöй лолөн,
Вылө лэптöй юр,
Медым гортын олөм
Лоис важ кодь бур».

Шуис эськө-й мукөд
Янөдана кыв,
Код эз весьөн пукав,
Мөдарө эз сьыв.

Шуам, Петыр Гриша —
Дас öтилөн бать,
Габов грездлөн пи жö,
Вежөрнас век садь.

Эз жö вомас ваөн,
Көнкө, Прокө ов.
Паняліс эз ма öд,
Уджөн пыкис лов.

Либö удж жö тöдысь
Тешкодь нима Пуд,
Коді, гашкө, вöтысь
Кыйліс сөмын шуд.

Шуисны и аньяс
Мыйяскө, дерт, сэк.

Эз өд тасьті-паньяс
Төдны сөмын век.

Лэдзисны и вөртө,
Гөрисны и му,
Төдісны и йөртө,
Кодйисны и гу.

Эськө да Вась Марья
Пинялыштис тадз:
«Кутшөм нө ті айяс,
Новланныд көть гач?

Эськө өдөбвылысь
Мышкуаныд ньөр.
Муяс-видзьяс вылысь
Шедө нин пес вөр.

Синъясысь би петмөн
Уджавлім өд ми.
Уджыд бурөн ветлө,
А оз сійө ви.

Мера төдтөг юөм
Вайө сөмын пом.
Спиртыд гуө нуө,
Медым көть и том.

Бырис өмөй вежөр?
Косьмис өмөй ки?
Өдйөджык вай вежөй
Оласногтө ті.

Тан код оліс-выліс,
Летъявны эз куж.
Мед и водзө кылас
Лодыгинлөн вуж».

Лэдзчысисны збыльысь,
Мортыс быттьө геб.
Нинөм абу выльыс,
Лолыс йөзлөн жеб.

Но и йирны найөс
Өтарө оз ков:
Став страналөн кайис
Майөг йылө лов.

Перестройкасянныс
Век на кынөсь ми.
Олам йөзлөн няньөн,
Пачысь кусіс би.

Либералгъяс вемөн
Чинам луньсы-лун.
Кызь өтиөд нэмын
Водзö Русь оз мун.

Дзикöдз медым бырим —
США-лөн тöжд да мог.
Мырдөн тышö пырö,
Вöчö ыджыд лёк.

Рытиввывсянь бара
Кыштö ыджыд грöз.
Гымалöны яра,
Повзьöмаöсь йöз.

Öтувтчыны колö,
А оз тильны син.
Кыпалас мед лолөн
Тшöтш и чужанін.

Медым дасьөн вöлі
Дзик быд ловья йөр.
Пöльыштис кö тöлыс,
Эськö мед эз пөр.

Бөрö туйыс абу,
Водзö мун, эн чег.
Перым водзлөн Габов
Олас медым век.

Му вылын кö лолан,
Му вылын и ков.
Сэні югыд олём,
Кöні ыджыд лов.

2

Медся ыджыд лола
Грездным вöлі сэк,
Кор войнаөн воліс
Вөрөг да эз чег.

Грездöдз, дерт, эз пырав,
Тан эз йöзöс ви,
Но öд сэні шырис,
Кöні вöлі би.

Юньнас жö и босьтис
Некымынöс фронт.
Туйсö сэтчö восьтис,
Кöні дзот да дот.

Öти бөрся мөдöс
Нуис воысь-во.

Бджыд биö лөдiс,
Мед эз вынтөм ло.

Дас öкмысöс нуис
Грездсыным война.
Öткымынлөн гуыс
Öнөдз тöдтөм на.

Батьяс, пьян, вокъяс
Эновтiсны горт,
Вуджисны ас кокөн
Сьöрт, и нюр, и сёрд.

Митрей Иван пьян
Мунiсны вит вок.
Быдөн сотчис биын,
Некод бөр эз лок.

Павел, Степан, Коля,
Нöшта Ёгор, Вась...
Быдөн сэтчö колис,
Ставыс көн пусь-пась.

Ачыс батыөн шусьысь
Эз жö дырсö ов:
Бөръяыс кор усис,
Пыр и петiс лов.

Тышыс вöли уна,
Туйыс вöли кузь.
Быдөн водзö мунiс,
Кодi эз на усь.

Вөрөгöс эз жалит,
Полөмсö эз кыв.
Ордена, медаля
Лоис морöс выв.

Кодкö ас му вылын
Пуктiс дона юр.
Кодкö усис ылын,
Весигтö эз сюр.

Дорисны Победа
Повтөмъяс нель во,
Сэссия некор медым
Войнаыс эз ло.

Новгород и, Псков и,
Киев, Ровно, Львов
Босьтны сэки лоис,
Сетны югыд лов.

Венгрия и Польша
Юисны жö вир.
Вöли ёна горшöн
Свастикаа мир.

Гежöдика воліс
Грездö письмöтор:
Кыдзи нин пö олö
Миян Воч ю дор?

Ми пö тані вöтлам
Немечьясöс бөр.
Волывлö пö вöтö
Öшинювса йөр.

Шондінас и зэрнас
Нимкодясям пыр.
Немечöс пö вермам
Да и локтам пыр.

Со и чайтсьö меным,
Локтöны на век,
Ловьяöсь на сәні,
Енмыс видзис сэк.

Аддза: локтысь уна,
Нюма чужöмбан.
Кутшöмкö да луно
Лоасны нин тан.

Воасны, да вöчам
Вöвлытöм на гаж.
Гөгөр шудсö кöдзам,
Вомным лоас ваш.

Öсип Гриша ворсас —
Гудöкасяс дыр.
Асылöдзыс гортас
Некод сэк оз пыр.

Долыдалан горөн
Тырас весиг вөр.
Визув Воч ю дорыс
Бордъя лоö бөр.

Ыджыд пызан сайын
Сёрни лоö кузь.
Юрö, дерт жö, каяс,
Но оз некод усь.

«Сійöн вöлись воим,—
Шуас Володь Вань,—
Мый ми йöзын лоим —
Ылын сәтысянь.

Гортö локтігмозным
Вöчим уна бур.
Медводз керка-позъяс
Лэптім сүйны юр.

Вöчим посъяс, туйяс,
Быдтім весиг нянь,
Да век гортлань уйим,
Коді медся шань».

«Öні сэсся уджсö
Бергöдам ми тась,
Часлы, сосъяс пуджам,—
Шуас Иван Вась.—

Лэптам керка-карта,
Эбös эз на быр.
Да и сьöла-тартö
Кутам вайны пыр.

Кутам кыйны чери,
Вöчны дадь и додь.
Эм тай пила-черыс,
Асьным йики кодь».

Шуас Прокö Гриша:
«Гöтрасялам и.
Эз на некод вижöd,
Зэв на пösьösь ми.

Сьöлömödз мед воас
Миян шоньд сыв.
Керка тыр мед лоас
Миян пи да ныв.

Овны шаня кутам,
Некод оз ло шег.
Габовын и шуда
Лоам медым век».

Оз жö, дерт, чöv овны
Грездса олысьяс:
Кыпалан кө ловнад,
Сылы абу тас.

«Ми öд, дона пиян,
Эг жö узьöй тан.
Удж жö вöлі миян
Сөнъяс орöдан.

Война чöж и бöрас
Весь эз кольлы лун.
Тшупсим, потшсим, гöрим,
Этша шедіс ун.

Локтінныд, да өні
Майбыр лоо тан»,—
Шуас, эштас кёні,
Өндрей Өльёксан.

«Уджыд мый, а шогыс
Медся виис лов.
Уна вёлі лёкыс,
Этша нянь да сов.

Но да, өдлы, венім
Весьёпёртан кад.
Сталиныс и Енмыс
Мунісны жё тат.

Челядьнымёс видзим —
Сійё медся бур.
Найё-й гажыс-мичыс,
Аски кежлө юр».

Тадзи, кёнкё, шуас
Микол Өгаш ань,
Кодлөн оланруыс
Вёлі грездын шань.

«Донаяс, шань пиян,
Ті эн лэдзёй юр:
Эм жё-й пёсьыс миян,
Ставыс лоо бур.

Тіян сьёлём дорын
Дзоридзалам ми.
Габов лоас гора —
Чужасны ныв-пи.

Сьёлёмө жё пырө
Сьёлөмыдлөн би.
Татысь ми ог бырөй,
Локтінныд кё ті!»

Нывъяс пиысь кодкө
Тадзи шуас збыль.
Габов грездө локтас
Олөмыс дзык выль.

3

Кызьөд нэмас олём
Збыльысь лоліс бур.
Райыс көть эз волы,
Власьтыс сэк эз дур.

Но өд бөръяпомыс
Бырис сьёлөн вем.

Весиг пӧлӧс вома
Кызь ӧтиӧд нэм.

Абу ӧтнас коньӧр
Миян Воч ю бок.
Косьмис вердысь нённьным,
Гӧгӧр лоис лӧк.

Кызд странаным киссис —
Ыджыд СССР,—
Сідз и век на висям,
Чусмис рӧм и сер.

Век на гуысь петам,
Кытчӧ суйис йӧй.
Тадзи вӧльнӧй светас
Овны позьӧ мӧй?

Бызгӧмӧн да кодӧн
Бурыс ӧд оз чуж.
Вежӧр кутіс содны,
Юрным абу куш.

Вердісны кӧ водзті
Уна нефть да газ,
Ӧні, кӧть и содз тыр,
Унатор нин ас.

Надзӧникӧн чужӧ,
Бырліс миян мый.
Быдторсӧ на кужам,
Нянь дорӧ эм вый.

Видзӧдам да, содӧ
Армиялӧн вын.
Кинас воас коді,
Бурӧн, дерт, оз мын.

Да и киӧн воны
Зырым налӧн люв.
Русьысь ёнджык лоны
Вӧсни ставлӧн сюв.

Тайӧс мортыс аддзӧ,
Сылӧн бурмӧ лов.
Енэжланьыс качӧ,
А оз шыр моз ов.

Ёнмыштісны лолӧн
Весиг грездсаяс.
Налы, вӧлӧм, колӧ
Гортын енма пас.

Кыптіс вежа керка,
Кодлөн йылыс ёсь,
Кодлөн зарни веркӧс,
Няйтчӧдны оз позь.

Вермысь Ёгор нимӧн
Сійӧ кыптіс тан.
Сьӧлӧмгъясӧ инмӧ,
Шонтӧ син и бан.

Дзик став фронтӧвиклӧн
Пытшкас югыд ним.
Медбур йӧзыс сиктлӧн
Да оз кутчысь сӧм.

Батъяс, вокъяс, пиян
Ӧтчукӧрынӧсь.
Сисьлӧн небыд биыс
Тані буретш пӧсь.

Коді усис, кӧні,
Гижалӧма сән.
Дорйӧны и ӧні,
Мед эз лёкыс вен.

Вежа керка вылӧ
Коліс уна сьӧм.
Вӧлӧм, олӧм-вылӧм
Абу сьӧлӧмтӧм.

Отсалысьӧн петіс
Бура уна йӧз.
Кодкӧ сюрсӧс сетіс,
Кодкӧ унджыкӧс.

Чукӧртисны челядь,
Томгъяс, пӧрысьяс.
Енмыс шӧпкис пельӧ:
«Тайӧ — тӧян час!»

Ачым тайӧ гыас
Бергалі ме пыр,
Медым олан шыыс
Габовлӧн эз быр.

Габовӧй кӧ кулас,
Сідзкӧ-й, ме ог ло:
Сьӧлӧм пытшкӧ тулыс
Сэсся ӧд оз во.

Кывбургъяс оз лоны,
Сыланкыв оз чуж.

Йӱзӱдзис оз воны,
Ставсӱ кынтас пуж.

Зӱв на-й шаня артмис,
Ставыс лоис бур.
Омӱльыслы гартны
Габовным эз сюр.

Эскан кӱ тай бурас,
Мичаммӱ и лун,
Олан вороп сюрӱ,
Йӱзӱ шуд оз мун.

Важсӱ кӱ тай видзан,
Подувтӱг он ов.
Олӱм пуксӱ мича,
Мыйыс кыпыд лов.

Мам кӱ вӱлі ловъя,
Ловъя ыджыд мам,
Эськӱ мича ловъяс
Ошкисны бур сям.

Йӱзсянь аттӱ кыла,
Уна шонид кыв.
Таыс сӱлӱм сӱлӱ,
Таыс ӱнмӱ сыв.

Аслыныс став бурсӱ
Кыпалӱмсыныс.
Зумыд кӱ ӱд сюрса,
Кутчысӱ и кыс.

Сӱлӱманыс олис
Медтӱ югыд шор.
Медтӱ сӱлан коліс,
А эз курыдтор.

Дышӱдчӱмыс тӱдчӱ
Кодсюрӱслӱн.
Муяс вывсянь вӱтчӱ
Градъяс вылӱдз йӱн.

Вытьныс лоис дзоля —
Абу воддза йӱз.
Зӱв нин этша коліс
Грездын вӱв да мӱс.

Индавнысӱ, гашкӱ,
Тадзи мен оз ков,
Но ӱд овны гажтӱм,
Оз кӱ ӱзйы лов.

Сылы зэв өд колө,
Бордъясим мед ми,
Медым кустөг оліс
Сьөлөманым би.

Кодлөн юрыс пөлөс,
Мед эз йөзсө ну.
Медым шуда вөлі
Ставнас Коми му.

Мед эз бөрд, а сьыліс
Ставнас ыджыд Русь.
Збоя оліс-выліс,
Печикысь эз усь.

Нямөдөн кө олан,
Некытчө он во.
Зэв нин рака лолан,
Сөкөлөн он ло.

А өд лэбны колө,
Мед эз некод кый,
Медым омөль лолөн
Некоді эз лый.

Тадзи-й лача кутан,
Эскан бурас век.
Таысь, көнкө-й, шуда,
Чегоны — он чег.

Татшөм мед и лоас
Гижөдөйлөн пом.
Сёөдз көть ме воа,
Сьөлөм лоө том.





Олег УЛЯШЕВ

Немеч пöнар

ВИСЬТ

А сё будътiна! Карасинтöг пöнарыс ломтысьö. Да öд пятилинейкаысь на югыда! Геждика тай öзтывлöны-а. Батьныс зэв стрöга шуис, «комöля тор» пö кутшöмкö пуксьыны вермас, абу чача тайö. Локтöм бöрас сöмын недыр кeжлö öзтывлis гортсаяс да гöсьгыяс водзын ошйысигмоз.

А гöсьт валитis бaть локтан лунö керка тыр. Кодi дзескыд жыръяд абу тöрöма, паччöра-пöлатя костö нянясьöма: челядьгавез да пöрысюлов. «Илля Епим локтöма! Илля Епим воöма!»— öдйö и разалис сикт пасьта. Воисны водзынджык волöм салдaтьяс, суседъяс, рöд-свöй. Поводнöй уна вöли дöва да мужикъяссö «без изъвесьти» воштöм баба. Көть нин йöз шуд вылас видзöдлыны, аслад шудыд кö оль вывтi мунöма.

Агниялөн шудыс вöлöма: мöд война вылысь мужикыс чель и здрав воис. Му вежандырнад мобилизация улö сюрис да, еджыдъяс дорын удитis служитны. Сэсся и Будённыйдлөн коннöяд пышйöма-вуджöма, еджыдъяслы воча керасьöма матö куим во. Кызь нельöд воын локтis гортас, будёновкасö тувйö öшöдис, шынель бöждорсö шабур выяöдз тшöтшкöртis, винтовкасö лöскö дзебис, крестянскойö уджö босьтчис. Сэсся и Епим Агнияöс гöтырөн гортас пыртis. Агния сылысь чой-воксö некымын во видзліс дай казначитліс на дорын. Зэв ёна Карп Илля чукöрлы лов вылас воöма. Ай-мамыс нывалысь зильсö вылö донъялисны, чой-воксö Агния сибыднас босьтöма, а аслыс Епимлы мыйөн сьölöм вылас воис, и сідз гöгөрвоана: татшöм нылыд оз на тöзь турун моз быд куст улын быдмы. Сöмын быттö гозья олöмас вужьясьыштisны, бaть дорысь торйöдчисны, помечөн керка лэптisны, гаж вылö керка тыр челядьпиянös лöсьöдисны. Да то тай, бара на ковмис ветлыны Епимлы юрөн мачасянінад, гырда шоръяс визуванінад. Гитлертö мый вермис зырис. Йöзысь водзö эз пыр, йöзысь бөрö эз кольчы. Воюйтis, быттö крестянскойö уджсö нырис.

Гортас вит ныв-пи виччысисны. Кузь каднад куимён быдмыны удитисны верстьоодз: Елисалы — дас өкмыс, Анналы дас сизим, Виталейлы дас вит. Мамныс лун и вой удж вылын да, Миша-Олексея горт олісны. Первойсө сьокыд вөліс: асывводзнас Мишук куим арөса Олексейос пачө сюяс, ачыс пессө мыччалө — сідз пачнысө и ломтасны. Рыт-асыв мөс дорө куимысьодз петавліс сөодчыны-лысьтысьны. Нетшкас-нетшкас мөс няктө, кыис орны кутас да, гортас пыравлас. Вокыс жалитө: «Мисө, сойччыст да выльысь петав». Шуштөмкодъ овліс рытсөрсө, кор сартаса би дорын виччысисны мамныслысь гортас локтөмсө. Бывлаын дзурс пемыд. Бушков шутьялә ли, пашляк стенсө поткөдлө. Сартас тшынасьө да тачкакылө. Быд тачнитөм шыө бергөдчывлісны челядь өдзөслань: оз-ө мамныс лок?

То тай өні сэсся шудыд нюммунис жө: батыд, вердысь-дорйысьыд, гортын, дай сартас пыддиыд дивө кодъ немеч лампа на вайөма. Майбыр өні олөмыд пуксяс!

Гырысь чой-вок пөрөдчөны бокын, ылі вөръясын. Эз эштыны батытө паныдавны. Мишлы да Олексейлы мойвиис медводдзаясөн батысө аддзыны. Мамыс самөй гидын вөлі сөөдчө. Вокъяс пачводзын пукалөны, би вылө видзөдөны. Зумкйөдліс кодкө чорыд воськолөн посводзын. Дзуркнитіс да крапкысис өдзөс. Пырис садат. Укшаль. Тшөтъясьөм. Сьокыд нопъя. Бругкис нопсө коник лабичө. Син дорсө чышкис. Сэсся кузя видзөдіс челядь вылө. Куим во эз аддзыв. Паметяс, көнкө, колисны век на дзоляснас. Батысө Миш, дыр видзөдөмөн, төдіс эськө, а Олексейлы и дикө-вина кодъ лоис шынеля мортыд, куим арөснад эз на өна война вылө мунысь батытө вежөрас сюркнявлы. Сөмын Илля Епимлөн «чолөм жө нин, эзысь пиянөй» ыккөстөм ли лолыштөм бөрын детинаяс видзчысьөмөн сибөдчисны да ляскысисны батыслөн котшөс дука, сарөгөсь шынель нойө.

Рытнас детинаяс, пач струба бердө жмитчөмөн, видзөдісны нин гырысьяслөн ызгөм-гажөдчөм вылө. А другөн чинөм-дзескалөм жырыын код төдас мый вөчсис! Бабаяс бөрдісны и сералисны өтпырйө. Мужикъяс клөнгисны стөканъясөн, помся шпуткисны, юасисны важ төдсаяс йылысь. «Педөсей Коляыс нө көн?»— «Сійө көнкө Дальной Востокин на».— «Вась Ёгор йывсьыс мый кывсьө?»— «Танкас бөръя сотчывлөм бөрын госпитальын пө бурдөдчө»...

Сійө? — Уси...

Тайө? — Усьлөма Волховын на...

А эсійө? — Сьөкыда ранитчөма Венгрияын. Кулөма...

Да-а... Унаөс войнаыд пурөма. Степана-Василеяос, батыныслысь вокъяссө, сөйис жө Гитлерыд. Мунісны өти луно куим вок. Бабаяс да челядь гавез кольбөдісны найөс сикт помөдзыс, Мой чойөдз. Водзө рекрутъяс мунісны председатель вөлөн Помөсділань. Миш син водзын — Вась дядьыслөн шешъялысь чужөмыс. Доддяс пуксытөдз гудөксө няжөбтөмөн сиптіс, Наталья чойыслы мыччис: «На, Наталья, локтөдз некодлы эн сет». Сэсся бурлакалан картузсө балябөжланьыс лэптыштіс да мигнитіс кольччысьяслы: «Ничево, бабаяс! Ми Гитлертө ошкөс моз потшкалөмөн ваям». Степан сералө вокыскөд, өтикөс-мөдөс пөддевайтыштө жө. Сэк война көрсө видлөм нин Епим зумыша өлөдіс вокъяссө: «Эн гальскы, Василей. Нюжалас тайө тышыд. Оз

другөн эшты. Да и тэ, Степан вокö, öвсьышт: ог öд вьльгортса бурлакъяскöд тышкасьны муной. Лы крежманинö, вир кисьтанинö нуöны».

Со тай вот, мöд во нин сэсся пöльыслөн сунлабич улын бу-сöссьöны Василейлөн да Степанлөн гудöкъясыс. А бур жö гудö-касьысьяс вöлисны!

Няжöбтис Епимын сиктас ловйөн кольöм нель гудöк. Куимнас гудöкалöны кромкасьыс-тальянкасьыс фронт вылад ёна нин гаж-тöмтчöм мужикъяс. Нельöднас ворсö Педöр Наста. Мужиксö война вывсьыд виччысигмоз сылөн «бус пушканнас» Наста по-воднöя няжöдчынытö велалöма. Уна мича гөлöсөн, важөн нин кывлытöм мыла горъясөн шыасис Епим керка. Сэк кöзиян пер-войысь и öзтис тропейной немеч пöнарсö. Ен пельöссянь кöтша-сöдз швачкысис некор на тöдлытöм, лун сьöмöс шондi кодь югыд би. Тайö би водзас чусмисны и кывтса пешаын котшöс сартас, и ен джадж улын тоньвидзысь кöнтусь выя лампада, и пызан пельöсö йöршитчöм дзузган-пятилинейка. «О! Иллюминат-сыяыс!»— кыпыда рочалис-горöдчис кодкö салдатъясысь.

Шензисны бабаяс тайö би вылад. Шензисны. Весиг сьылöмсö орöдлисны. Гудöкъяс öтпырйö няжвартöмөн чöv усьлисны. Сё чудеса! Вот, колöкö, и пöнар! Не на бара карасина лампаясыд!

Рытывбыд сэсся немеч бинад олисны. Сьылисны-гудöкалисны. Сур юисны-йöктисны. Сералисны-бөрдисны. Сэсся гöсьгыяслөн горт-ланьыс мöдöдчалгас омöльдзык синмаясöс кöзияныд весиг пос помöдзыс кольöдiс немеч пöнарнад, честьөн-почестьөн. Карп Иля, Епимлөн батыс, пос помсяныс бергöдчывлис пиыслань да синсö бисьыс кинас лэбъялöмөн зэв кыпыда шуис: «Тайö тэ, пиö, зэв буртор вайöмьд, Сöвет власьтыд миянлысь кык де-сятилинейка босьтлис да, сыысь тайö ёна югыд. Колö вöли ба-тыды тшöтш вайны». «Ноко, бать, эн сэтшöм гора власьт йывсьыд. Нуасны лы ни ку...» «Ладнö,— шеныштчис батыс,— меным кöкъямысдас тыртiгад нинöмысь нин повны. А сöвет власьтыд, колöкö, видзöдлас тайö пöнар вылад да, непöштö быд керкаö, весиг туйпöлөнса потшöс-майöгыяс йылö кутас öшлыны. Сöмын оз германскöйöс, а гөрдöс, сöветскöйöс. Мед том йöзлы войяснас вöлөсьтасьны позис Вöльдiн няйтсыс повтöг, гöптысь гöптö бурсьявтöг».

Сиктын югыд битö нюжöдiсны дас во мысти. Карп Иля су-ис на сийö тшассьötö. А вот немеч пöнарнад Епим семья кра-суйтчис зэв регыд. Ачыс Епим некымынысь пестывлис ыджыд праздникясö. Агния гöтырыс мужиксыс гусьөн пöлысь-мöдысь сёодчыны гидö босьтлис. Сэсся вöляникысь и дзузганысь пемыд-джык лоис немеч пöнарыд, дай коркö-некоркö дзикöдз кусiс. «Комöля торйыс» пö пуксьöма, кага кабыр ыджада ток видзан тшалакыс. А дерт, сэтшöм тшалакад уна-ö ток тöрас? Вежны пö позис да, вот запаснад Епим босьтнытö абу гөгөрвоöма ли, абу сюрлöма ли. Сiдз ен джаджыын и сулалис сэсся, Микöлаа-Богородичаа костын.

Зато лампочкаястö вайлöма вель уна: пелькиник ящик тыр, гашкö и, сё миллөн штук, лэптöма лöскö. Сэтысь и аддзисны детинаяс немеч чачаястö. А мый нö? Ачыс пöнарыс кö оз уджав, сiдзкö лампочкаясыд — ковтöм лöп. Ныма ворсантор. Эз эськö другөн гөгөрвоны, мый наён вöчны, но Öлексей öтикöс уськöдiс

да виччысьтöгыс тальыштис. Коса шпатькысис лампочкаыд, прамо винтовка шыөн. «О! Час, став гитлерсö лыйлам!»— нимкодъ лоис вокъяслы.

Батьныс эз вöв гортас. Кытчöкö ылі Украинаö мунöма. Корöма-öсь, мам кывнас кө, юдаясöс судитанинö свидетельён. Челядьлы и вöля: чиршöддыны некодлы. Первойя некымын лампочкасö пöвторйөн вартöмөн поткöдисны. Сэссия гөгөрвоисны кык пöв костö тэчны да чеччавны вылас. Пуктасны öтикöс. Миш горöдас: «По пашиской гадине — огонь!» Киноясад тай сідз горзöны-а. Öлексей гыр вывсянь лапкыштас пöв вылас: «Шпать!» Сэссия пуктасны некымынöс, бара Миш командуйтас, Öлексей чеччыштас. Лампочкаяс автомат öчередөн: «Та-та-та-та!»

«Сё миллён лампочкаыд» помасис жö коркö, эськö ёна на ворсисны да... Сэссия батьныс локтис Украинасыд да, вöлисти повзисны детинаяс. Зэв öд суров батьныс. Пöвсалас уплотнöя, тöддас кө. Тыртöм ящиксö детинаяс шыльö-мыльöөн саймовтисны, вылас важ гыр пöрöдисны. Первойсö ёна полисны, мый казялас лампочка жуглöмтö. Но, тыдалö, пуксьöм пöнарыд ковтöм лоис да, лампочка ящикыд батылөн вунис. Дай колхоз уджнас тырис Илля Епим, омöлик здорöвье вылö эз видзöд. Чери кыйис, мый вермис. Верман — он вермы, а уджавны колö: бабаяслы да челядьлы öтльöг сетыштны. Коньöръяс тай война чöж ас весът и мужик весът пасьвартисны-уджалисны, колхозсö и странасö зэлалом гөрбьяснас кыскисны.

Сэссия и война дойясыд Епимöс суисны. Нёрпавны кутис. Сьöломнас висьöдчыштавны. Дзэбисны Илля Епимöс выль шойна вылö нин, Чудин чуркйö. Бөрдöдисны-оллялисны, пукалисны-коллисны.

Нелямынöд луннас Агния челядьыскöд асья пызан сайö пуксис. Сöмын шыд чöвтис да вайис, ен джаджсьыд кузь лабичö чеччышглöмөн усис немеч пöнарыд, сьвкнитлис югыд биён да кусис. «Аттö! Дай аттö! Тайö тай нö асьным пуксим, а батытö вошйöдтöм лоис! А прöстит жö нин, Епимушко, эн скöрав». Агния тэрыба уськöдчис мужикыслы тшайтор кисьтны. А Миш тувкнитис Öлексейöс бокас да шöпнитис: «Токыс тай нö важөн нин бырлис-а, мыйла тайö пöнарыс öзйис?» Тшолкйöддыштис öтарö-мöдарö выключатель кнопканас. Перйивлис пöнарсьыс пузьöм, лözөн бакшасьöм аккумуляторсö. Бара тшолкöдыштис. Но немеч пöнар эз нин ловзбы. Бөръя ловсö сетöма.



Нывлөн луннебөг

ВИСЬТ

Пемдiс... Гөгөр пемдiс... Енэжыс, вөр-ваыс, ставыс пемдiс син водзын. «Со и кольөдiм медбөръяос, сэсса пөль-пөч, крукляяс да көсөйяс, нывбабаяс да челядь колины»,— сьөкыда лольштiс Петыр Ольош дед, чабыр ыджда калянсө кимөдзас топөдмөн.

Керөс дорсянь идралөм муяс костөд веськыда керкаяслань сьорсьөн-бөрсьөн, звөйкйөн шлопкисны грездса олысьяс — некымын пөль, шливкйысь-бөрдысь нывбабаяс да челядь.

Во да куим төлысь нин кыссис Ыджыд тыш, и помыс ни дорыс сылы эз на тыдав. Быдөн полөмпырысь виччысисны поштальонөс и мукөд кад моз эз тэрмасыны юасыны письмө воөм йылысь. Од өнi бур юөр пыдди тшөкыджыка волiс усьөм йылысь кабала. Куим лун сайын на Степ Анөйлысь нөшта өти шог сьөлөмсө поткөдiс — Онь пиыс пөгибнитiс, а таөдз верөсыс, Емен Сем, усис Ленинградскөй фронт вылын. А ставыс Слөбөдаягысь кызь кыкөн нин юрсө пуктiсны асму вөсна. И кымынөн на водзын...

Асывнас колхоз контора дорын, кыдзи и пыр, чукөртчисны колхозса уджалысьяс да дас гөгөр том ныв-зон. Кильчө вылө петiс председатель Вань Сандыр, кинас чышкыштiс вазьөм нырсө да несйис:

— Тыпу, оз тай волы, нинөмыс оз ло! Но, войтырө, кывзыштө разрядка! Первой бригада: куимөн — вартны, мукөдыс — кыскавны сю телегаяссө рыношө; мөд бригада: керөсысь да Митрей му вылысь — картофель да мөссөркни; коймөд бригада: кыскаланныд сю да вартанныд, талун Гортатыладорсө колө эштөдны. А көнi вөла-доддаяс?

— Локсьөны, локсьөны!— öлыштiс кинас Митрей Вась.— Кык додь төрыт жугалөма да найөс колө вөли дзоньтавны, сыысь челядьыс сөрмөдчисны.

— Но, вай тэрмыштсьөй,— такөдiс Вань Сандыр.— Талун уполномоченнөй көсйис волыны, а джын плансө на эг вөчө. Асы, юрөс босьтасны менсьым, сө лешакө!

— Александр Иванович, а мый-а майшасян? Тэ мян кык юра, өтикыс со пельпом вылад, а мөдыс ыджыд портретын контораын красуйтчө Ленинкөд өти радын!— шмонитiс Микөл Як, кык кольөм вижөдөм пиньсө жергөдөмөн.

Гитшкөмөн серөктiсны мукөдъяс.

— Но-но-но! Тэ, Яков Николаевич, кузь кывтө тшимөд*! Гортад шуткуйт!— ырзис председатель.— Менам портретыс — награда пыдди, а тэ төлө-вөлөасян! Общем, всё, давайте ставөн удж вылө!

* Тшимөдны (диал.) — топөдны.

Обед бõрын бригадир Вась Парась скõтнõй дворысь корсис председательõс да виччысьтõг пыр и юõртис:

— Александр Иванович, верман чõвтны менõ бригадирысь. Опõнь Марõйлõн Петыр пиыс кияссõ сотис уль яйõдз. Тшõкти сылы рынышаын пач видзõдны. Но и лõдсалигас биа õгыр чеччыштõма да õзйõма идзасыс. Бур, рынышаыс на эз сотчы.

— А õни кõни детинаыс, гашкõ, пельшõр дорõ нуõдны Слобõдаõ колõ али мый?— юасис повзõмпырысь председатель.

— Ми кияссõ пыр жõ выйõн мавтим да тõблалим,— висьтасис бригадир.— õни гортас. Аскиõдз, гашкõ, виччыштам. Ирõй тьõt да Марõй сидзжõ шуисны, вермасны кõ пõ, асьныс бурдõдасны. Мый татчõ шуан, челядь — челядь и выйим. Да и лишнõй кияс абуõсь, асы, Прõв дед висьõ, Савõй Вань кык тõлысь нин куйлõ кокъяснас, мукõд пõрысьыс эськõ ноксьõны, мый вермõны. Ог тõд, кызди и тõвйыны пондам. Сõ маета!

— Да, вõсьõ, некодлы абу кокни,— жугыля воча шыасис Вань Сандыр.— Талун уполномоченнõйсянь бара разнарядка воис вõвъяс вылõ... У-у! Ачым ог тõд, кызди да мый колõ вõчны.

Неылын конюшня дорын вуджõртис конюклõн мыгõрыс, буретш дзоньталис йõр падõсьяс*. Председатель казялис сийõс да горõдис:

— Фёдор Григорьевич! Виччышт менõ!

— Но ме мõдi,— õлыштис кинас нывбаба.

— Ой-йõ, энлы бара, тайкõ эг вунõд,— шуис мõдыс.— Пырав контораõ, босьт газет да õтлаын бригадааныд лыддьõ. Бõрти эн вунõд бõр вайны.

Здук мисти нин председатель ньõжмыда, гусьõнмоз сёрнитис конюккõд.

— Нолы, Фёдор Григорьевич, он помнит, юнь тõлысьõ, кор ветеринарыс вõвъяссõ видзõдис, кымынõс лыддис «фондõвõйõн»?

— Нельõс,— спõкõя вочавидзис мõдыс.

— Во-о-т! А õни воис кабала, кõни гижõма дасõс!— Вань Сандыр перйис сийõс питшõгсьыс да мыччис мужичõйлы.— На, лыддьы!

— Мый мен сыысь,— видзõдлис Гриша Педь да бõр сетис кабаласõ.— Лыддьы кõtь эн, а асьныд тõданнуд: дас õкмыс уджалан вõв да дас кык чань, кодлы кык арõсыс на абу. На пиысь витõныслы и воыс абу. Шуны кõ веськыда, дзоньвидзаяс, доймõм да пõрысьмõмсõ кõ ог лыддьõ, дас гõгõр и лоас.

— Да-а, а миян кодi кольõ?— юрсõ лэдзõмõн председатель пыкис потшõс дорõ.— Кутшõм йõз, сэтшõм и вõвъяс кольõны, вермытõмõсь. Общем, Фёдор Григорьевич, пасйы «фондõвõй» вõвъяссõ «КП» шыпасъясõн, а мõдлун нуõдан пемõсьяссõ Косланõ, сэтсысянь сэсся мукõдъяскõд õтувъя табунсõ колõ нуõдны Айкатылаõдз. Со татшõм тэныд тшõктõм миян колхозсянь. Кута надея тэ вылõ. Аски пыралан контораõ, босьтан дõвереннõсьт да неуна нур. Да бõрйы аслыд бурджык вõв бõрсõ локны. Общем, вот татшõм делõясыс. Победа вõсна нинõм оз позь жалитны. Ас пыддиыд кодõс кольлан?

— Кõсьта Сергейõс,— шуис конюк.— Кõtь и зэв том на,

* Падõс (диал.) — сюръя.

а сяма, быд лун меным отсасьö, абу дыш, вöвъяссö зэв нин ра-дейтö. Тöлка детина!

— Но, бур! Сідзкö, аскиöдз!— председатель киасис Гриш Педькöд да петіс конюшняысь.

А конюклы дум вылас уси öти вöвлöмтор, кор Гражданскöй война дырйи Будённйлөн дивизияын воюйтігөн лыйлöм улö веськалöмысь петкöдіс комын кык вöв, мыйысь сійöс бөртиджык строй водзын аттьöалис полкөн командуйтысь. А öні мöд серпас: пыді тылсъянь кызд позяс унджык отсöг фронтлы сетны. Дерт, гөгөрвоана, быд колхоз, кызди и «Красный пахарь», индöм серти пуктіс ассыыс пай видз-му овмöс вöчасөн да мукöд вöчöмторъясөн. Кыз шуасны, чужан муным öти и сöмын миянлы сійöс видзны да дорйыны.

Кынмисны нин тыяс, юяс. Муыввса лымъя шебрас надзöни-көн содіс и содіс. Заводитчис заптылöм турун кыскалан пöра. Блыссаинъясысь вынаджык вöвъясөн зорöдъяссö ваялісны, а матігөгöрысь — мыйөн нин слöймас.

Öтчыд контораö öдзöссö крапнитöмөн пырис Павыл Öпрöсь да кортöг и повтöг шыöдчис председатель дорö:

— Тэ нö, Александр Иванович, дыр-ö бöбйöдлыны миянös пондан? Куим лун сайын на кöсйысин вöвсö сетны, а сетін пес карысьяслы. А ми, бабаяс да челядь, додьясö волысасьöмөн кыскалам муяс вылö куйöд! Сөнъяс орласöны, кияснымös му-дзöмла кышöдны ог вермö! Яндзим колö тöдны!

Вань Сандыр чеччис пызан сайсьыс да гөрddзассьöм гөлöсөн нюжöдіс:

— А, любöйö-вöсьöйö, лок пуксы ме местаö да веськöдлы колхозөн, ме аस्याнь юрös эг суй председателствуйтны! Вöвъяс абуöсь! Асы, стрöйтчан кер катавны ю дорсянь нинöмөн. Конюшняын колисны сöмын том чаньяс, Гриш Педьлы ме шуа, а сійö мед решайтö. Дерт, чаньяссö водз на уджöдны да и велöдны на колö. Сэсся кöть тышкö менö, нинöмөн отсавны ог вермы, а куйöд серти быд куим лун мысти колö сводкаын петкöдлыны, уна-ö вöчöма. Сідзкö, быть кыскавны, а дугöдам кö, мыжаласны удж торкöмын, сэсся тюрмаö пуксьöдасны. Коньöръясö, этшаджыкөн и кыскасьö, доймавны оз позь некодлы. Общем, всё!

Нывбаба клапкис кинас морöсас да юрнас дөвкнитöмөн чöv петіс контораысь.

Крепыд кöдзыдъяс кутчысисны кык вежон чöж. Йизьöм гыöра лым улö пырзьöм грезд лун и вой руалис-тшынöдіс веськыда енэжас. Войдөр на ас кадö вöлі вöчöма шпаклюйтан уджъяссö скöt картаын, конюшняын, порсь видзан гидйын, да пемöсьяс эз кынмавны. Колхозса правлениеö пырысьяс асьныс быд вой дежуритісны график серти. Быдөн бура гөгөрвоис: кынмöм вöсна скöt усьöм-висьмöм пыр и шуасны преступлениеөн. Майшасьöмыс вöлі и госуларстволы уна пöлös поставка сетöм кузя. Шуам, лэбач гөн да вурун эз лоны таво тырмымөн, но вывсянь лэдзисны вештыны найös содтöд куөн да картофельөн. Та кындзи на вит кыйсьысьлөн вöлі прöмыс сдایتöм йылысь сёрнитчöм, мыйөн пуктісны колана да тöдчана пай. А кымынысь найö мездылісны тшыгъялöмысь ас войтырсö чериөн да пötка яйөн. Быть öд

кызкө ловйөн колыны да челядьос быдтыны. Съокыд артавны: мыйта ковмис бөръя кадө вуджөдны ас вывти да мый на водзын лоас? Сөмын надеяөн да эскөмөн и кутчысисны отув.

Дзуртисны додь вожъяс. Куржөм нырбука рыжөй көбыла корсийөдлөмөн съокыда кыскис ва тыра бөчка скөт карталань. Додь бөжын крепитөм бөчкалань пыксьөмөн кучик вөжжиөн сувтса веськөдліс вөня паркаа, паськыд шоныд юр чышъяна нывбаба. Бөрсянныс лайкөдіс гаров бөжа еджыд пон, велалөмпырысь сийө веқджык кутчысис көзьяйкаыскөд орччөн. Карта йөрын, биа көрт пач дорын, ноксис Прөв Öпрөсь. Нөш модаа кузьмөс паньөн сийө гудраліс бакын сукмөдөм йики ва. Месанитысь водзвыв дасьтис скөтлы сөйөд да пыр тэрмасис водзджык эштөдны уджсө, медем недыр жежлө ветлыны гортас видзөддыны челядьсө да куйлысь пөрысь мамсө.

Юрсө доровтөмөн Öпрөсь шыөдчис ва кыскалысь дорө:

— Марөйө! Вай жө волы татчө, баксө колө пыртны, вөлисти бөчкатө ректан!

Нывьөртгъяс вугъясө кутчысьөмөн, зэвтчөмөн пыртисны ветымын литраа көрт баксө картаө.

— У-уф!— съокыда лольштис Марөй.— Талун өдва-өдва юк-мөссө пьськөді. Эськө и бура вөлі тупкөма вевтөн и лымнас тыртөма вывсянныс. Войсө зэв көдзыд вөлөма, ветымын градус гөгөр, сідз тай Мить Лень дед висьталіс.

— А нөшта кө көйтгас, пакөсьт вермас лоны, скөтным кынамалас,— содтис Öпрөсь.— Асы, Звездочканым вөрасө кынтис да пыкөсыс оз на и чин, көть быд лун Анөй чөйө мавтө. А Ромашкалысь талун асыв войтөв бөр кокъяссө кыскаліс да өдва коньөрөс кок йылө сувтөдім, первой лядвейяссө песім да песім кыкөн. Ой-йө-йө! Мый водзө виччыны? Но, вай жө, Марөйө, ме гортө лэччыла, а тэ Дарөй тьөтлы отсасьышты тані вольөс вежны. Ме ог дыр!— нывбаба гөрддыштис чышъян помъяссө, кепысясис да калошиа ной сапөгъяснас тэрыба кырсьис петанінлань.

Рытнас картаө, лысьтысьысьяс дорө, локтис Петыр Öльөш дед сөй кашникөн.

— Бур рыт, бабаяс!— видзаасис пөрысь морт да пуксис скамья вылө.

Перевединаяс вылын гирлянда моз өшалісны биалөм карасин лампаяс. Коридорса стен бердын радөн сулалісны йөв тыра флягаяс, сэні жө пельөсланьыс, джадж вылын кымөмөн, тыртөмъяс. Кылісны өтка бакөстөмъяс, төнгөм, пыльскакылөм, тшөктана чукөстөмъяс... Вочасөн недыр жежлө прөстмөм нывбабаяс чукөртчисны дед гөгөр.

— Öльөш дед, но висьтась, кутшөм выльторъяс кывлін?— нюмдыштис Педь Öльга да павкнитис дед пельпом вылө юр чышъянсө.

— Хм! А, вөсьөйясө, кыкторйөн верма төдмөдны, но некодлы эн висьтасьө,— варгөса видзөдліс өтар-мөдарө Петыр Öльөш да кызөктис.— Кыдз шуасны, Педуль баб кык недель чөж абу ывлаасьлөма да менам Марөйлы висьтасьөма, мый моньыс быттьө тшыкөдөма сийөс. Дерт, тайө пустөйтор! А вот слөбөдсаяс стөча кывлөмаөсь, мый германскөй Гитлерыс висьмөма водянкаөн да дыр оз ов. И тайө збыль!

— Оз тай биён сотчы, дявöлыд!— бөрэдзис Миш Катъой да кимöдзнас ныр-вомсö тупкөмөн кежыштис бокö.

Лыстыгысысыяс ведраясөн чөв разöдчисны ас мөсыяс дорö, а Педь Ольга босытис дед кийсы кашниксö да мерайтан көшөн кийтис сэтчö öти литра да джын мөс вöра йöв. Пöрысь морт тöждысьöмөн топöдис кашниксö морöсланьыс да юрсö копыртöмөн синваасис. Курыд войтыяс чукуръяс кузяяс тёпкисны доз-мукас.

А öд юнь тöлысьын на видзисны ассыныс мөс, сёйисны ас рысь да йöв... Öни Серукыс колхозын, и йөвсö невöляөн лöб босытны сэтгыс трудодень вылö вежöмөн. Кымын во Петыр Öльöш пастукалис, но татшöмтор, кор гожся кадö син водзад ош джагöдис мөскöс, эз вöв. Пастукöс шуисны мыжаөн, и мöдлы быть лой сетны ассыс пемöссö колхозö. А мый вöчан?

Гашкö, войтырлөн выныс да терпенньöйс весиг му бергöдны тырмис, но медсьöкыдыс вöли вермыны тшыглун. Торйөн нин дзескыда олисны уна челядя нывбабаяс. Кодыскö дөваясөн колисны, а кодыскö вермытöмөн висьöмъяс вöсна. Öтка семьясысь дзюлюкъясöс кыка-куимаөн весиг нуöдлисны быдтыны челядь керкаö.

Сы кадö ранитчөм вöсна гортас воис медводдза демобилизованной — Сöпрөн Вась, кодöс кужан сям сертиыс пыр жö пуктисны дорчысьöн, Йöгөр Кöсьта дедлы отсасьны. Отсöгыс лой зэв коланаөн и ас кадö, öд көртөн вöчаян уджыд пыр вöли тырмымөн.

Колхоз кыз вермис кутчысис, көть и сьöкыда лолалис, но зилис. Быдөн эскис, надейтчис...

Кызди и войдөр, челядь велöдчисны нель класса школаын, а рыгыя кадö контора керкаын уджалисны библиотека да клуб. Грездаяс весиг вöзйисны колхозса правлениелы выль воын пыртны планö клуб керка стрöйтöм да дзюлюкъяслысь яслисад вуджöдны мöд, шоныдджык керкаö. Та кындзи чукöртисны козинъяс Айму дорйысыяслы: кодi ас кыём чулки-кепысь, кодi ас кийөн вöчөм аканьяс, кодi косытöм сёян-юан да мукöдтор.

А школаын велöдысь Миш Анöй быд урок водзын юасис:

— Талун кодi долымöдас? Со, Павлов Вася, мый удитiн, кутшöм буртор тöрыт вöчны?.. А Вурдова Лида?..

И челядь радпырысь висьталисны, кодлы отсалисны мыйöнкö, кымын кывбур либö висыт лыддисны да сiдз водзö. Кодыскö рамлун кузя яндысисны да вомнысö тшим кутисны.

Но öтчыд Павлов Стёп чеччис парта сайсыс да кутiс висьтасьны:

— Тöрыт батьсянь воис письмö и ме гораа лыдди, медым ставлы кылис. Сийö гижö, мый эськö сьöкыд, но вөрөгöс оз позь лэдзны Ленинградö, зэв нин пö окота көть чепыштыны сьöлаяй тор да нямыльтны көть öти сола сир тор...— детинка синваасис да нöшта шуис:— А ме кыя и сьöла, и сир, да батьлы мöдöда, мед сийö Гитлрсö вермис пасьвартны!

Велöдысь да кодсюрö челядь пиысь эз вермыны кутчысьны да асьныс синваасисны. Но олöмыс век жö мунис водзлань.

Бвласянь кылис дзуркнитöм шы, сэсся посводзын кышакылöм да вöлисти öдзöсö тотшкöдчөм. Гриш дед куйлис паччөр вылын,

а Парась тьёт месанитіс пачводзын. Пытшкөсса узьлан жырыын ас костаныс ворсөдчисны куим челядь.

— Пырöй, пырöй, коді локтіс!— гораа шыөдчис көзяйка.

Восьса өдзөс сайысь петкөдчис гөрэдзалөм тупляс кодь юр чышъяна да бонзьөм ыж ку пася нывка:

— Тайö ме, Микаль Наста.

— Лок татчө, лок, детяө,— Парась тьёт индіс пуксыны лабич вылө.— Кынмин али мый-а?

— Эг кынмы,— вочавидзис нывка.— Мамө тшөктіс юавны, гашкө, лишалө неуна кутшөмкө нур да сов рөч.

— Ой-йө-йө! Любөйө, нылө! Кытысь нө сійө лишалө?— жалитөмпырысь шуис нывбаба.— Ладнө, пукалышты,— а ачыс петіс гөбөчө.

Вывсянь кашкигтыр мыччисис Гриш дедрөн дзормөм уска-тошка юрыс:

— Гөстяыс коді лоан?

— Ме Микаль Наста, дедө,— смела висьтасис нывка.— А Ті висьминныд?

— Эг эськө да. Лыясөс пөжа пым пач вылын да гыркөс шонта,— лольштіс дед да нюмдыштіс.— Пөрысьлуныд, детяө, оз томмөд.

— Ой, тиян оз позь тадзи! Пөжсянныд, дыр кө куйлыны поңданныд, и вирныд пузяс,— ышловзис нывка.— Миян Öдөй бабным пөжсис колян во да куліс пач вылын. А неважөн мамө-лысь кокъяссө тайкө войтөв эз ну. Войбыд кыскаліс да кыскаліс, но мамө эз сетчы.

— Висьтав мамыдлы, мед өшиньяссө, көні костөсь, ротьясөн сюялас, сэки войтөвлы некыті пырны лоө,— дед чышкыштіс пөсялөм чужөмсө дөрөм соснас.— А батьсянныд юөр воліс?

— Медбөрыс коркө гожөмын тай воліс да мамө войбыд бөрдіс,— жугыля вочавидзис Наста.— И кодлы тайө лёк войнаыс колө?

Сы кості Парась тьёт удитіс лөсьөдны тубрас да мыччис нывкалы:

— Крепыда кут, мед оз разьсы, мамыдлы сетан. Ротсө аски бөр вай.

Наста аттьөаліс да котөртіс гортас.

Колис куим лун Медөс празникөдз, но грездын, дерт, эз төдчы некутшөм лов кыпөдан гаж. Да и кытысь вермис лоны, кор юр выв тыр чөжсис шог да майшасьөм.

Колхозса кладовщик Пепыл Микаль лунтыр ноксис складаын. Сэні жө сылы отсасис Анөй нима том ныв, пасьяліс веситалөм-пукталөм сөян-юан колхозникъяслөн лыддьөг серти. Микаль дядь индіс нывлы:

— Тэ, детяө, стөча гиж, өшыбкатөг, да видзөд бура, эн дзут-сыы! Уджыс зэв кывкутана, абу сідз-тадз. Асы, кымын общөй трудодень, кымын уджалысь морт семьяын, кымын челядь... Тэ грамөтаа морт...

Бөрти пыраліс тшөтөвөд Митрей Як да накладнөй серти сдайтіс кладовщиклы дөра тюк:

— Со, Михаил Феофилович, материал, а со и кабала, мый кузя колө өтнога мерайтны быдөнлы. Чайта аскомысьбөдз юклыны.

Дерт, быдөнлы дөра вундасыс оз тырмы, но мукөдөс правление наградитас почёт грамотаөн ыджыд пай пуктөмысь.

Декабр 30 луно став грездыс чукөртчис конюшняю. Пуктисны турунвиж нойон вевттьом пызан, сайоджык ошөдисны Сталин-лысь портрет да «Победа за нами!» лозунг. Ставон меститчисны турун вольөс вылө, а пöрысьяс — скамляяс вылө. Уполномоченной, правлениео пырысь партийной ячейкаөн веськөдлысь да колхозса председатель пуксисны пызан сайо йозлы воча. Медвөдзөн сувтис сёрнитны Вань Сандыр:

— Дона войтыр! Со и помассис 1942 во, а талун на миян и Медөс лун. Став страна тышкасьо фашистской оккупантъяс-көд, и ми, слөбөдаягсяс, тышкасям Гитлеркөд, кызди вермам, вын сетам да ас мырсьөмөн отсасям фронтлы.

Ветымын көкъямысөн миян грездысь, а на пиын на кык нывбаба, героическөя воюйтöны вөрөгкөд, дорйöны Айму. Да, воём усян кабалаяс серти кызь квайтөн пуктисны юрнысö война вылын, но вермис лоны, гашкө, öшыбка да кодкө ловъя колис. Чус збыль, вермас и тадзи лоны, да, да! Сидзкө, колө кутны надея, общем, виччысьны колө. Некодлы оз позь лэдзчысьны, зэв уна на сьökыд удж водзын! Миян колхоз тавося государственной план тыртис урчитөм кадө, мыйөн ме и правление ставнытö чолөмам! Пасибө, копыртча асяньö!

Көть и кывзысьяс костын ыджыд радлун эз төдчы, но здук мында клопөдисны. Сэсся грездсяяс пөвстысь сувтис Вась Марой да кисö кыпөдөмөн шыөдчис:

— Да, гөг вөрзөдтөдз мырсим да тшыгылим и öни тшыгылам, да сьökыдуныс юр вывти лоис, но öд общöй плансö вöчим вөвъяс отсөгөн и гөра-көдза дырйи, и страдна дырйи, и урожай идралигөн, и пес да вөр каригөн, а водзö нө кызди? А тулыссö нө кызд кутам муяссö гөрны? Клячаяс да чаньяс кызди уджалан вөв абу? Вот висьталө öни йөзыслы и меным, кызд бригадирлы!

— Энлы, энлы, Мария Васильевна! Тэ... общем... правильнöя сёрнитан. Но колө и гөгөрвоны... общем... и политика серти ситуациясö. Та йылысь висьталас уполномоченной Евгений Васильевич,— джөмдалөмөн вочавидзис председатель да индис киөн орччөн пукалысь вылө.

— А, войтырö, шуа веськыда! Öти-кө, ми пыдди нинөм некодi оз вöч, сидзкө та кузя дугөдам сёрни; мөд-кө, да, зэв сьökыд тылын уджалысьяслы, а гашкө, кодкө мөдтор вөзъяс, кызди мөд нога позьö? Сөветской народной комиссариатлөн да партия ЦК-лөн öти корөм — «Всё для фронта, всё для Победы!» А тулысын, медым көдзны сю да мукөд культура, колхозлөн кйдыс пöшти тырмымөн, мый содтөд ковмас, район отсалас, а вөвъяс пыдди, ковмас кө, и ме тиянкөд орччөн воысася да гөрны пондам...— збодера сёрнитис уполномоченной да графинысь дзулькнитис гранъя стөканö ва.

Сэжкості кыліс Öпөнъ Любалөн гөлөсыс:

— Евгений Васильевич, а ме эськө дась тиянкөд орччөн воысасыны да гөрны көть став мусö. Ме баба, абу верөс сайын, жöник абу жö, и Тi дөвеч. А мый-а лөкыс, мерин да көбыла!

Ставон ызöбтисны-серөктисны. Шйөвошөм уполномоченной стөкансö бөр пуктис пызан вылө да нюмдыштис:

— Да ме эськө сөглас, көбылаыс кө абу зэв чужъясьысь!
Бара кыптис серам.

...Собрание мунис дыркодь на. Помланьыс нин ыдждөдлісны бур уджысь, быдөнөс аттьоалісны пай пунктөмысь да мынтисны удждон сьомөн да сөян-юанөн. Бөрти гажтөм төвся Слөбөда-ягын дыр на олан керкаясын чусыда сотчисны карасина лампаяс, но войдөр моз некөнi эз нин кыв гудөкасьом шы.

Победаөдз тайö Медөс лунсянныс колис зэв на кузь кык во, нель төлысь да көкъямыс лун.

А нөшта на, некодi эз куж думыштны, мый Пепыл Микаль-лөн Анöй воча нылыс гусьөн нуөдөма луннебөг, көнi пасъялөма, көть и мисьтөм шыпасъясөн, кодi кутшөм воö мунлөма война былө, кодi воöма ловъяөн, кодi усьөма... Көть и уна во сэсса куйлөма тетрадьыс дзедасайнын, но кодкө аддзөма.

Бонзьөм, косясьлөм луннебөгысь позис на ясыда гөгөрвоны татшөм гижөдъяс:

«Павыл Йөгөр Вурговлөн пиян:

Өнь — усис 1943 воын,

Мить — усис 1943 воын,

Микөл — усис 1942 воын.

Павыл Пегөр Вурговлөн пиян:

Өнь — усис 1941 воын,

Вань — воис 1943 воын (ранитчөм),

Мить — воис 1944 воын (ранитчөм),

Микаль — воис 1945 воын.

Сем Өнь Вурговлөн пиян:

Микөл — усис 1944 воын,

Öльöш — воис 1945 воын (ранитчөм),

Йөгөр — воис 1946 воын.

Мить Пегөр Вурговлөн пиян:

Өнь — усис 1942 воын,

Степ — усис 1941 воын,

Прөв — усис 1944 воын.

Öбөсь Сөпрөн Доронинлөн пиян:

Вась — воис 1942 воын (ранитчөм),

Өнь — воис 1945 воын,

Вань — воис 1945 воын,

Öльöш — воис 1944 воын (ранитчөм).

Павыл Вань Вурговлөн пиян:

Өнь — воис 1945 воын,

Сандыр — воис 1944 воын (ранитчөм).

Павыл Гриш Вурговлөн пиян:

Вань — усис 1942 воын,

Миш — воис 1944 воын (ранитчөм),

Вась — усис 1941 воын.

Емен Сем Павлов — усис 1941 воын, сылөн пиян:

Өнь — усис 1942 воын,

Сандыр — усис 1944 воын.

Пегөт Вась Обрезковлөн пиян:

Микаль — воис 1946 воын,

Йөгөр — воис 1943 воын (ранитчөм),

Сандыр — воис 1945 воын.

Сем Вань Павловлөн пиян:

Өнь — усис 1941 воын,
 Микаль — усис 1942 воын.
 Педөр Ион Павловлөн ныв:
 Елен — воис 1945 воын.
 Өльöш Педөр Павловлөн пиян:
 Сандыр — воис 1944 воын (ранитчөм),
 Өпөнъ — воис 1945 воын (ранитчөм),
 Вань — воис 1943 воын (ранитчөм).
 Прөк Йөгөр Павловлөн пиян:
 Вань — усис 1941 воын,
 Өльöш — воис 1945 воын,
 Петыр — воис 1944 воын (ранитчөм).
 Сем Сандыр Павловлөн пи:
 Гриш — воис 1946 воын.

Чашнитсьём бумага листьяс эз сетны тöдмавны, мый гижöма водзö. Но грездаяс помнитöны быдөнöс, кодi шедöдiс Победа.

Öнi Слöбöдаяг шöрын сулалö Ыджыд тышын вермысь пöльпöчлы да ай-мамлы выльмöдöм памятник. Найö век кезлö колисны мян паметьын. Колисны, эз вошны! Квайтымын кык морт усис, а ветымын кыкөн воисны бөр гортаныс. Талун Слöбöдаягын ньöти войнаса ветеран эз коль...

Копыртчам! Помнитам!



Менам другъяс йылысь повесть*

Бой

(Зарубинлөн мөд висьт)

Збыльысь мичаён кажитчө морт, кор сьёлөмсö сылысь чукийөн тыртö нимкодълун. Видзöдан сэтшöм морт вылас да лоö весиг кокныдджык, долыдджык лолыдды. Татшöмөн аддим первойысь батальонса комиссар, старшöй политрук Левадаöс. Сийö сулалис миян водзын тыртöм ящик вылын. Сук сьöд юрси пратьясыс лэччисны джуджыд да паськыд кымöс вомöныс, ковмылис веш-тывны найöс, мед эз мешайтны видзöднысö.

Вöли шензьöдана, мый политруклөн кельыд, весиг висысьлөн кодь лöзоват чужöмыс, век овлысь стрöг синъясыс вермöны сэтшöм ёна кыскыны ас дiнас. Ми, курсантъяс, видзöдiм асъя шондiөн югдöдöм комиссар вылö, и сийö миянлы тайö здукас кажитчис матыссаён, асланым училищесаён.

— Ёртъяс! Боецъяс, командиръяс да политработникъяс! Воис кад и миянлы. Сийöс ми виччысим нин война заводитчöмсянь...

Комиссарлөн гөлöсыс ещö на чорзис, гораммис сэтшöма, мый ме повзи, мед эськö эз ор зэвтчöмысла.

— Да, ёртъяс, воис сийö луныс: талун ми первойысь мунам водзö. Вельмöм враглы поводнöя нин сюрис тiян ёртъяссиянь — орчча полксянь. Ме эска, мый и тi косöданныд бур водзöс Ленинлөн кар вöсна! Помнитöй: ми не сöмын зiлям ордны блокада, но и отсалам налы, кодъяс дорйöны Сталинград, кöни решайтсьö миян Рöдиналөн судьбаыс. Мед жö тiян том да вынйöра киныд оз дрöгнит, а кучкас вөрöглы веськыда сьёлөмас! Ёртъяс, сöмын водзö, эн жалитöй фашистъясöс, кодъяс мövпалöны ленинградса уличаяс вылын гуляйтöм йылысь!

Комиссарлөн нывбабалөн кодь вöсныдык чуньяса кийс поткöдiс-вундiс воздухсö, сэсся чабыртiс паськыд кучик тасмасö, а синъясыс сюся видзöдiсны гөгөр сулалысь йöз вылö.

Здук мысти комиссар местаын сулалис нин боец. Миян серти олöмаджык, ар комына морт. Тыдалö, сийö вöли эз воём курсантъяс, а дивизияса красноармеецъяс лыдысь. Та йылысь висьталiсны и морöс вылас вир вöйтөн ворсöдчысь гвардейскöй значокыс, и турунвиж обмоткиясыс. Боецлөн мышкыра да крепыд туша вылас пелька пукалис обмундирование, коссö топыда зэвтöма брезент тасмаён, кытчö öшöдöма граната новлöдлан сумкаяс. Гөлöсыс эз вöv комиссарлөн кодь мыла, петiс быттö кыськö пыдысь, морöс пытшсьыс.

— Ме Ленинградысь. Сэни вöли семья: гöтыр, пи...

* *Заводитчöмыс воддза номерын.*

Красноармеец тшөкмуні, увлань копыртіс юрсө. Лоис кызкө нелөсьд, сьөкыд сы вөсна, мый ленинградса джөмдіс. Быдөнлөн видзөдласыс лэччис сапөг ныр вылас, а ме кылі, кызди гөрдөдоны пельясөй, быттьө ящик вылас вөлі эз төдтөм красноармеец, а ме ачым.

Но сійө ньөжйөник кыпөдіс юрсө:

— Төвнас пиөс чашнитіс снаряда, а гөтырөй куліс тшыггысла.

И мыйлакө тайө звукас лоис кокни сьөлөм вылын. Гашкө, сыысь, мый миян чужан местаясөдз ылын, мый вөрөглөн кийс сэтчөдз оз судз. И сэк жө сьөлөм чепөльтмөн жаль лоис ящик вылын сулалысь красноармеецыс, кодлысь семьясө бырөдіс война. Кусас война, локтас гортас, а сәні некод... Со мыйла воисны пельөдз ленинградсалөн бөръя кывъясыс.

— Ме нимкодяся сөмын сэк, кор аддза, кызди ловъя фашист пөрө шөйө.

Ленинградсалөн дженъдык сөрнийс кыпөдіс думъяс. Но век жө сьөлөмын скөрлуныс эз вөв. Тайө төдчис и мекөд орччөн сулалысь өртъяслөн чужөмъяс серти.

Летучөй митинг муніс водзө. Ящик вылө кыпөдчывлісны то өти, то мөд. Но найөс эз нин сюся кывзыны. Первойсө кыммөм чужөма радъяс костті кокныдык төвру моз котөртіс негора сөрни. Бокө тувкнитіс Сметанин:

— Чөртыс төдас... Ковмас регыд тышкасыны накөд, а менам мыйлакө некутшөм лөг оз пет. И кинояс аддзылі, и речьяс кывзылі, и газетъяс лыддылі, а...

— Таысь, Сергей, ми абу мыжаөсь,— ышловзис Вагин.— Видзөдтө, миянөс велөдлісны лоны мортөн, а не морт выысьөн. И кызкө оз эскыссы, мый немец вермас вөчны став сійөторсө, мый висьталөны сы йылысь. Өд и сійө — морт жө, коть зськө и враг миян... Интереснө ас синмөн аддзывны сійөс, чабыртлыны, видлыны, кутшөмджык...

— И видлам!— кывкөрталіс Сметанин.— Чайтан, кутам юрөдыс малавны... Код лешакыс корис сійөс миян му вылө! А лөглуныд миян чужас на.

Воис комбат — ыджыд тушаа капитан. Ми сылысь эг на төдөй овсө: веськалім тайө батальонас некымын лун сайын. Картузыс — защитной рөма нойысь, морөс вылас Красной Знамя орден. Шуөны, нажөвитөма финской кампания дырйи на. Мичаа бритчөма, чав еджыд подворотничока, югъялысь гөленя сапөггьяса. Лөсьөдчөма, быттьө праздник кежлө. Комиссаркөд орччөн сійө восьлаліс строй водзті. Друг сувтіс өти курсант весьтө, индіс петлицаяс вылас:

— Мыйла гөрдөсь? Генерал али мый? Гашкө, окота видлыны снайперской пулялысь көрсө?

Но курсант эз шөйөвош:

— Ми ас му вылынөсь. Мед немец дзебсясьө.

Комбат нюмъөвтіс, сюся видзөдліс збодер зон вылө:

— Правильнө! Но петлицаястө век жө ковмас вежны. Олөмнад пудьясыны нинөмла. Старшина, пырысьтөм-пыр сет полевөй петлицаяс!

Комбат, тыдалө, вөлі дөвөлен миянкөд паныдасълөм бөрын, гарыштіс старшөй политрук Левадалы:

— Бур боецъясос мөдөдөмаось, комиссар! Татшөм зонъяс-сьыд чөртъяс повзяс! Кыдз думайтад, ёргъяс?— шыөдчис комбат батальон дінө.— Сетам ныр-вомас фашистлы?

— Сетам!— гораа вочавидзисны курсантъяс.

Летучой митинг помасис, и ми вөрзим.

* * *

Писькөдчим сук вөр пыр, восьлалім пөрөм да нитшсялөм пуяс вомөн, кокъясөн изім трачкакылысь кос пу вожъяс. А гө-гөр пуис тыш. Көнкө веськыдвылын немецкөй снарядыяс чаш-йисны-нетшкисны мусө, сьөлөмтө көдзөдысь шыөн лэбисны минаяс. И сөмын кадысь кадө взрывъяс костас пельөдз өдва воліс пулемётъяслөн сяркөдчөм шыыс.

Сынөдын ошалысь немецкөй самолётъяслөн шумыс быттьөкө личкис миянөс. Видзөдлывлім пуяс костті лөзалысь небесаө, корсим гөрд звездаяса машинаяс, но найө эз тыдавны. А «юнкерсъяс» повтөг вөчисны ассыныс уджсө, дугдывтөг бомбитісны квадрат бөрся квадрат. Майбыр, налы некод оз мешайт, весиг поводдяыс. Со мыйла сөдз арся небесаыс кажитчис мустөмөн...

Вөрті мунім сьөрсьөн-бөрсьөн, восьсаинъясті вуджим котөрөн-сорөн. И со бара вель ыджыд кушин. Төдчис, мый тані неважөн на нөйтчөма-ветлөма ставсө бырөдысь көрт гы. Кыдз пуясөн кышөм ляпкыдик траншеяын, брустверьяс вылын туплясисны чусыда лөсталысь немецкөй каскаяс, куысь вурөм ранецъяс, кыз лөжаяса төдтөм винтовкаяс, виж рөмөн ворсөдчисны сімны на удиттөм патронъяс да тыртөм гильзаяс, сэні и тані тыдалісны уна пөлөс сера плащ-палаткаяс, байкөвөй да ной эшкынъяс... Таті төрыт писькөдчис водзө первойя эшелонъяс орчча полк. Став сертиыс төдчис — абу кокни вөлөма миян зонъяслы, но сюрөма пай вылас и фашистъяслы.

— Со эсылы весиг лентасө помавны абу сетөмаось,— шуис Сметанин.

Збылысь, восьса площадка вылын сулаліс пулемёт, а сы бердын, пулемётлысь воропъяссө мынтөдтөг, куйліс немец. Быттьөкө ловъя, вот-вот востас би. Сөмын востыссьөма нин: каска увсьыс тыдаліс петөм юр вемыс.

Фашистъяслөн шойяс пөвстын жө, неуна вижөдыштөм гимнастёркаяса, куйлісны и миян зонъяс. Сьөлөм чепөльтмөн шог вөлі адзыны найөс!

Лун шөр гөгөр батальон петіс вөрысь баддён тырөм видз вылө. Тшөктісны кодйыны окопъяс. Ок, и мустөм удж! Мустөм сы вөсна, мый кодйысян, гашкө, весьшөрө. Сөмын перьян чехолсьыд зыртө, пиньтө мурч курччөмөн орьөдлан эжа, кызди бара нин тшөктөны мунны водзө. Сөмын и жаяддза видзөдлан весьшөрө вөчөм удж вылад.

— Чөрту!— ёрччыштіс Вагин.— Ме бурджык шойччышта.

— Шойччы,— серөктіс Сметанин.— Сөмын кор топөдасны бөжтө, эн сюй сійөс менам ячейкаө.

— Тэ кодйысь, а эн большы. Пырөдчы тайө мустөм трундаас муош моз. А ме сэк коста вөр-ванас нимкодьясьышта... Частө мөвпавлывла, мыйла сардмисны киясөй. Мыйла эськө, Сергей? Мусө гудйөмысь. Кымын кубометр перйим училищын велөд-

чигөн! Воим татчө — бара жө муын лукйысям. Артыштны кө став армияяссө, фронтъяссө? Позис нин, гашкө, писькөдны не өти Москва—Волга канал! Но тэсө, Сергей, өні он весьшөрө тильсы: мыйөн вувзыясны «юнкерсяс», ми дзебсям отлаө.

Курсантъяс пиысь унаөн эз кодйысьны. Найө куйлісны не-ыджыд чукөръясөн, варовитісны, йирисны жмык плитаяс кодъ гырысь рудзөг сукаръяс, сёйисны сола порсь гос, а медем кос вөлөгачыс эз тасась горшас, юисны кодзыд ва. Оти кылөн кө, нуръяисны: өд кухняяс колисны бөрө. Эз весьшөрө вошты кадсө и Вагин. Черлыясыс сьлөн веськыда ратшкакылісны.

— Куим лун кежлө сетөм «НЗ»-ыд, тыдалө, помасьө нин,— пөсьсө чышкаліг, чуткис Вагинлы Сергей.

— Зато тэнад вөрзөддытөм на,— серөктіс Вагин.— Он жө өд удзөд асьыд другтө. Лөсьыд воуйтны тадзтө: нимкодьясь природаөн да гиджгы сукар, не сөмын асьыд, но и другыдысь.

Сергейкөд орччөн кодйыси ме. Но дыр мырсыны эз ковмы. Эжа пласт перйөм бөрын сөмын зыр судта и удиті кодйыны, кыдзи ячейкаө кутіс сөдзтысьны ва. Гөгөрбоксянь кылысь видчөм да ёрччөм серти гөгөрвои, мый и мукөдлөн делөясыс абу бур-джыкөсь.

Вагин быттьөкө ваө видзөдөма: мыйөн нюждөчи окопбокса эжа вылө, кыліс команда:

— Водзө!

Вагин чөвтліс миян вылө тешитчан видзөдлассө, тэрмасьтөг көрталіс вешөвөй мешөксө, воысаліс, но сэк жө эз вунөд суйны вомас ещө өти сукар:

— Ковмас кө трофейниклы видлыны мышкысь мешөксө, мед нин сійө лоө тыртөм.

— Эн сөр,— вомаліс другсө Сергей.— «НЗ»-тө колө видзны.

— Полан старшинаысь? Тані өд джоджтө мыськөдны сійө оз вермы...

И со сьлөмтө топөдысь мустөм команда:

— Воздух!

Ми бөр уськөдчим муө. Шонді петөмсянь немецъяс бомбитісны орчча квадратъяс. Оні, тыдалө, воис и миян черед. Дас кымын «юнкерс» кежисны трассасьыс, кыті лэбавлісны өнөдз, да мөдөдчисны миянлань. Йөз топөдчисны ляпкыдик ячейкаясө, сэтысь чурвидзисны-тыдалісны сөмын вешөвөй мешөкъяс либө вывлань чатөртөм каскаяс. Быдөнлөн ветліс юрас мөвп: гашкө, оз казьявны, гашкө, лэбзясны водзө, гашкө, ускөттөбыс кытшовтас. Но оз тай сідзи век овлы, кыдзи тэныд колө. Со нин медводдза «юнкерс» включитіс сирена да варыш моз уськөдчис мулань, веськыда орчча рота вылө. Ме арталі, кымынөд «юнкерс» шыбитас асьыс «гөснечсө» миян юр вылө. Артмис, витөдыс либө квайтөдыс.

Шуөны, мый позьө велавны и бомбитөм дінө. Одвакө. Велавны, гашкө, и позьө, но лоны спокойнойөн он вермы. А медеясө сы вөсна, мый тэ немтор он вермы вөчны, медем водзсасьны небесаын шывъялысь смертькөд. Со и өні ми куйлім да видзөдім, кыдзи некодысь повтөг шыблалөны «юнкерсяс» бомбаяссө миян ляпкыдик окопъяс вылө, кытчө весиг бурджыка дзебсьыны он вермы. Мустөм лоис лөз небеса, а сэсся заводитіс петны сы вылө лөг. Окота вөлі лөкысь горөдны:

— Мыйла тэ лэдзан юкйӧдлыны асьтӧ рытыввылысь воӧм кырнышгъяслы?

А збыльвылас, мый вермис вӧчны небеса, кор весиг ми — специально велӧдчӧм йӧз — вынтӧмӧсь.

И абу шензяна, мый юрӧ воисны татшӧм мӧвпгъяс. Ӧд ми вӧлі велалӧмаӧсь аддзыны сӧмын сэтшӧм небеса, кӧні павъялӧны-лэбалӧны бобувгъяс, дзизгӧны мудз тӧдлытӧм малязіяс, жбыргъялӧны лэбачгъяс...

Матӧ усъӧм бомбаысь пель чунавліс, пӧсь сынӧдлӧн гыис швачкис-кучкис чужӧмӧ, сэсса сьавкмуніс вылысӧ сьӧд няйт. Кор нӧ тайӧ помасяс? Со «юнкерсгъяс» заводитісны пикируйтны мӧд пӧв... И сэки сингъяс улӧ усис Вагин. Сійӧ пукаліс куст бокын да лыйліс патрон бӧрся патрон. Гимнастёркаыс, каскаыс, орччӧн куйлысь шынель скаткаыс, весиг куст вожгъясыс — ставыс резсьӧма трунда сора кизьӧр сьӧд няйтӧн.

Первойя шӧйӧвошӧм прӧйдитіс, му кутіс щӧтясьны винтовка да ручнӧй пулемӧт стволгъясӧн. Мӧд пӧргъя миян вылӧ вувзгысьысь кырнышгъяслы воча качисны трассирующӧй пуляяслӧн визгъяс. И кор кияс чабыртісны винтовка да кутісны вӧчны тӧдса делӧ, лоис пыр жӧ кокныдджык. Но немецкӧй самолётгъяслы пулягъяс эз мӧрччыны, а колӧкӧ, тэрмасигад ми лыйлім кызд веськалӧ, медем сӧмын ышӧдны асьнымӧс. Кор найӧ лэччылісны му бердӧдзгъяс, асланыс пулемӧтгъясӧн сяркӧдчиг, ми аддзылім немецкӧй пилотгъяслысь мустӧм ныр-вомгъяссӧ. Матынӧсь, да он босът. Сӧмын на вишкан, лӧсьӧдчан лыйны, а самолётгъяс мышкад нин, муӧдзгъяс волас сӧмын сыӧн поткӧдӧм сынӧдлӧн гыис.

— Воис сьӧлӧм вылад концертыс? — матыстчис ме дінӧ Вагин, кор медбӧргъя «юнкерс» бомбаяссӧ шыбитӧм бӧрын веськӧдчис рытывыввлань. — Вытгӧс сӧмын торкисны: сукар джынйӧс кытчӧкӧ уськӧді...

Кыпӧдчис аслас окопысь Сметанин. Кельыд чужӧм вылас мыйкӧ нюм модаа, бытгӧкӧ пинь висигӧн векыштчӧма. Сергей индіс юрсяныс да кок улӧдзгъяс няйтӧссьӧм Вагин вылӧ:

— Вӧлӧгдаса тшап морттӧ позьӧ ылісянь тӧдны... Зато кияс эз гаддгӧссы.

— Эн жерйӧдлы, Сергей, пиньтӧ, — вочавидзис Вагин. — Не кӧ тайӧ нюрыс, ӧдвакӧ тэнӧ гуранторйыд мездіс. Ме ӧд видзӧді: бомбаыс вӧйӧ трундаас да сэн нин потӧ, кӧрт торпыриг пыдди няйтсӧ резӧ.

Збыльысь, бомбитӧмыс ыджыд лӧксӧ эз вай, не кӧ артавны пулясӧн дойдӧм некымын мортӧс. Окопгъяс пӧлӧн тэрыба восьлаліс взводнӧй — младшӧй лейтенант Колесников — да видчис:

— Мыйла лыйлад трассирующӧй пулясӧн? ӧд на серти сійӧ вермас казьявны, кӧні ми куйлам...

— Дзегъяссьӧмысь ворсны али мый? — скӧрмис кодкӧ курсантгъяс пиысь. — Сідзкӧ, эз ков тшӧктыны лыйлынысӧ, ме нырисны миянӧс.

Колесников стрӧга видзӧдіс курсант вылӧ, лӧсьӧдыштгис асьыс быгалӧм пилоткасӧ, коді тешкодья пукаліс быгалӧм жӧ юрси вылас, кыпӧдіс чуньсӧ зон ныр водзӧ:

— Салдатлы весь овны оз позь. Салдат лыйлӧ — сідзкӧ, сі-

йö салдат. А эновтчис делöбьсь — пыр жö ачыс пöрö мишеньö. Гөгөрвоин? Эз öмöй висътавлыны та йылысь училищеад?

«А öд Колесниковлөн кывъясыс— збыльысь зарни»,— мөвпалі ме олöма нин тайö мортыслысь неуна мышкыртчöм мыгöрсö синнам кольöдиг. И мыйлакö окота вöлі эскыны, мый армияö веськавтöдз сійö, дерт, вöліс учительöн. Мöд делöөн ноксысь мортлөн эз вермыны лоны татшöм тöлка да быдтор казялысь синъяс, кодъяс быттö сідзи и писькöдчöны тэнад лов пытшкö.

Сöмын на удитім прöйдитны водзлань некымын дас метр, кызди миян выlö вуззысисны выль «юнкерсъяс». Кодысыны вöлі некор нин. Йöз водалисны, коді кытчö веськаліс. Сынöдыс бара сукмис сиренаяслөн омлялөмөн, бомбаяслөн шутялялөмөн, мулөн сьöкыда ружтөмөн... Виддзыс тырис сьöд фонтанъясөн, вывлань качысь пу вожъясөн, вужнас бертыштöм да кытчöсюрö шыблалөм кустъясөн. Корсюрö кывліс взводнöйлөн жебиник оръясян гөлöсыс:

— Фашистскöй самолётъяс кузя бронебойнöйясөн... Лыйлöй корпус выlö водзöджык...

Кутшöм нин сэнi корпус, кор самолёт пыдди син водзад здук кежлö усылö сöмын немецкöй пилотлөн маска кодь чужöмыс. Кутшöм нин лыйлөм, кор тэ синъяснад шардлан-корсян неылысь сöмын на артмөм воронка, кытчö сöдзтысьö кизьөр нюйт, да зілян саймовтчыны сэтчö. И кöть мед гөрд звездаа öти истребитель! Сынöдас сöмын сьöд крестъяс да маска кодь еджыд чужöмъяс: то векыштчöмаось лөгысла, то зывөкпырысь нюмъялöны.

Но быдторлы овлö пом. Медбөръя «юнкерс» веськöдчö рывыввлань. Ми сувталам, весиг ог пыркöдчöй, неуна шöйöвошöмөн видзöдам öта-мöд выlö, зілям шпыньмунны: чунавлөм пельяс нинөм на оз кывны; нимкодясям, мый вермам чөвтлыны видзöдлас этайö мустөм небесаас, вермам кыскыны морöсö тротил көрөн сорласьöм нюйт дука сынöдсö.

Сöмын тай шудыд оз ветлы быдөнкöд орччөн. Со орчча взводын, сöмын на артмөм воронка дорын, ноксöны некымын курсант, кыпöдöны ассыныс виöm өртнысö, а насянь неылын туплясьö некодлы нин ковтөм чегөм грифа гитара, кытчö көрталöма ыджыд алöй бант. Тыдалö, миянлы некор нин не кывзыны сьölөмтö югыд шоглунөн тыртысь лермонтовскöй романслысь шыяссö. Та йылысь казтылöны оръясьöм струнаяс, та йылысь висьталö чегөм гриф, та йылысь горзö нйитчөм алöй бант.

— Водзö!— кыліс команда.

Вөрзöдчим тэрыба, медым öдйöджык вешыны тась, кытчö ми колим асланым олөмлысь неыджыд юкөн, а кодсюрö и дзоньнас олөмсö. Но бара воисны «юнкерсъяс», и бара заводитчис налөн шуштöм сыланкывйыс.

Кор волос талы пом? Он весиг казав кадыслысь визувтөмсö. Буракö, лун шөр нин. А заводитисны бомбитны асылын... Уна-ö ми прöйдитім водзö? Верст, верст джын али этшаджык? Медводз петис терпениесыс Вагин. Сійö чеччис мусыс да заводитис кулакнас грöзитны небесаас, горзыны-видчыны, кöть, тöдöмысь, и ачыс ассыс гөлөссö эз кыв.

Ми Сметанинкöд зілим личкыны сійöс муö. Но тайöс вöчны эз вöв кокни: Миша быд ногыс водзсасис, быттö ми сылы лө-

кös кöсийм. Кор сийö сайкалыштис, воис Колесников. Взводной донъялис зонмös тölка видзöдласнас, восьтис да мыччис флягасö:

— Нылышт гоз-мöдысь. Тянлы эськö оз на позь, но татшöм исключительной случай дырйи — тшöкта.

Взводной видзöдлис Вагинлөн неуна сырмысь ки вылö, ёся чурвидзысь тарган вылö, кодi юигас ветлис öтарö-мöдарö, но немтор эз шу. Синъясас вöли дзевны вермытöм жалитöм. Косиник чужöмыс тайö здукас ропмуни-чукрасис. Миян водзын сулалис эз младшой лейтенант, а олöма опытной морт, кодi майшасис сы вöсна, мый эз вермы сетны миянлы колана сöвет. А гашкö, лыддис, мый кывъясыд татчö оз ковны...

— Тöдад норма. Тайö бур!— нюмдiс Колесников флягасö тасмаас пысалiг.— А моргыд, другъяс, винёв, быдтор ас вылас нуö. Ме со, мед оз ло ошйысьöма, коймöд война вылын нин. Германской, гражданской, сэссия со бара германской. Но, кызди асьныд адзад, ветлöдла на му вывтис. Зэв ёна радейта сийös. Со и видзö сийö менö мам моз.

— Тi учитель?— юавсис менам.

Колесников гажаа нюмдiс:

— Плешкö али мый гижöма? Гашкö, амуницияыс мös вылын седлö моз пукалö? Тадзи гижöны литераторъяс штатскойяс йылысь, кодъяс нем виччысьтöг лöоны кадрöвой военнойясөн.

Чукöртчалисны курсантъяс, кывзысисны взводной гөлöсö. А меным мыйлакö лоис вывти нимкодъ, кор кыли вочакыв, кушö-мös и кöйи:

— Двойкаестö эг этша пуктавлы. Торйөн нин эз радейтлыны менö Вагин кодъяс...

Но Мишалөн чужöмыс югдiс пытшкöсса радлунөн:

— Прöститöй, гвардияса младшой лейтенант ёрт. Ме öд радейта жö мутö, кöть эськö сийö и абу сэтшöм мелi. Лекарство-сьыд аттьö. Водзö, чайта, татшöмторйыс оз ло. Тянлы сетö кыв вöвлöм курсант, а öни гвардияса радöвой Вагин.

— Мыйла сэтшöм официальнойя? Ме эска.

— А век жö öбиднö,— быттьö аслыс шуыштис Вагин.— Юртö оз лэдзлыны лэптывны, а отсöг некодсянь. Тадзтö ми ловъя фашисткöд огö и паныдасьлöй.

— Бурджык, дерт, не паныдасьлыны,— вочавидзис взводной.— Но сы вылö ми и танöсь, мед сетны фашистъяслы нырво-мас, да сiдз, медем эз вермыны сэссия сувтны кок йылас.

Колесников бара шпыньмуни:

— Ме торйөн нин «радейтли» велöдiгөн сэтшöм зонкаясös, кодъяс оз вермыны прöйдитны нывка бокти сийös кöсаöдыс не-тшышттöг. Вöвлi, да? Öни кö эськö, пöжалуй, мöд ног вöчид, да кысь, кöсаясыд ылынöсь тасянь.

Зонъяс ордöчывтöг видзöдiсны Колесников вылö, вашкöдчисны. Налы окота вöли, медем эськö помтöг кыссис тайö муса сёрниыс. На вылö быттьö койыштисны ловзёдан ва: синъясыс гажмисны, чужöмъясыс банйисны.

— Ме рад, мый тi заводитiнныд скöрмыны,— водзö нуöдiс мöвпсö взводной.— А кор воинныд миян дивизияö, мем кажитчис, мый тi кужад лöгавны сöмын учителяс да нывкаяс вылö. Кодсюрö, гашкö, ещö дöзмöдлiсны пон-каньös.

Курсантъяс серöктисны.

— Помнитой: медым вермыны врагос, колө лөгавны сы вылө. Тайө ёна отсалө.

Сэсса ми бара мөдөдчим водзө. И сэк жө сынөдын тыдовтчисны «юнкерсыяс». Но өнi найө лэбисны неуна шуйгавыв.

Лои гөгөрвоана, мый немецьяс аддзөны миянлысь быд воськов, быттё куньсьывтөм синмөн видзөдөны миян бөрся, а кодлөнкө тыдавтөм кийс дирижируйтө немецкөй авиацияөн, зильө сувтөдны курсантскөй батальонъяслысь водзө мунөмсө, шочмөдны налысь радьяссө немецкөй салдатьяскөд паныдасытөдз.

Воддза луннас на, кор орчча полк орөдiс врагысь оборонасө, немецкөй авиация эз вөв. А талун со оз сет юр кыпөдны. Сидзкө, кыськө сийөс вайисны, сидзкө, повзисны, мый ми вермам өтлаасыны Ленинградскөй фронткөд, косявны блокада. Вот и уськөдiсны миян вылө авиация, а сэсса кыськө ваясны танкьяс. А гашкө, виччысьөны нин миянөс эсийө неылын тыдалысь вөр дiнас?

Но такөд тшөтш миян сьөлөмъясын первойсө заводитiс чуваны, а сэсса яра öзйис раддун сы вөсна, мый воча сулалысь татчөс немецьяслөн эз тырмы ни сямлуныс, ни удаллуныс сувтөдны миянөс и налы ковмис корны кыськө отсөг.

Сидзкө, өдйөджык водзө, медым дойяссө нюлысь вөрөг эз удит чукөртны выль вын-эбөс. Но сэки жө ми гөгөрвоим, мый батальонлөн водзө мунөмыс надзмө, воськовьясыс быттё падьялөны. Тайөс эз вермыны дзедны ни взводнөйяс, ни ротнөй — лейтенант Костенко, томиник, но збодер командир, кодi воуйтлөма нин. А сэсса рота и дзикөдз водiс. Кустьяс сайө дзедбясиг, связнөйяс котөртiсны корсьны суседьясөс — орчча ротаясөс. Көнөсь найө? Водзынөсь али бөрынөсь? Миян моз жө водiсны али восьлалөны водзө? Сидзкө, оръясьөмаөсь йитөдьяс и суседьяскөд, и батальонса штабкөд.

Югьялисны зырьяс, курсантъяс лоины пыр тыдавтөмөсьджык. Бур, мый веськалiм веретяө. Абу сэтшөм васөд. И сэки төвзыштiс салдатскөй почталөн сьөлөмтө нюкыртысь юөр: батальонлөн штаб вылө веськалөма бомба.

Та йылысь меным шөпнитiс Сергей. Тыдалө, сэки менам чужөмөй вөли Сметанинлөн кодь жө коньөриник, шөйөвошөм. Мыйла нө либө сэтшөм жалитөмөн видзөдлiс ме вылө суседөй — мугов чужөма да сэтөр кодь синьяса казах Алим Аралбаев? Водзө ставыс артмис сэтшөм өдйө, мый весиг эгө удитөй гөгөрвоны, кыдзи тайө лоис. Миян водзын, некымын дас метр ылнаын, сука быдмисны кустьяс, а на сайын тыдалiс козья вөр. Сэтчө асмогасыны котөртiсны кык-ө-куим курсант.

И пырысьтөм-пыр жө чөвсө поткөдiс гранаталөн потөм шы, сэсса мөдлөн. Кустьяс пөвстысь чечыштiс курсант:

— Вокьяс, немецьяс!.. Немецьяс!..

— Эн сөр!— горөдiс сылы Колесников.— Кысь найө воисны? Миян водзвылын полк...

Взводнөй эз удит помавны ассыс видчөмсө: кустьяссянь сярөбтiс автомат, сэсса мөд, коймөд... Миянлань котөртысь курсант джөмдiс, тешкодя өвтыштiс кияснас, быттё көйис кутчысьны сынөдас, сэсса ньөжйөнник лэччысис муас. Сийө жө здукас кустьяс пөвстысь тыдовтчисны йөз.

И мыйлакө сэки син улө усис вөр-пуяс сайө пуксысьшөндi.

Сійö вöли мырдгöрд рöма. «Рыт нин тай,— воис юрö татшöм здукас ньöти лöсвятöм мöвп.— Кор и колис луныс?»

Пöшти орччөн пель чунöдмөн сярöбтис «максим». Сы бöрын нин кылис взводнойлөн гөлöсыс:

— Взвод, огонь!

Ме чöвтлi синъясöс öтарö-мöдарö, но Сметанинысь, Вагинысь да Аралбаевысь кындзи, некодöс эг аддзы. Ыркмунис сьölöмöй. Көнöсь нö Калинин, Атяшкин, Зубров да мукöд курсантъяс? И сэки аддзи налысь мышъяссö, кодъяс вöли нин бердöны бöрвывса посныдик пуяс да кустъяс сайö. Кодсюрö ризöдiсны-котöртiсны весиг скаткаястöгыс да каскаястöгыс. А неуна бокинджык, öти кокнас чотiг да пистолетнас грöзитчиг, вöтчис на бöрся ротной — лейтенант Костенко. Тыдалö, кöсйис сувтöдны пышйысьясöс, но ранитчöм кокнас эз вермы вöтöдны. И сійö вöчис сэсся, мый лыддис коланаөн: сувтiс, веськöдчис, быттö «мирно» команда бöрын, матыстiс пистолетсö кöсича бердас... и лизмуни-уси кузь турун пиö. Лыйöм шыыс пельöдз эз воы: орччөн лентаясысь патрон бöрся патрон сёйис «максим».

«Пышйыны кö,— кодкö быттö тойыштiс менö,— позьö на, но здук мысти лоö нин сёр...»

Видзöдлi Сметанинлань да Вагинлань. Найö тэрмасьтöг, быттö стрельбище вылын, лыйсисны орччөн кодйöм ляпкыдик окопсянь. Ас выlö пузис лёкöй, лоис яндзим. Кысь воöны юрö татшöм мöвпъясыс? Врагыс кö, кыз шулывлö мам, тойлö-а? Колö кутчысьны танi, кытчöдз миян оз бергöдчыны бөр. Оз вермы лоны, медем найö эз сайкавны!

А кутшöм любö вöли кивны орччөн «максимлысь» гажа гөлöссö. Расчётыс тöдтöм, абу миян училищеса курсантъяс. Но ме дась вöли ошкыштны найöс: сэтшöм тэрыба найö личкисны муас мянлань котöртысь немецъясöс. Фашистыяс эз удитны весиг воны усьöм курсант дiнöдз. Ёртным колис ми да на костын.

— Эй, вокъяс!— шыясис сосед-пулемётчикъяс дiнö Вагин, кор кыкнанладорсяньыс ланьтiс лыйсьöмыс.— Тi кытысьсöсь? Кыдзи нимтöны тiянöс?

— Куйбышевскöй училищесысь,— кылис збой вочакыв.— Кыкнанным Иванъяс.

— Мый нö эн вöтчöй асланыд ёртъяс бöрсяйд?

— Видлы татшöм сярганнас котравныд. А эновтнысö жаль: немецъяслы киас сюрас, ошйысьны кутасны фюрерыслы.

А сэсся серьёзнöя нин:

— Патронным сöмын вот этша. Вайыштöй...

Немецъясладорсянь кылис куимысь тюрöстöм: турун пöвстысь, вутшъяс костысь, кустъяс сайысь чеччыштiсны салдатъяс, лэччысь шондiлөн югöръяс улын налөн пöрт кодь джуджыд каскаясыс ыпнитiсны-öзйисны гöрдоват рöмөн, вуджөръясыс кутiсны воны пöшти миян окопъясöдз. Но кык Иван пыр жö бөр водтöдiсны найöс.

Мышкын кылис турунлөн кышакылöм, вирснитi-бергöдчи: кыссьö Колесников. Дзормыштöм юрси пратьясыс петöмаöсь быгалöм пилотка увсыс, ляскысьöмаöсь пöсялöм кымöсас, гимнастёрка юрйылыс жан осьса, чужöмыс руд, няйтысла ли, порок тшынысла ли, но синъясыс гажаöсь, сэни быттö мутияс чеччалöны.

Сійö лэччис тыртöм окопö, кодi вöли ме да пулемётчикъяс костын. Вагинöс пыр жö ыстiс вала, медым позис вежны «максим» кожухысь васö, индiс пулемётчикъяслы вель позиция, тшöктiс сетны налы лишнöй патронъяс, кодъяскöд татшöм кадö сьöкыд торйöдчынытö, прöверитiс, дасътöма-ö гранатаяс.

Ми кокныдыка ышловзим, быттьöкö веськалiм асланым батылөн паськыд мыш сайö. Ещö нин долыдджык лоис, кор Колесников висьталiс, мый орчча взвод места вылас. Öнi позьö и колö кутчысьны танi пемдытöдзыс, а сэки тыдовтчас, мый вöчны.

Немецъясладорсянь кылис рочөн горöдöм:

— Сетчöй! Ми унаөн, а тi этшаөнöсь!

Воча кывсö налы сетiс «максим». Ме чошкöдi пельясöс: кысянькö вель ылисянь, веськыдывыв флангсянь, «максимлы» кутiс отсасыны миян ручнöй пулемёт.

Сметанин эз вермы терпитны да шыбитiс граната. Но сийö ратшмунiс-потiс вель на ылын сэсянь, кöнi, миян чайтöм серти, колö вöли лоны немецъяслы. Колесников öлöдiс Сметанинöс боеприпасъяс весьшöрö видзöмысь да содтiс:

— Кывлид? Тайö «дегтяревыс» орчча взводдөн.

Сийö жö здукас пельöдз воис минаяслөн зывöка омлялöмыс. Трах! Трах! Трах!

Сэсся ещö залп, ещö и ещö... Но шуд вылö минаяс потласисны миян дорö вотöдз.

Шондi лэччис, заводитiс öдйö пемдыны. Чöv олим ми, чöv олисны и немецъяс. Сэсся наладорын öзйис бипур. Сийö вöли ёна ылын. Но ми бура аддзим, кыдзи сьлөн кыаыс югдöдiс матiгöгöрса кустъяс, сэни вуджрасысь йöзöс. И со нин бипурыс ыпнитiс мый вынсьыс: тыдалö, койыштiсны бензин.

А ми пукалiм неыджыд окопъясын да чöv олим. Бипуртö позис на терпитны, но миян сьölöмъясным дзикöдз пондiсны потны, кор пельясöдз воис вомөн ворсан гудöклөн шыыс. И ворсiсны найö эз кутшöмкö ассьыныс сьыланкыв, а буретш сийöс, кодöс ми сьывывалiм училищын мудзöм бöрын стройөн осьлалiг, медым кокныдджык вöли муннысö. Юр вемö биа емъясөн писькöдчисны тöдса кывъяс:

**Выходила на берег Катюша,
На высокий, на берег крутой...**

— Гадъяс!— мый вынсьыс горöдiс Вагин.

Сийö жö здукö кузя эрыштчис миян «максим». Кор лентаыс помасис, кылис немецъясладорсянь серам.

— Ок, эськö миномёт кö вöли!— жаладдза шуис Колесников.— Көть куим «огурчик»... Позьö сёйны «НЗ»,— содтiс сэсся.

— Сийö кузь туисын нин,— ышловзис Вагин.

— Волöй татчö, сюрас кымынкö сукар,— вочавидзис Колесников.

Недыр мысти Вагин да Сметанин вуджöртiсны ме дiнтi. Кылис нума-намакылöм. Мый йылысь кö найö вензисны. Сэсся Колесников чукöстiс и менö. Вöлöмкö, Сметанинлы воöма юрас мöвп: сибöдчыны миян да немецъяс костын куйлысь курсант дiнö да кыскыны сийöс татчö.

— Мыйон тэ думайтан?— скöраліс Вагин.— Юрнад али казенной юкөннад? Сійö небось важон нин мöдаръюгьдас.

— Ме эг ылав,— кевмысис Сергей.— Неважон на сылön лöвтöмыс кыліс. Вермасны немецъяс кыскыны.

— Сійö тэнад земляк? Вок?— эз сетчы Вагин.

Ми заводитім кывзысьны.

Немецъяс дорсянь кыліс гудöкөн ворсöм, корсюрö сэн кып-тывліс серам, а орчöн — миян волжана-пулемётчикъяслön ноксьöм шыыс. Вагин скöрысь вашнитіс налы:

— Ланьтлад ті али онöй? Юр вылад «öгурцы» шнөпкас.

Ноксьöм лönис. Но некутшöм лöвтöм, не кө артавны менам киса часлысь тичкöмсö, эз кыв.

— Со... со, лейтенант ёрт,— шöпнитіс Сергей,— бара...

— Кажитчис, тыдалö,— вензис Вагин.

— Эн мешайтчы!— дöзмис Сметанин.— Эн пов, ме öтнам ветла. Кылан?— Сергей чабыртіс менсьым пельпомöс:— Со, со бара...

Сыланьысь, көні колö вöлі куйлыны курсантлы, збыльысь кыліс мыйкö ымзöм ли лöвтöм.

Сергей ырситіс местасьыс, но Колесников кутіс сійöс:

— Ветлöй Зарубинкöд. Срок — час джын.

— А ме?— чуть эз горöд Вагин.

— Ми кутам биön видзны найöс, ковмас кө.

Сергей муніс водзвылын. Пöшти некутшöм шытöг. Вель дыр мысти сувтовкерис, сэссия водіс, заводитіс кыссьыны. Сійö вошис дьöгöдь кодь пемыдас, сöмын кыліс турунлön шура-шаракылöмыс. Ориентируйтчим водзын öзйысь бипурлön кустъяс вывті тыдалысь кыанас, коді ньöжйöник колис шуйгавыв. Көнкө матын нин курсант. Но мыйлакö ымзöмыс эз кыв. А гашкö, сійöс кыскисны нин. Тадзтö позьö и немецъяслы веськавны. Налön, дерт, эмöсь секретъяс. Кутісны зöлитны көтасьöм пидзöсъяс да гыррдзаяс. Сотчöны дай ставыс. А Сергей уйö и уйö. Со сэссия ланьтіс шура-шаракылöмыс. И ме чужöмön зураси сылön сапöгö.

— Юра, сійö көнкö тані,— шöпнитіс Сметанин.— Кыссьыв шуйгавыв, а ме мöдарö. Эн ылöдз сöмын...

Немтор оз тыдав. Көть синмад чунь сюй. Ки улын уль му, няйт, сэссия ва. Тыдалö, воронка. Кытшовта сійöс. Көть нин мед немец лэдзис ракетасö. Ылöдз-ö нин кысси? Бергöдчыны-ö абу?

И сэки гөгөрвои, тані абу öтнам. Тадзи овлö, кор пемыд вежöсын узысь вöтын моз кылö кодöскö бокöвöйöс, зэв ковтöм мортöс. Тöдö — сійö орчча, сыöдз позьö инмöдчыны кинад, но шемöсмöмысла сойыс оз кыпав. Мыйкö та модаа öні лоис мекöд.

Кынми места вылö: кыськö водзладорысь ясыда кылі турунлысь шура-шаракылöмсö. Трачмуніс куст вож. Со и мöдарын... Тайö абу секрет. Буракö, разведка. А гашкö, усьöм курсант дінö жö кыссьöны? Колö бöрынтьчыны. И ме вöча тайöс. Көні Сергей? Кысь öні аддзан сійöс? И сэк жö шоныда öвтыштіс пельö гораа шöпкөм:

— Быттö трактор. Лөнъджыка, Юра!

Öтлаасим. Менам и збыльысь тырöма лолöй. Сöмын öні казялі.

— Документъяссö босьті,— содтіс Сергей.— Эштöма нин...

Ме висьталі, мый матын, буракö, немецкöй разведка. Сергей чошкöдіс пельяссö, юаліс, казялісны эз найö менö.

- Одвакө,— вочавидзи ме.
— Вай гөститөдам гранатаясөн!

Дыр думайттөг сідзи и шуим вөчны. Куйлім орччөн. Мыйлакө дугдiс гудөкөн ворсөм. Эз нин тыдав и бипурлөн кыаыс. Буракө, немецъяс век жө мыйыськө повзисны. Лөнъысла пельын тиньгө. И друг кок шыяс. Вошлөны, сэсся бара. Вошлөны, сэсся бара. Ме тувкниті Сергейлы. Одва кывмөн трачкөбтiс лимонкалөн ударникыс, сэсся мөдлөн... Пөшти өтпырйө лыбисны кык би сюръя, гримөбтiсны взрывъяс. Быттө кино кадрын, ясыда ты-довтчылісны шөйөвошөм нель морт, сэсся кыліс лөкысь чирөстөм, сы бөрын равөстөм. Сідзкө, веськалім. Но нимкодясьны некор. Уськөдчим ас йөзлань.

Но недыр мысти миянлысь туйнымөс потшисны би сюръяяс. Бөрвывсянь лэбысь выль минаяслөн омлялөмыс быттө плетяліс миянөс. Трах! Трах! Трах! Орччөн мыйкө ызмуні.

— Сергей! Тэ!

— Ме, Юра,— вочавидзис Сметанин.— Лешакыд, воронка вөлөма! А лөсыда ми найөс өжгим!

Водзын и бөрын ыпнитлысь бияс ёрөны синъяс, а сэсся сап пемыд. Көть бөрд, немтор он аддзы. Трах! Трах! Трах!

— Сергей!

— Ловъя на, Юра, сөмын тай көтаси. Ми тадзи жө коркө пышйивлім анькытш му вылысь... Юра, энльв...

Казялі: Сергей кольччө. Кватиті киөдыс, но сійө шнөпкысис-усис.

— Юра, лэдз лолыштны, ог вермы...

— Зарубин! Сметанин!— кыліс Колесниковлөн гөлөс.

Здук мысти мекөд орччөн Сергей весьтө копыртчис Вагин:

— Серёжа, өтнад сэтшөма шумитін. Чеччы өдйөджык, бөрыньтчам, а то сёр лоө.

— Энлөй, ачим,— Сметанин заводитліс пидзөсчаниясьны, но бөр лөздіс.— Мыйкө морөсын... И кынөм сотчө.

Плац-палаткаөн вевтгысьсөм бөрын Колесников өзтiс электрической пөнар. Сергейлөн морөсас, шуйга нөньсыс неуна улынджык, төдчис неыдждыд розь. Быд лолыштiг сэтысь пычмунліс вир. Разим пакетъяс, гартлім кыз кужим.

— Тайө немтор,— шуаліс Сметанин,— куйлышта вот, сэсся чечча.

Нюжмасьны оз позь. Ме көшельөді Сергейөс. Сійө топыда кутчысис голяө. Вөрзим. Водзын Аралбаев да Колесников, сэсся волжана-пулемөтчикъяс, на бөрын Вагин да ми Сергейкөд, мед-бөрын — ручнөй пулемөта кык курсант. Тувччалім кыв ни джын шутөг. Пыр ылөджык и ылөджык колисны небесалань качлысь ракетаяс, налөн югөрыс лоис чусыдджык и чусыдджык, а сэсся и тыдавнысө эз кутны.

Сьөкыд восславны, кор вылысад ранитчөм морт. Содтөд лоө виччысьны, мед эськө не дойдавын сійөс. А видлы тайөс вөчны, кор кокъяс улад бур туй пыдди то вутшъяс, то мылькъяс, то ва тыра гөпъяс, кодъяс артмөмаөсь нин снаряжьясөн да бомбаясөн кодйөм воронкаясө. Сергей, дерт, гөгөрвоис тайөс, крепитчис, весиг эз ойөстлыв. Сөмын корсюрө юавлывліс, өна-ө сьөкыд меным.

Мунім ньөжйө, сувтлывліг да кывзысиг. Сергейөс нуим то

ме, то Вагин. Оти пöрийö, кор ми вежсим Вагинкöд, юалi ручнöй пулемёта курсантъяслысь, кызд найö веськалісны миян дінö. И кутшöма кутіс дивöй, кор тöдмалі, мый миянöс веськыдывыв флангсянь видзöмаöсь сöмын найö — кыкөн. Сэні некутшöм взвод абу вöлöма. Кор курсантъяс уськöдчасны пышйыны, найöс кыкөнöс сöмын и удитöма сувтöдны младшöй лейтенант Колесников.

— Со и пукалім пемдытöдзыс,— быттö дорйысисны найö.— А кор кутісны пемдöм бöрас кытшавны, локтім тiян дорö.

Мукöддырйи и ылöдчöмыд отсалö. Ме ньöти эг дивит таысь Колесниковöс. Эз кö пöръяв, мый матын дзонь взвод миян сулалö, ми эськö, гашкö, эгö и лысьтлöй немецъясыдлы воча петавны.

— Винегрет артмис,— ышловзис мöд пулемётчикыс — нем виччысьтöг зурасим, шöйöвошим... Тыдалö, водзын мунысь полкыд абу нин вöлöма, а ми эгö тöддöй...

— Ланьт нин!— кодкö вомаліс сійöс.

Пемыд. Чöв. Сöмын болскöны кок шыяс.

Дум вылö усис Костенко, кодi пышйöм дорысь лыддис бурджыкөн помавны олöмсö. Позис эз мыжавны сійöс? Дерт, эз. Костенко эз вöв полысь рöдысь. Та йылысь эз öтчыд висьтавлыны дивизияса салдатъяс, кодъяс воюйтлöмаöсь нин сыкöд. Тыдалö, тайö том да öтчаяннöй командирыс эз вермы терпитны татшöм позорсö. А кутшöм мичаа сійö сывліс! Сьölöмтö вөрзьöдысь сыланкывъясас кыліс эновтöм чужанін вöснаыс шог, враглөн гыж улö веськалöм йöз вöсна тöждлун, водзö вылö югыд надея.

**...Ой, Днипро, Днипро,
Мы от тебя ушли,
Смертный бой гремел, как гроза.
Ой, Днипро, Днипро,
Ты течёшь вдали,
И волна твоя, как слеза...**

Немтор. Ми ещö косöдам водзöс. Колöкö, волам на и тэнад Днепр дорö, мыськам чужöмысь нййтсö сылөн синва кодь ваөн, а сэсса жугыля казытштам Украиналысь пьянсö, кодъяс пуктісны юрнысö сысянь ылын.

Руа да ыркыд асыв суис миянöс ляпкыдик пуяс улын. Ми пукалім Сергей дінын, кодi вöлі садьтöм. Чужöм вылас сылөн эз тöдчы вир чут. Зато Вагинлөн да менам паськöмным кормисы вирысь.

Воронкаысь вайöм ваөн заводитім мыськыны Сергей чужöм вылысь нййтсö да сасö. Сэки сійö воис ас садяс, корис юны, сэсса гартыштны чигарка.

Вагин бурджыка шебраліс другсö плащ-палаткаөн да ньöжйöник висьтавліс сылы коркö вöвлöмтор. Батыслөн öтчыд зэв ёна висьмöма кынöмыс, горт нин тшöктылöма вöчны. А сэсса адзысьöма доктор, кодi вундöма да шыбитöма кутшöмкö сыв. И öні на батыс корт кодь ён.

— И тэ, Серёжа, менам свадьба вылö на волан,— содтіс Вагин.— Эк и гуляйтштам сэки. А гашкö, тэ водзджык гöтрасян. Öні öд докторъясыд тöдан кутшöмöсь! Морттö торпыригыясысь чукöртöны, вурлöны да йитлöны. И олö. Сэтшöмъяссö ме ачым

аддзылі. Тэнад кынөмыд өдйө бурдас. Сөмын колө госпитальö кызкө воодчыны...

— Часлы, шойчышта да мөдөдчам,— өдва кывмөн вочавидзис Сметанин.

Вагин гартыштіс чигарка, медым могмөдны друкыслысь корөмсө. Но Сергей эз нин удит кыскыштны чигаркасө. Сылөн бөръя кывъясыс вөліны:

— Гортө дзик пыр энө гижөй. Мед чайтөны, мый ме училище-ын на...

Медводз, ичөт кага моз, рикөстіс-бөрддзис Аралбаев. Алим мый вынсыс нетшкис дженыда шырөм смоль сьод юрсисө да мыйкө лыддьөдліс ас ногыс. Сійөс стрөга өлөдны заводитліс Вагин, но сэсся тэрыба бергөдчис мөдарө. Няйт ветөшөн чышкаліс синъяссө да өти войөн дзикөдз ропмунөм-пөрысьмөм чужөмсө Колесников. Ме бура гөгөрвои, мый йылысь мөвпалө сійө, вөвлөм учитель...

Кадыс оз виччысь

Ассым кузь висьтөс помалөм бөрын ме видзөдлі зумыша пукалысь Кузьмич вылө. А вомсө паськөдөм Бойцов терпитны вермытөг юаліс:

— Аддзинныд ассыныд йөзтө?

— Аддзим,— вочавидзи ме.— Найөс сувтөдөма заградительнөй отряд.

Менам висьталігөн бишур дзикөдз ваймөма. Но сійөс лөдсавны эг нин кутөй: колө вөлі мунны ужнайтны.

— Война вылад быдторйыс овлө, пиукъяс,— кышөдчис Кузьмич.— Воюйтөмыдөсь ті, Юра, абу омөля. Важъя война дырйи кө, кодсюрөлы вермисны крест өшөдны. Колесниковыдкөд мый лоис?

— Колис ротнөй пыдди. Сөмын менам ранитчөм бөрын йөзыс өдва взвод мында кольөма.

— Дзик весьшөрө серавлөма командир-пилаыд,— скөрмис Бойцов.— Часлы, ме аддзыла сійөс!

Сэсся друг содтіс:

— Ме төдмалі, мыйла сылөн юрсиыс сэтшөм. Вөлөмкө, сійө лэбавлөма «кукурузник» вылын. Ладожскөй ты вомөн вуджигөн уськөдчас «мессер». Юранёвлы ковмас дзик ва веркөсас жмитчыны, а сэсся и сунны сэтчө. А делөыс — арын... И берегыс пө некөн оз тыдав. Ладогаыд море кодь жө. Ме ас синмөн аддзылі. Кысь нин варччөм йылысь лысытан мөвпыштны. А медся тешкодьыс со мый. Юранёвыдлөн самолётыд оз вөй. Ачыд төдан — «кукурузникыд» фанераысь. Нырыс пө вөйө, а бөжыс ва веркөсас. Кувнытө өд некоды абу окота. Кутчыяс Геняыд самолёт бөжас, а сійө вөйө сыкөд тшөтш. Лэдзас — бөр кыптө. Сөмын быттө дэльөдчө. Юранёвлөн вын-эбөсыс нин кутас бырны, но сэки гөгөрвоас да сөмын тшөканас өшөдчас самолёт бөжас. Сідзи и качайтчөма сэні, кытчөдз оз во зенитчикъяслөн катер. Бур, мый усьөмсө казьявлөмаөсь. Кор лэптөмаөсь васыс, юрсиыс татшөм нин вөлөма — еджыд. Водзсө, дерт, ог төд, кутшөм вөлөма.

Бойцовлөн висьтыс, дерт, эз вермы не вөрзёдни сёлөмөс. Вөлөмкө, со мыйын делёйс.

— А өд ме, Алексей, ок кутшөм бура помнита сылысь юрсисö. И не сөмын сійöс...

Ужнайтөм бöрын петі ыркөдчыны. Тайö кадсö медся ёна радейтлісны полевöй госпитальса йöз, торійөн нин кокныда ранитчöмаяс. Рөмдö. Неыджыд төв улын кышакылысь пожөмъяс весьтын — кымөръяс сора пемыдлöz небеса. Абу сэтшөм шоныд, но и оз на төдчы сентябрьскöй войлөн кöдзыд лов шыыс. Плавкнитан кö шынель, оз ло лишнöй, но позьö на и сытöг гуляйтны. Палатка костъясын то öтилаын, то мөдлаын кыліс варовитөм, серам, көнкө брунөдчис гитара, гөрд чутъясөн ыпнитлісны чигаркаяс. Позьö шойччыны асылөдз, оз ков повны ни «юнкерсъяс-ысь», ни «Берталөн» снаряжьясысь. Тайö кадас шойччö и лунтырнад дзикөдз лигышмунөм медицинскöй персонал, дерт, дежурнöйяс кындзи.

Думнам корси Генаöс. Ми бурджыкасö эгö на удитлöй сёрнитны ськөд. Öти госпитальынöсь, а быттö төдтөмъяс. Но Геналөн мыгöрыс некөн эз тыдав. Эз вөв сійö и палаткаас.

Паськыд ордым петкөдіс нöрыс йылö, код сайын вольсыштчöмны пуктытөм видзяс. На шöрті чуклясис-муклясис неыджыд ю, кытысь ми неважөн Генакөд да Алексейкөд видлім кыйны чери. Тані вöлі төдчымөн югыдджык ягын серти, но сынöдыс ёна ыркыдджык. Дзик креж йылас пукалісны некымын раненöй да гораа варовитісны. Ме прöйдиті на дінті да веськөдчи ю катыд. Лоис нин пöшти пемыд, пуяссö öдва позис торійөдны öта-мөдсьыс. Көсийи бергөдчыны, но сэки орчча кустъяс пиысь кылі кышөдчөм. Сэсся воис пельөдз.

— Надя, збылысь, менам ни öти муса на эз вөвлы...

Гөлөссö, дерт, ме төді. И сэк жö ныв вочавидзис:

— Тэ кодъ корасьысьыд тані уна. Сэсся тэ, Гена, пöшти тшöтшъя мекөд, а быдторсö нин аддзылөмыд, весиг юрсиыд дзормөма...

— А мый? — серөктіс Гена. — Кокысь дойыс неуна бурдыштас — и шутөвтам миян частьö. Сэки небось быдторсö аддзылан. Позяс весиг законнöя гөтрасьны, ёна кö нин полан...

Геналысь кывъяссö орөдіс швачнитөм шы. Сэсся кустъяс шур-шармунісны. Муртса удиті вешйыштны, кыдзи ме дінті шавксөдіс Надя Огнёва. Недыр мысти мыччысис и Юранёв. Восьлаліс бедь вылас мыджсьөмөн да шутъяляліс «Риголетто» операысь герцоглысь ариясö.

Сійö прöйдитіс дзик ме дінті. Но вöлі зывөк мыйкө шуны сылы, непöштö кыпөдны киöс.

И тайö Юранёв?! Гена, коді не сөмын сөрөма немтор абусö миян курсантъяс йылысь, но и вунөдөма нин Валялы сетлөм кывсö?!

Воөдчи асланым палаткаөдз мөд ордымті, шыбитчи вольпась вылө, вевтгыysi шынельөн. Недыр мысти воис и Бойцов, но ме лэдзчыси узьөм улö. Сійö ломтіс вой кежлö пач да водіс жö, а недыр мысти нин нистіс-узис. Менам эськө вежöй петіс жö, но ун пыдди юрö воалісны выль и выль думъяс.

...Гожся лун. Эжвалөн ыркыд да мелі сывйыс сідзи и кыскö тэнö. Сэтчö жö, бона вывсянь вöйтöма подольникъяс, колö найöс

видавны. Кокъясыд асьныс и котөртöны вадорлань, кодї пöшти гортыдкөд орчча. Öшиньянь позьö лыддыны кывтысь-катысь пароходьяслысь нимьяссö. А со и кыркөтш. Мый тайö? Оз-ö нин кодьяскö тышкасьны? Сідзи и эм. Тышкасисны чöла, горзытөг ни чирзытөг. Öтарас куимөн, орчча керкаысь Ёгор Степан, Вылыс грездысь Кузьма Öльöш да Катыдпомысь Митрей Паньö. На пöвстын медся ёныс — Ёгор Степ, кулакъясыс сылөн мужиклөн кодьöсь. Гыпкас кө, кок йывсыд пöран. А тайö куим зонкаыслы воча сулаліс тöдтөм детинка. Сылөн нырсыс лэччис нин вир. Тöдтөм зонкаöс куимладорсянь зырисны валань. Сійö некымынысь заводитліс орöдны кытшсö, но кык кулаклы сьöкыд венны квайтöс. Тöдтөм зонка тышкасис бура: весиг Ёгор Степ матыстчыліс сы дінö видзчысьöмөн. А мыйөн Öльöш да Паньö волісны тöдтөм зонкакöд ныр на ныр, пыр жö чеччыштлісны бөрвыв либö зільлісны саймовтчыны Степанлөн паськыд мыш сайö. Но тöдтөм зонкалы век жö лои бöрынытчыны. Со нин сандалиа кокыс лои ваын, со и мöдыс...

Мый эськö сөветуйтны тайö смел зонкаыслы? Орччөн бона. Веськалас кө сэтчö, то позяс бöрынытчыны ва шöрлань. Тöдтөм детинкаыд быттö кывлöма тайö мөвпсö. Здук мысти лои бона вылын, бергöдчис да мöдіс котөртны ва шöрлань, а куим друг — сы бöрся. Паньö, медся жебиник да пельк, водзын, а медбöрас лабутнöя тапиктис Степ. Тэрмасыны некытчö: гөгөр ва, а быд боналөн овлö пом. Тöдтөм детинка, тыдалö, гөгөрвоис и Степанлысь тайö думьяссö, бырс бергöдчис да варыш моз уськöдчис вöтчысьяс вылö.

Пышйысьлысь мышсö пыдди Митрей Паньö друг адзис векыштчөм чужөм. Повзис, зэв öдйö бергöдчис да вильдіс, тювгысис да сэтшöма зургис юрнас матыстчысь Кузьма Öльöшлы, мый найö кыкнанныс бузгысисны ваö. Степöс тайö шемöсмöдіс, сійö сувтовкерис, тапикасьыштис да, юрсö букыша копыртöмөн, мöдіс тöдтөм зонкалы воча. Веныс муніс здук-мöд. Сэсся бона вылö некод эз коль. Тыдалісны сöмын ваын упкысь юрьяс.

— Вот тайö да! — кыліс сэки ёсь гөлöс. — Öтнас куимöс купайтис. Мо-ло-деч!

Видзöдлі: мясянь неылын чиктыліс радысла да кекöначасис Вичкодорысь Валя, велöдчысь. Быд чеччыштлігөн сандали бөрьясыс усьлісны, а кор вöснныдик черьяса гожьявтөм на кокъясыс инмылісны муас, сандали бөрьясыс шлопкысьлісны-волісны асланыс местаас. Гырысь сера ситеч платтьöйс няйтчöма, киясыс тшöтш, весиг кельыдлөз көсынкаыс, мыйөн көртыштöма дженныда шырöм шавьялысь еджыд юрсисö.

— А тэ, Юра, мый он мездысь! Воштін яндзимтö? — Валялөн неуна водзлань былкнитчөм руд синьясыс друг лоисны стрөгöсь.

— Кодöс дорйынысö? Ставыс со ваынöсь. Некоды нин абу заведнö.

— Другьясыдлы, дерт, öбиднö, — видчис Валя. — Найöс и коліс дорйыны. Ещö öд вöлі көсьям найöс комсомолö примитны.

— А мый тані лёкыс? — нарошнö дöзмöдчи ме. — Степ радейтö тöдтөм зонсö. Ваас кутчысьöмөн весиг шыбитчисны. Кор и тöдмасьöмаöсь. Дивö!

А сэк кості тöдтөм зон воис берөгö. Пыдзыртис гач кок помьяссö, нюммунис Валялы.

— Мынтöй дон видзöдöмсьыд! Киносъыд тай мынтысянныд. Сійö вöлі ар дас вита, миянкöд тшöтшгъя. Паськыд пельпомъяса, но коскыс зэв вöсни, кокъясыс кузьöсь, косöсь, öти мускуляс, сэтшöмöсь жö вöліны и сойясыс. Тöдчис: зонмыс зэв винёв да пельк. Юрсиыс съöд, чужöмыс мугов. Синкымъясыс паськыдöсь, пöшти öтлаасьöмаöсь кузь да неуна гөрба ныр весьтас. А синъясыс сідзи и сёйисны Валяöс. Менам морöс пытшкын пыр жö чужис вежöгтöм.

— Коді тэ? Кысь татчö веськалін?— юалис Валя.

— Вои овны выль местаö школа помалöм бöрын, а тані сэтшöм «меліа» чолöмалісны.

Сэк кості локтісны миян дінö и куим друг. Но Валя дырйи, дерт, эз нин лысьтны водзö тышкасьны. Сэтчö жö куим друглы, тыдалö, воис сёлöм вылас тöдтöм зонкаыс, коді ньöти эз дузьяв, а нюмъяліс, быттö немтор абу и вöвлöма на костын.

— Ме чайта, мый эз весьшөрö тадзсö чолöмавны?— серöктіс Валя.

— Коді öд кызди гөгөрвоö,— вочавидзис зонка.— Пыри бона вылö, видзöда: сэні подольник. Коді, думайта, лысьтö кыйны черисö менам бона вывсянь? Ме öд сплавщик. Сöмын копыртчи, кöсья лэптыны — вувзысисны этійö куим багатырыс... Но вайö тöдмасямöй. Гена. Юранёв. Чайта, мый тиянкöд гожöмсö коллявны оз ло гажтöм.

Вөлөмкö, тайö зонмыс сплав участокса выль мастерлөн пи.

— А арнас кытчö?— юалис Валя.

— Лесрабфакö,— вочавидзис Юранёв.

— Ой!— швачнитіс ки на ки Валя.— Ми Зарубинкöд сэтчö жö сетім шыöдчөмъяснымöс. Сідзкö, лоам öтлаын. А öні, зонъяс, школьнöй участокö! Отсыштöй нывъяслы нетшкыны градъяс вылысь нявда.

Валя босьтіс сойбордöдыс Генаöс:

— А тэд, потомственнöй сплавщиклы, ковмас заводитны, кыз шуасны, «аз»-сянь. Лоан менам син улын. Эн думайт лытайтны!

Тадзикөн тöдмасим Гена Юранёвкöд. Сійö гожөмбыд эз торйöдчыв миянкöд. Луннас уджаліс видз да му вылын, а рытнас гажöдчис том йöзкöд. Сійö бура гудөкасис, сьыліс да йөктіс. Та вöсна том зон вылö меліа видзöдісны не сöмын тшöтшгъя нывкаяс, но и гырысьяс, кодъяслы кад петны верöс сайö. Дай Геналөн туша-рожаыс эз вöv шыбитана. Но медсясö том йöз радейтісны кывзыны сылысь висът-мойдъяс. Мый йылысь сöмын эз висътавлы! Генаöс кывзигөн ми лолім и лётчик-геройясөн, и ылыс мирьясса олысьясөн, и испанскöй республиканецъясөн, и збой да сюсь пограничникъясөн. Эз вöv му шар вылас страна, кытчö эськö ми эгö воывлөй гожся шоныд рыгтясö Эжва берегын пукалігөн. Вочасөн Гена лоис сиктса том йöзлөн нырщикөн, а меным — матысса өртөн. Ми эгö торйөдчывлөй пöшти некор. Весиг частö узьывлім öта-мöд ордын.

Сентябрь төлысын куимөн — Валя, Гена да ме — кутім велөдчыны лесрабфакын. Тöдлытөг коліс кадыс. Ок, бергöдны кö эськö сійöс, да он тай вермы! Гена лоис курсса старöстаөн, Валя — комсомол комитетса членөн. И кор мөдөдчывлім гуляйтны, ме частö шуткаөн юавывлі, позьö-ö меным, радөвöй мортлы,

прөйдитчыны татшөм ыджыд начальствокөд орччөн. И найо кыкнанныс радпырысь нюмъялісны.

Эг өтчыд шөйтлөй ми паркса аллеясті, кор сэні пу коръясыс вөвліны и вежось, и вижось, а сэсся гылавлісны да артмөдлісны кок шытө гусялысь небыд вольөс; эг өтчыд сулавлөй Сыктыв берегын да өткодявлөй юсө муса Эжвакөд, эг өтчыд нимкодьяслөй мөдлапөвса да лесозаводса биясөн.

Эз вөв гажтөм и төлын. Кырув сайса Краснөй гөра бокын кольліс этша места, кыті эськө эз юковтлыны миян лыжиясным.

Ми ёна велалім өта-мөд дінө. Кажитчис, мый ог вермөй овны ёрта-ёрттөг өти здук. Но збыльысьсө, вөлөмкө, абу сідз. Таёс гөгөрвои өти лоөмтор бөрын.

Велөдчим мөдөд курсын нин. Öні ни Гена, ни Валя, ни ме эг нин мунөй сиктса ныв-зон вылө. Быдмим, ёнмим, вежсис и олан сямным. Оз тай шуны весьшөрө: йөз няньыд овнытө өдйө велөдас. Торйөн нин вежсис Валя. Но тайөс ме казялі сөмын сэки жө...

Вөлі март төлысь. Асылын да рытын ныртө чеплялө көдзыд, луннас төпкө войтва. Субөтаө, бөръя перерыв дырйи, коридорын жуысь рабфаковецъяс пөвстысь аддзи Валяөс пөдругаясыскөд. Сувтөді.

— Талун кытчө?

— Кино вылө.

— А билетъясыд?

— Закажитөма,— серөктіс Валя да муніс пөдругаяс дінас.

Воис рыт. Общежитие кильчө помын виччыся Геналысь пөтөм, медым сэсся өтлаын нуөдны Валяөс. Со и ачыс Валя тэрмась нывъяслөн общежитиесянь. Уськөдчи воча.

— А көні Гена?— юаліс ныв.

— Тані,— кильчө вывсаянь турбыльтчис Юранөв.— Мөдім!

— Но...— Валя кызкө тешкодья лэптыліс пельпомъяссө.

— Юр, гөгөрвоан?— бара мыктыштіс Валя.

Сэки Гена тэрыба матыстчис, босьтіс Валяөс сойбордөдыс:

— Миянлы орччөнсө сюрис сөмын кык билет. Эм ещө өти, но мөд радын. На, Юра!

Ме эг вермы не босьтны сійөс. Но кор найө бергөдчисны да вөчисны медводдза воськов, менам кокъясөй эз вөрзыны местасыс, эз чепөсийыны найө, кызди вөвлі вөйдөр, и менө чукөстөм бөрын.

Пыр ылысмисны и ылысмисны кык мыгөр. Öтиыс — ыджыд, ён, паськыд пельпомъяса, шалсийө-восьлалө, мөдыс неуна ичөтджык — тотшсьөдө өдйө джөмдалігтыр. Сідзи и бердісны найө рыгтя пемыдас ньөтчыд бөрвыв видзөдлытөг. Ме сулалі кокъяс изөймиттөдз. Сэсся посниторясөдз косявлі билетсө, коді быттө сөтіс ки пыдөсьясөс.

А аскинас, кор паныдасим Валякөд рабфак коридорын, сійө видазаасис, сэсся кызкө тешкодья гөлөсөн шуис:

— Юр, прөстит менө... Аддзан, кызди артмис. Тэ — зон абу шыбитана, а ме кодыд тані уна...

Первойысь быттө боковөй синъясөн видзөді Валя вылө.

Ме водзын сулаліс эз нин косіник ки-кокъяса да дженьыда шырөм юрсиа нывка, а ныв, кодлөн зумыд морөсьяс, гөгрөсмөм ён черъяса кокъяс, а неыджыд юр вылас кыз көсаысь гөгыль.

Весиг водзлань неуна былъкнитчѳм синъясыс лоѳмаѳсь быттьѳ лѳзѳсьджык.

Ассыс «мыжсѳ» некымынысь заводитліс веськѳдны и Гена, зліс тѳдмѳдны мукѳд нывкѳд, но ме сѳк эг на вермы вунѳдны Валяѳс.

Тулыснас миянлысь рабфакнымѳс тупкисны, сѳні лоис сѳмын техникум. А гожѳмнас, кор ми вѳлім каникуляс вылын, пансис война.

Гена пыр жѳ кайис военкоматѳ. Тшѳтшъяс пиысь сійѳ медводз, война заводитчѳм бѳрас, веськаліс армияѳ. Частѳ мѳдѳдліс письмѳяс, гижис, мый велѳдчѳ лѳтнѳй школаын. Дугдывтѳг сѳветуйтис миянлы: «Мунѳй добровольнѳ. Кадыс оз виччысь. Паччѳр сѳрѳгад гыжъясигкоста войнаыс помасяс, немтор он и аддзылѳй».

А кутшѳм шуда синъясѳн сѳки видзѳдіс мир вылас Валя! Быд кывйын, быд вѳрасын тѳдчис дзевны вермытѳм ошйысьѳм: ѳд сылѳн мусукуыс мунис добровольнѳ армияѳ да регыд лоас лѳтчикѳн.

Но Геналѳн кывъясыс эз збыльмыны. Со нин мѳдѳд во кыссьѳ война, и ми, сиктса тшѳтшъя зонъяс, удитім волыны фронт вылѳ, а кор помасяс войнаыс, чѳртыс тѳдѳ.

* * *

Асывнас, кыдзи и век, миянѳс садъмѳдіс кѳрт туй станцияланьын германскѳй сьѳкыд снаряжьяслѳн потласьѳм шы. Он небось лишнѳйтѳ узь! Бойцов удитѳма нин ветлыны сѳянла да чайла. Татчѳ воѳм бѳрын сійѳ окотапырысь босьтчис отсасыны санитарлы. Сѳтшѳм нин Алексейлѳн оласногыс — уджтѳг оз вермы пукавны ѳти здук. Пѳрт мыччигѳн вашнитис:

— Тѳнѳ командир-пила корсьѳ, юалис, кутшѳм палаткаын олан. А ачыс перевязочнѳй палатка гѳгѳр бергалѳ. Збыльысь нѳдкыв: кодысь гажыс бырѳма, тѳысь, сержант ѳрт, али Надя-сестраысь?

Палаткаын кодсюрѳ заводитлісны серавны, но ме скѳрысь вомалі найѳс. Тані ме вѳлі эг нин выль мортѳн, а кѳзяин, коді тѳдѳ став пѳрадѳксѳ да йѳзсѳ, коді оз мѳдѳдчы некытчѳ — ни ылысса, ни матысса тылѳ, а лечитчѳ буретш тайѳ госпиталяс, кѳні рытнас водан, а чеччан-ѳ ловйѳн — код тѳдас.

Чай юѳм бѳрын петі корсьны Юранѳвѳс. Бойцов заводитліс вѳтчыны, но ме косѳді сійѳс.

Перевязочнѳй палатка дорын сулаліс грузѳвик. Сы кузовысь санитарьяс отсѳгѳн лѳччалісны выль раненѳйяс. Тані жѳ вѳлі и Юранѳв. Ылісянь на тѳді сійѳс пемыдлѳз пилотка да сера бѳдь сертиыс. Юранѳв нюммунис, мыччис кысѳ:

— Миян «овмѳсысь» некод абу. А окота эськѳ вѳлі тѳдны, кыдзи сѳні олѳны. И тиянысь, буракѳ, некод жѳ абу...

— А тѳ тѳдан, кутшѳм частысь ме?

— Суседьяс. Сѳмын ми наступайтнысѳ заводитім мѳд луннас, кор тиян дивизияыд август 28 лунѳ орѳдіс германскѳй фронт. Но сѳсся, кажитчѳ, первѳйя полксѳ вежис мѳд. И вот сѳки и лоис. Видзѳдам да, миян суседным, курсантъяслѳн батальон, ассыс местасѳ сетѳма немецкѳй автоматчикъяслы. ѳдва кытшѳ эг веськалѳй...

— Ок, Гена, Гена,— шога артмис менам.— Мыйла колө тешитчынысө? Өд бөрынтчылысны сөмын вой кежлас, а асывнас делөйс бергөдчис мөдарө...

— Сидзкө, и тэ вөлін орчча курсантскөй батальонас?— зэв збыльысь юалис Юранёв.— Эн дивит, воканөй. Эг төд. Лёкөсь вөліны тиян делөясид, лёкөсь. Но и миянлы ошйысьнысө немторйөн... Унаён пуктисны юрсө. Но век жө аттё тиянлы: чорыда дөжналід немецясөс.

— Но, мыйла нө либө тешитчан йөз паметь вылас?— менам гөлөсөй, тыдалө, сэтшөма вежсис, мый Гена повзис.

— Тэ мый йылысь? Висьтав лючки.

— А мый тэ сөрөмыд тані курсантъяс йывсьыс?

Гена чабыртис менсым дзоньвидза киөс:

— Воканөй, өвсыы, сайкав. Ставным кө ми лоам тэ кодь бучышөсь, көть джагөдчы. Көркө өд и сералыштны колө. Төді кө, мый тайө тэнө сэтшөма дойдас...

Төдчис, мый Юранёв сёрнитө оз сёлөмсяныыс, зильө ланьтөдны ме пытшкысь садьмөм зверөс.

Көть кутшөма эг кутчысь, а терпитны эг вермы:

— А чувствояснад шутитан жө? Вөлөмкө, тэныд өнөдз на ни өти муса абу вөвлөма. Кокыд бурдыштас да шутөвтад частьө, сэні быдторсө позяс вөчны, да?

Юранёвлөн синъясыс лоисны коль кодьөсь:

— Кыйөдчин?

— Кывлі случайнө...

— Бара гартчан, конъясьлан кок улын, кыдзи и рабфакын! И век жө тэ колян дьөбө. Колө кужны тэрмасыны.

— А Валяыд?— өдва кывмөн артмис менам.

— Валя? Ха-ха-ха...— вөр тырнас серөктис Юранёв.— Чайтан, төддас? Сылы тырмымөн и письмөясыс. Виччысьлас, оз кө пет верөс сайө.

Ме видзөді и эг төд ассым вөвлөм другөс. Дерт, сы вывти унатор нин мунис война заводитчөмсянь. Велөдчис лётчикө, лэбалис, воуйтис, воштіс ассыс самолөтсө, сы бөрын со мөдысь нин ранитчөма пехотаын. Дерт, быдторйыс вөвлі. Но позьө өмөй тадзикөн шыблассны аслад чувствояснад? Көні сійө велалис? Но шуи ме нарошнө мөдтор:

— А төрыт Огнёвалөн тырмис төлкыс веськыда вочавидзны. Оз тай, вөлөм, быд сёлөмын сюр местаыс тэ кодыясыслы...

— А зэв кө колө, Юра, Огнёватө верма кольны. Сөмын өд рабфакад моз жө кутан виччысьны, кор чыкышыд пуксяс ныр вылад, а сійөс колө кыйны да садөкө йөртны. Гөгөрвоин?

Дивө! Юранёвлөн да менам олан туй визьясным быттё сюртсис. И рабфак, и Валя, и Огнёва... Мый ыджада фронт! Сэні ми быттё Эжвалөн кык лыа чир, а колө жө бара тангысьны...

Юранёв лэчысис матысса пожөм улө, судзөдіс вышивайтөм көшель, сёлөн ичөтик зепсыс кыскис куригчан вөсни бумага.

— Мый видзөдан? Төдмалін? Валя мөдөдіс. И со ещө,— гимнастёрка зепсыс кыскис пелькиник тубрас, разис сійөс. Сэні вөлөма шөвкысь вурөм да вышивайтөм жө носөвик. И пыр жө вөр пуяс костын мылаа паськаліс сёлөн ён гөлөсыс.

Гена синъясын вөлі сы мында шуд! И первойысь лоис завидь,

мый война выло мунігөн некод эз гөгөрво козынавны меным со татшом неыджыд чышгъанторсö.

**...Сколько заветных платочков
Мы сохраняем с собой!
Нежные речи, девичьи плечи
Помним в страде боевой.
За них, родных,
Желанных, любимых таких,
Строчит пулемётчик
За синий платочек,
Что был на плечах дорогих...**

Гена, Валялысь чышгъансö виддалігмоз, сьыліс и сьыліс. А ме куритчи. Табаклөн лöz тшын кольчаяс сайысь аддзи неуна водзлань былькнитчöм руд сингъяс, ичötик юр выло венеч моз гартыштöм неуна рыжöй рöма көсаяс.

— А-а... Со көнöсь найö!— сувтис мян водзö пошиктысь Бойцов.— Быдлаысь нин корси. Бытгö му пытшкас вöйöмаöсь. Бур, мый сьылöмнытö кылі. Старшина ёрт, позьö тیانлысь гартыштны? Ок, көрыс кутшöм! Верст джын сайсянь пакйö!

— Боец Бойцов,— юалис Юранёв,— мыйла ыстисны тیانöс? Колö вöлі доложитны.

— Мыжа, старшина ёрт,— устав серти нюжöдчис Алексей.— Медсестра Огнёва тшöктис пырысь-пыр корсьны сержант ёртöс.

— Ясно, боец Бойцов,— нюммунис Гена,— öни верман гартыштны да шпуткыны лözöдтöдзыд.— Сэсся бергöдчис мелань, мудера синмалыштис да содтис:— Аддзан, ачыс корсьö тэнö...

Бойцов нуöдис менö эз перевязочнойö, а операционнойкöд орчча палаткаö. Ывлаысь пырöм бöрын рöмыд палаткаын пöшти немтор эз тыдав, сöмын еджыд халата сестралөн бытгö гипсысь вöчöм мыгöрыс шыбитчис синмö.

— Сержант ёрт, здравия желаю!

Ме уськöдчи тайö гөлöс вылас. И кор сингъяс велалисны палаткапытшкөсса рöмыдас, аддзи Вагинöс. Чужöмыс нюрсмунöма-омöльтчöма, бандзибгъясыс вöйöмаöсь сэтшöма, мый черлыясыс чурвидзисны, та вöсна чужöмыс сьлөн кажитчис ёна паськыд-джыкөн. Сійö куйліс гипсуйтöм коксö нюжöдöмөн, заводитліс чеччыны, но ми Огнёвакöд бөр водтöдим сійöс.

— Сестра висьталіс, тэ пö, сержант ёрт, тані...

Ме пукси Вагин дорö, куті кисö:

— Ёна дойдöма тэнö, другö. Кыдзи нин сэні мян?

— Этшаөн колины.

— Ротной ловгья?

— Колесниковыд?— гажаа нюмдис Вагин.— Командуйтö. Жаль ськöд торйöдчыны. И Аралбаев дзоньвидза. Сержант ёрт, флягаын менам эмышт... Вай кисьтав кружкаясö. Менö аски татысь көсийны мөдöдны ылі тылö. Гашкö, сэсся огö и адзысьлöй да...

— Вагин, тэныд уна оз позь,— шуис Огнёва.— Колö шойч-чыштны операция бöрад. Вай ме ачым кисьтала тیانлы.

Надя босьгис фляга да быд кружкаö сэтысь сөдзöдыштис неуна.

— Ёртгъяс пуктисны туй выло. Сестра, колö ва: тайö чистой спирт.

Бойцов уськөдчис вала. А ме заводиті восьтыны финкаөн консерв банка, кодос мыччис Огнёва Вагин мешөкысь жө.

Бойцов вайис чайникын ва. Огнёва өлөдис миянос, медым эгө ёна вольничайтө, эг мешайтчөй орччөн куйлысь сьөкыда жө ранитчөм боецлы, да петис палаткаысь.

— А тэ, Юра, видзөда да, шылялөмыд тани!— кружкаяс ректөм бөрын шыасис Вагин.— Абу дивө. Пөшти нин төлысь коли сийө кадсянныс, кор ми торъялим.

Вагин көть эз и казътыв, но казялі сълөн шогөн тырөм синъяс серти — мөвпалө Сметанин йылысь.

— Да, оз тырмы ещө өти кружка,— ышловзи ме.

— Юр, гижлин та йылысь гортсаясыслы? Юөртлин? Ме сідз жө... Вочакывйис тай сөмын эз волы-а. Тыдалө, эз на удит. Вочас частьө, а ме сэн абу нин.

Медым кеждоны сёрнисө мөдлаө, юалі Вагинлысь, кызимый лои менам ранитчөм бөрын.

— Эн на өд вунөд, көнкө, сэкса атакатө?— курыда нюмдіс Вагин.— Сийө тшаква на. Ок, и дзескөдліс бөрас миянос!..

Чорыда жө, тыдалө, сюрлөма ёртъяслы, сийө бойсө кө Вагин лыддьө кокныбдөн.

И вөвлөм серпас сувтис син водзө. Руд асылө, Сметанинос гуалөм бөрын недыр мысти, өтлаасим асланым йөзкөд. И кутшөма жө кутис налөн дивөыс, кор аддзисны миянос. Лыддьөмаөсь нин кулөмаясөн. Унаөн, дерт, эз вермыны видзөдны миян синъясө: йирис сөвествыныс пышйөмсьыс.

— Кыдзи ті петінныд кытшсьыс?— юаліс старшөй политрук Левада, коді өні вөлі батальонса командир пыдди. Штабсьыс сийө өтносөн спаситчөма: бомбитигас вөлөма курсантъяс пөвстын.

— Эз удитны дзикөдз кытшавны,— висьталіс Колесников.— Войыс мешайтис. А югдытөдзыс бөрынтьчим: патронъяс эз кольны.

Левада тшөктис сувтны миянлы стройө. Колесниковөс артавтөг вөлім сизимөн. Ми сулалім пельпомъясананым өта-мөднымөс кыліг, сьөдөсь, няйтөсь, оръясьөм паськөмаөсь, но сулалім юрнымөс вывлань чатөртөмөн. Курсантъяс пиысь унджыкыс эськө өні сетисны олөм джыннысө, медым веськавны тшөтш миян пөвстө.

— Ёртъяс!— шыөдчис курсантъяс дінө Левада.— Со тайө сизим мортыс, кодъясөн командуйтис младшөй лейтенант Колесников, төрыт сувтөдісны врагөс, эз лэдзны сийөс вөчны водзө ни өти шаг. Не кө найө, делөыс вермис артмыны лөкджыка. Эска, мый талун ті ставөн лоанныд на кодьөсь.

Оз позь вунөдны, кутшөм синъясөн видзөдісны миян вылө курсантъяс. «Ми нө омөльджыкөсь али мый?»— позис лыддыны быд чужөм вылысь.

И найө збылысь петкөдісны, мый абу омөльджыкөсь, кор дас минут мысти заводитчис наступление. Цепь вөрзис местасьыс чөла. Курсантъяс мунисны өта-мөдсө син увсьыс воштытөг, противогазъястөг, медым немтор эз мешайт. Васөда югнитыштавлісны штыкъяс, кустъяс вылысь киссьысь лысваөн көтасьөм каскаяс. Мунисны тэрыба, но лөня. Но век жө корсюрө укшальджык мортлөн кокъяс улын трачкакывлісны увьяс. И сэки кывліс отделеннойяслөн либө взводнойлөн гуся гөлөс:

— Видзөд кок улад! «Найөс» колө суны сөйиг-юигас на.

Бөрө колины то нюрзём местаяс, көні ми воялім небыд нитш пытшкө пөшти пидзөсөдз, то кос вөр діяс, көні сука быдмисны пуяс, то баддён тырём видз модаа неыджыд кушинъяс. Нюр, вөр, кустъяс...

— Сержант ёрт,— шыасис Аралбаев, коді восьлаліс мекөд орччөн,— кызди тани йөзыс олоны? Колө керавны пуяссө, косьтыны нюрсө. И сэки лоас паськыд-паськыд степь. Пуксы вөв вылө да скачит. А өні со тувччан вылө, а воан улө, тувччан улө — воан вылө.

— А кор нө тайос вочам?

— Дерт, өні некор, вот помасяс война...

Друг матын эрыштчис немецкөй пулемёт, сэсса кутіс тэрмасьомөн помала кисьтны-увтны, тыдалө, водзын мунысь миян разведчикъяс зурасисны немецъяслөн боевөй охранениекөд либө секретъяскөд.

— Водзө!— кыліс Колесниковлөн гөлөс.— Котөрөн!

Өні некод нин эз видзөд кок улас, дзебсаясны вөлі весьшөрө: гөгөр шутлялісны пуляяс да потласисны пуясө, кустъясө зурасьом бөрын — немецъяс лыйлісны разрывнөйясөн. Та вөсна кажитчыліс, быттьө миян бөрвылын локтө автоматчикъяслөн цепь.

— Водзө!

— Водзө!— курсюрө горөбтылісны курсантъяс өта-мөднысө ышөдігтырайи.

Ляпкыдик вөр помасис, и ми аддим «найөс»... Некымын дас немец котөртисны неылын сулалысь мөд вөр ділань, зілісны воөдчыны сэтчө, медым сайөдчыны водзвыв лөсьөдөм окопьясө.

— Со найө!— чипөстіс Аралбаев.

Курсантъяс нетшыштчисны места вывсыс. Найөс эз сувтөдны ни водзын, ни бөрын потласысь минаяс, ни кысянькө шуйгавывсянь тэрыба увтчысь пулемёт. Вывті нин ыджыд лөглун өзйис морөсъясын, окота вөлі косөдны водзөс төрытъя лоөмторсыс. Ме видзөдді бөрвылө: кольчысыяс эз вөвны, не кө артавны Колесниковөс, коді сьөкыда котөртис аслас связнөйыскөд орччөн. Кысь нө олома мортлы вөтчыны том йөз бөрся!

Водзө ставыс артмис син лапнитмөн моз өдйө. Немецъяс гөгөрвоисны, мый налы не воны вөр діөдз, көть эськө сійө вөлі матын. На пиысь унджыкыс бергөдчисны миянлань чужөмөн, но вөлі нин сёр. Водзынджык котөртись курсантъяс сорласисны накөд...

Тайө здуксяныс ставыс гудыртчис. Морөсысь петіс курыд лов шы, а сьөлөм сідзи и чеччис. Водзвылын руд нисьө веж рөма курткаа паськыд мыш. Ме гөгөрвоа: сүөдны ог вермы, а жаль, вывті жаль... И сэки уси дум вылө, мый кийн дас зарада винтовка. Со кыз, вөлөмкө, колө. И звук мысти нин чеччышта пласьтвидзысь-куйлысь немец вомөн, кодлөн кабыръясыс тэрыба шамралөны-парсалөны мусө.

А со и вөр ді. Чеччышта вөсни кызьясөн эжөм стенъяса кузь окопө, водзвылын чирзө Аралбаев, киас сылөн лөсталө сапёрнөй ичөт зыр, а сысянь шаг куим ылнаын ризөдө немец.

Курсантъяс чеччалөны окопьяс вомөн, котөртөны водзө, кытчө бөрынтьчө враг. Накөд Колесников. Сійө сувтовкерө, сьөкыда лолалө, но чужөм вылас оз төдчы мудзлун.

— Зарубин! Весалöй тайö траншеяссö. Сэсса отсалöй артиллеристъяслы, натöг ми нинöм огö вермöй вöчны, кор матыстчам прöтивниклөн миномётнöй позицияслань. Татысь ставыс эз пышйыны... Зэв нин виччысьтöг ми вувзысим на вылö. Но смотри! Мед пленнöйяс вöлины... Эн вунöд — ми Краснöй Армия!

Кор ми уськöдчим весавны траншеяяс, öти чукыль сайсянь сяркнитис автомат, сэсса мöд. Веськыд пельпомö быттö сötисны зорйөн. Ми лажынтчим ляпкыдик окопö, дзебсим бруствер сайö. Вагин шыбитис лимонка. Взрыв. Чепöсйим. Чукыль сайысь шатласигтыр кыпöдчис вирöсь чужöма немец, а мöд куйлис сы кок улын, траншея пыдöсас чукöрмöм трунда сора ваас. Вагин ырыштчис штыкнас, но ме удити кватитны винтовкасö шуйга кйөн, веськыдыс лётмунис... Сэк жö Аралбаев зяткис кулакнас немецлы черлыас, сйö лёздис-усис пидзöс вылас.

— Дугдöй!— равöсти ме курсантъяс вылö, кöть эськö и аслым зэв окота вöли лöсыштны фашистлөн ныр-вомö. Но та пыдди ме отсалі немецлы сувтны кок йылас. Сылөн няйтөн резсьöм да кельдöдöм чужöм вывсянныс видзöдисны коль кодь синъяс, повзöмысла найö весиг эз лапъявны.

— Весьшöрö кутин, сержант ёрт,— мурчнитис пиньнас Вагин.

— Сйö виис Сергейöс,— чирзис Аралбаев,— а тэ жалитан... Кымынöс виисны, кымынöс калечитисны, а тэ жалитан!

Чукöстi олöма боецöс, тшöктi сылы нуöдны пленнöйöс батальонса штабö. Боец йöткыштис немецöс штыкнас, индис, кодарö мунны, но мöдыс бара лэччысис пидзöс вылас да, ас ногыс мыйкö боргигтыр, кутис кыссыны мелань. Вöли гөгөрвоана: полö лыйлöмысь, кевмысьö.

— Кор бöжтö топöдисны, камрадъясөн, небось, лоим!— век на скöраліс Вагин.— Нуöдöй öдйöджык, зывök видзöднысö, а то сы вöсна ещö трибуналö веськалан.

Траншеяяс да ляпкыдик блиндажъяс видлалöм бöрын сэтысь некодöс нин эг аддзöй. Мöдöдчим артиллеристъяслы воча. И сэки Вагин повзöмөн индис пельпомö:

— Ставыс вир, и соскыд тшöтш...

Сöмын öни ме кутi кывны пельпомысь дойсö. Пöрччи гимнастёркаöс.

— Пыран туйыс эм,— чуймис Аралбаев,— а петаныс абу... Кытчö нö вошöма пуляыс?

Найö тöбисны пельпомöс бинтөн, гимнастёркаöдисны.

— Со и торъялам сэсса,— ышловзис Алим.— А тэ жалитин фашистсö...

— Татшöм рана вöснаыд оз на ков мунны некытчö,— зили нюмунны ме, кöть эськö збыльысьсö эз вöв сэтчöдз. Пельпомöс кутис чишкавны-сотны.

— Юра,— шога артмис Вагинлөн,— гашкö, кежан санчастьö? Пöсьвывысьыд оз доймы, а бöрынджык пöгибö воан.

Но ме эг вермы кольны найöс. Колö вöли пöртны олöмö ротнöйлысь приказсö, отсавны сорокапятчикъяслы. Артиллеристъяс буретш лöсьöдчисны вуджöдны ассыныс дженьыдик ствола пушканысö траншея вомөн.

— Эн лэпты буссö, пехота!— нерыштис найöс Вагин.— Марш дырйиыд небось тшапöсь, а дзескöдас кö: «Мезды, пехота-матушка».

— Мый сирасин?— дѳзмис расчѳтса командир, сѳдѳник юрсиа да мугов чужѳма старшѳй сержант.— Асьным кыскам, сѳмын отсыштѳй траншеясѳ вуджны.

Котѳрѳн воис батальон штабса связнѳй да тшѳктѳс сувтѳдны пушкасѳ неылын тыдалысь туй бокѳ, кытѳ вермасны уськѳдчыны миян тылѳ немецкѳй танкъяс.

Кор ми воим места вылѳ да заводитѳм артиллеристъяскѳд ѳтвылысь тѳрыба лѳсьѳдны огневѳй позиция, локтѳс старшѳй политрук Левада. Вѳлѳмкѳ, ыстѳмаѳсь выль комбатѳс, а сѳйѳ бара нин комиссаралѳ. Левада, тыдалѳ, ранитчѳма: юрсѳ гартѳма бинтѳн, фуражкаыс ѳдва ѳшйѳма балябѳжас, муртса оз усь. Кодкѳ вѳйис сылы ассыыс каскасѳ, но Левада эз босыт.

— Розя пѳрттѳ немтор жалитны. А тѳныд сѳйѳ стѳдитчас на.

Сѳсся висыталѳс, мый батальон мунѳ водзѳ, босытѳс нин немецъяслысь миномѳтнѳй позицияяс, матыстчѳ Л. посѳлоклань. Но сусед кольччѳ. Та вѳсна фланг видзѳм могысь, медым татѳ туй кузяыс эз суйсыны прѳтивниклѳн танкъяс, ковмис сувтѳдны ПТО-лысь некымын расчѳт. Мыйѳн сусед вѳрзьѳдчас водзѳ, мѳдам и ми.

Водзын гымакыліс бой. Небеса бара тырис «юнкерсъяс» да «мессеръяс» шыѳн. Но враглѳн танкъяс эз мыччысьны. Сѳки Левада казяліс менѳ.

— Зарубин, шагом марш санчастьѳ!

— Гвардияса старшѳй политрук ѳрт...

— Повторит приказаниесѳ!

Ме кывзыси.

— Абу кѳ ѳпаснѳ, воан бѳр,— нюмѳѳвтѳс Левада.— Сѳмын, гашкѳ, сѳки ми лоам неуна водзынджыкѳсь нин.

Ме очмунѳ Вагинлѳн инмѳдчылѳмысь.

— Юр, некутшѳм танкъяс тѳ ранитчѳм бѳрын эз мыччысьлыны. Кык лун мысти сѳмын волѳсны. Ми сѳтшѳма пыркнитѳм немецъясѳс, мый найѳ бѳрынтчисны ещѳ на верст сизим. Тѳкѳтьѳ эгѳ ѳтлаасѳй ленинградецъяскѳд. Налѳн минаясыс миян дорѳ нин вѳлі усьлывлѳны. Но сѳсся фашистыд вайѳдѳс фронтлѳн мѳд участокысь выль частъяс, танкѳвѳй десантъяс писъкѳдчисны миян мышкѳ да кытшалѳсны, а миян ротаясын колисны дас вит-кызь штыкѳн. Ачыд мѳвпыштлы. Сутки кык дорйысим, виччысим ѳтсѳг, а сѳйѳ эз во. Эз кольны патронъяс, а сѳян-юан да табак йылысь немтор и казътывнысѳ.

Сѳки командиръяс шуисны орѳдны немецъяслысь кѳрт кытшсѳ да ѳтлаасны ас йѳзкѳд. Дыр дасътысисны, весиг терпениеным бырис. Коркѳ сѳсся воис жѳ дыр виччысяна час. Водз асылын ми уськѳдчим куш штыкъясѳн атакаѳ. Мунѳсны ставѳн: и штабнѳй писаръяс, и пѳваръяс, и ездѳвѳйяс. Атакуйтысьяс радын вѳліны и ранитчѳмъяс. Ѳти кывйѳн кѳ, ставыс, кодѳ вермис кѳть неуна легны-вѳрны. А кодлы нѳ окота веськавны вѳрѳг кийѳ? Содтѳд тѳдѳм, мый миянѳс, курсантъясѳс, «найѳ» пленад оз босытны.

Котѳртам атакаѳ, а бѳрвывсянь эськѳ мед кѳть ѳти сорокапятка тьявкнитѳс, сетѳс сѳлѳм. Эз. Артиллеристъяс кыскисны пушка-яссѳ ас вылас миянкѳд орччѳн, видзисны синнысѳ моз медбѳръя снаряжъяссѳ. А друг да уськѳдчасны танкъяс! Сѳѳкыд висытавны

та йылысь. Первойсö зырим бура, а сэсся тай кыдзи сетыштіс миянлы...

И автоматъясысь, и пулемётъясысь, и танкъясса пушкаясысь... Ог помнит, кыдзи ми мунім. Сöмын төдім, мый кольчыны татчö оз позь. И вот сэки кыліс музыка! Смертьлөн лов шы и сьолөмтö кыпöдысь музыка! Вөлөмкө, музыкальнöй взводса курсантъяс абу шыбитöмаось трубаяссö. «Интернационал» ворсігтырйи, копрасьтөг, мөдісны враг вылө... Найö, дерт, ставныс колисны сэтчö...

Вагин пыр топыдджыка и топыдджыка шамыртіс менсьым киöс, сылөн гөлөсыс лоис пыр лөнджык да оръясянаджык.

— Найö колины, а вот миян пиысь унаөн петісны кытшсьыс... Ранитіс менö пöшти ас йöзкөд öтлаасигөн нин. Снаряд торпыригөн.

Висьт помасис. Быдөн олісны чöv.

— Сестра, кисьтав кружкаясас,— бара шыасис Вагин.— Казьтыштам миянлысь музыкант-геройясöс.

Вөлөмкө, Огнёва тані жö. Кор сійö бöрсö пырöма, эг и казьявлы. Вель дыр мөвпалөм бöрын, быгтьö кодлөнкö юалөм вылө, Надя вочавидзис:

— Да, ми сэні коламджык. Колö тэрмасьны.

— Кытчö?— юалис Вагин.— Ме, например, ылі тылө, а тэ, Надя?

— Регыд кывлад,— стрöга шуис Огнёва да петіс палаткаысь.

Меным мыйлакö лоис гажтөм Надя мунөм бöрын, окота лои төдмавны, кытчö сестра тэрмасьö. Вöлі зэв жаль и сійö, мый Гена Юранёв эз кывлы менам ёртъяс йылысь Вагинлысь бөръя висьтсö.


Водзö лоö на.



«Югыд шонді моз меным мыччысьлін»

Мыйкө ёна нин сёрмис таво тулысыс. Апрель төлысь — кос муён шулёмаось — важон коли, а ывла вылын лымйыс — дзонь. Кутшом вөлі тулысыс өкмысдас кык во сайын — вермис эськө висьтавыны менам бать Степан Семёнович (сиктса ногон, Киёнъ Степан). Өд сэки, 1923 вося май 18 лунө, сылөн чужи медводдза пи — Коля. Аслыс батылы сы пөраө вөлі сөмын на дас өкмыс арөс. Но таво гожом тырө нин комын кык во, кыз сийө абу ловья.

Кузь да сьөкыд туй мунис бать аслас олөмын. Сизимдас өкмыс во чөжнад удитлис куимысь гөтрасьлыны, быдтис көкъямыс ныла-пияос. Чужан сиктас, Керчомъяын, ичөтдырйиыс сюрлис и коран мешөкөн ветлыны (быдмөмаось батытөг вит чоя-вока), медводдза колхоз котыртысьяс пөвстын вөлі, 1941 вося октябр төлысьө комын сизим арөсөн мунис тышкасьны вөрөгкөд. Сийө жө төлысьяс веськалис Вөлөгда обласьтса Пришекснинскөй районө. Индисны сапёрнөй батальонө. Сийө кад йывсьыс бать синватөг эз вермыв казътывыны. Тшыг нисьө пөт, оборонительнөй уджъяс вылын. Сетоны вөлөм нормаон нянь да табак. Бать миян некор эз куритчывлы (да и пияныс тшөтш) да куритчансө вежлалис сёян вылө. Тайө и отсалис ловйон кольны. Шекснаас сы мында йөз тшыгла кувсис, мый страк босьтө казътылигас.



Май төлысьө бать сьөкыда висьмис. Кызь лун куйлис госпитальын, а сэсся лэдзисны гортас. Куломдінса райвоенкоматлөн комиссия сетис бурдөдчан отпуск. Но и сэки кадсө эз прөста колляв, уджалис Керчомъяса вөр кылөдан участокын дистанционерөн.

Май төлысьө бать сьөкыда висьмис. Кызь лун куйлис госпитальын, а сэсся лэдзисны гортас. Куломдінса райвоенкоматлөн комиссия сетис бурдөдчан отпуск. Но и сэки кадсө эз прөста колляв, уджалис Керчомъяса вөр кылөдан участокын дистанционерөн.

Август 8 лунө бөр бергөдчө Вөлөгдаө, көні велөдисны вөдитчыны-луйсьыны 45 миллиметра пушкаөн, а сэсся веськалө Волховскөй фронт вылө, отдельнөй истребительнөй противотанковөй дивизияө, 58 бригадаө. Олоны Шарья сиктын. И сөмын 1943 вося февраль өтикөд лунө нуоны фронт вылө. Батыс индөны орудиеса командирөн. Февраль 14 лунө медводдзаысь пөтөны косьө Макарьевскөй пустошь горулө. Бөрынджык видзөмаось Назия ю вомөн нюжөдчөм көрт туй пос.

1943 вося июль 22 лунө Волховскөй фронт пасьтала заводитисны зырны фашистъясөс. Батылөн батареяыс босьтис Тортоло-

во да безымянной высотаяс. Тайо кояс батлөн орудиес пась-
вартис куим станковой пулемёт, сотис оти землянка, сувтөдис-
жугөдис оти танк да 82 миллиметра миномёт. Тайо тышсыс
батылы сетисны «За отвагу» медаль. Тайо ыджыд салдатской
награда.

Тöлысь мысти боевой задание дырйи бать сьокыда ранитчис
юрас. Фашистской снайперлөн пуляыс жугөдис черлысö. Бать
миян вöли зэв шмонитысь, оптимист, и со кызд сийö висьталис
миянлы та йылысь. Веськалöма 4263 номера госпитальö. Мөд
лунас воöма ас садяс. Гөгөр пö пемыд, но надзöникөн кодкö
ворсö баянөн и сылö «Играй, мой баян». Ме пö думайта, ра-
йö, тыдалö, веськалi. Сöмын пö райын вермасны татшöм мича-
атö сьывны.

Матö тöлысь куйлөм бöрын нуасны Бокситогорск карö, 3412
номера госпитальö. Танi бара кольö тöлысь. Свердловскын нин,
1710 номера госпитальын ноябр 16 лунö вöчасны операция:
вылыс черлы торпыригсö идраласны да лöсьодасны протез улö.
И сöмын 1944 вося январ 23 лунö пуктасны протезсö.

Февраль медводдза лунö бать петö госпитальысь и мөдөдчö
гортас. Свердловскын поезд вылö веськалö сöмын февраль кой-
мөд лунö. Кировö воö ыджыд температураөн, поездсыс петкө-
дасны нөсилкиөн, а көлуйсö да гын сапөгсö колясны вагонас.
Кировсянь Котласөдз воас көмтөг и сөйтөг. Но Котласын бура
примитасны, и бара водзö. Айкатылаын сутки олас раненöйяс
керкаын, а сэсся нель сутки больничаян. Водзö кыткö подөн,
кыткö вöла-доддьөн, кыткö машинаөн февраль 17 лунö воö
Сыктывкарö. И сöмын февраль 24 лунö воö чужан сиктас —
Керчомъяö.

Коймөд гөтырыскөд, менам мам Фёкла Николаевнакөд (кув-
сис 2002 вося апрельын), чужтисны да быдтисны нель чоя-вокаос.
1957 воын квайт тöлысь чөж бать куйлис Калининградса гос-
питальын. Вылысь вöчисны чужöмсö.

Сöмын тай дженыд вөлöма нэмыс медводдза пиыслөн —
Николай Самаринлөн. Кызь аросөн, сьокыда ранитчөм бöрын,
кулöма госпитальын 1944 вося февраль 14 лунö. Дзёбмаось

ИЗВЕЩЕНИЕ

Ваш сын сертификат № 81031, 5^а
(Муж, сын, брат, военно-зачине)

Самарин Николай Степанович
(Фамилия, имя и отчество)

Уроженец Читинской области, р-н
с. Керемля, Иволга И.В.Р.

в бою за Святили тачанку Родану,
и воинской прилеге, проявив героизм и мужество, был
ранен и от ран умер 14 декабря 1944 г.
(убит, ранен и умер от ран)

Похоронен Наличинская обл.
Вудинской ст. севернее д.о.и д. Зудило

Настоящее извещение является документом для возмещения
ходатайства о пенсии (приказ НКО СССР №)

Усть-Куломский Райвоенком

Капитан Иванов (ФЕДИНОВ)
к.п. Иванов

Калининскöй (öни Тверскöй) обласьтса Новосоколинскöй районын, Пахомов грездянь неылын.

Вай жö бөр бергöдчыламöй комынöд воясса Керчомъя сиктö. Бать казьтывліс, мый гожöмъясын, каникул дырйиыс, Николай вок уджавлöма колхозын да ёна радейтлöма ноксыны вöвъяскöд, сиктса быд вöвлысь тöдлöма нимсö. Сёрöнджык гижлöма весиг «Чибук» кывбур, кодöс йöзöдлöмаöсь 1941 воö «Ударник» журналлön витöд номерын:

Гуляйт, Чибук, берег пöлөн,
Чöскыд турун йир.
Зарни бурьысь öвгчö тöлөн,
Ворсö тэнад вир...

Ёна радейтлöма и лыддысьны, а сэсса дзöляджык ёртъясыскöд юксьылöма тöдмалöмторнас. Николай Егорович Кочанов, учёной, профессор, коді сідзжö чужліс да быдмыліс Керчомъя сиктын (кувсьöма нин), казьтывліс, меным пö ёна кажитчывліс öти висьт, кодөн тöдмöдліс вокныд — миян ыджыдджык ёрт Коля Самарин. Босьті пö небöгсö библиотекаысь, окота лои выльысь аслым лыддыны да, а сэні джын висьтыс абу, мый сійö миянлы висьтавліс. Сідзкö, лыддигмозыс вокöй ачыс содталöма-лöсьöдлöма.

Ёна бура ворслöма и гудöкөн, а бöрынджык — баянөн.

Керчомъяын сизим класса школа помалöм бöрын велöдчис Ульяновоса сельхозтехникумын. Первой восö вöлі комсоргөн, мöд курсын нуöдис литературной кружок. Тані жö паныдасис медводдза и медбөръя муслуныскöд — Настякöд.

Николай ёна көйис пырны Коми пединститутö и 1940 вося сентябрын сдایتалö экзаменъяс, лöö литературной факультетса студентөн. Но октябр тöлысьын нин морттö суö шог юөр. И оз сöмын сійöс, тшöтш и ёртъяссö. Со некымын юкөн бура кузь писъмöысь, кодöс вок гижö батынымлы 1940 вося октябр квайтöд лунö. Гижöма рочөн:

«Добрый день, дорогой отец!

Разрешите написать несколько слов!

Вы, наверно, слышали или видели, что пишут в газетах. Теперь, с 1-го ноября 1940 г., не будут платить стипендию. За учёбу будут брать деньги 300 рублей за год. Таким образом, надо будет учиться на свой счёт, кроме того, платить, как и раньше. Этого правительство и партия сделало не только в нашем высшем учебном заведении, а по всему СССР. В постановлении С.Н.К. от 3-го октября говорится, что материальные условия трудящихся СССР улучшились и они своих детей уже



могут учить и содержать. Не только я, но все почти плачут...»

Велөдчыны көсйөмыс ёна ыджыд вөлөма воклөн. Водзө сійө гижө: «...Я со своей стороны вот что смогу делать: неустанно работать и учиться! Я за один месяц 100 рублей всегда смогу добыть, хоть зубами и ногтями. Буду писать заметки в газеты, буду писать стихи. Вечерами работать физически...»

Батьыс мый вермис отсаліс. Тшөкыда ыстывліс деньгатө да и сёян-юана пöсылкаяс. Онөдз на гортын, Керчомъяын, видзöны сьом ыстан квитанцияссө. Бать миян вöлі зэв төлка да идөра и кужис видзны колана кабалаястө морт ногөн, мед миянлы, челядьыслы, кольны казтылөм вылө.

Вок збыльысь пиньнас и гыжнас кутчысис велөдчөмас. А кывбурьяс гижис да йөзөдліс сельхозтехникумас велөдчигөн нин. 1940 вося «Ударник» журналын печатайтөма Николай Самаринлысь некымын кывбур. Помасьöны гижөдъясыс 1941 вося медводдза да витөд номерьясын челядьлы кывбурьясөн. («Коді мыйөн» кырымалөмаөсь Ананий Прокопьевич Размысловкөд кыкөн).

Помасьöны... Великой Отечественной войнa торкис оланногсö став советской йөзлысь. 1941 вося арö Николай лэччө карö велөдчыны мөд курсын, но найөс, тыдалө, медводдза лунсяныс ыстöны отсасыны кылөдчысьяслы. Воклөн важиник блокнотысь лыддя: «1941 вося сентябрь 7 лун. Часово. Моль бөж». Но томлуныд томлун и эм. Николай мөвпалө аслас муса ныв йылысь да блокнотас ёна черкйөдлөмөн чужтө-бөрийө татшөм кывьяс:

Эн көть радейтны менө тэ кужлы,
Эг ме кыйлывлы меліджык кыв.
Лөглун сьөлөмам некор эз чужлы,
Откодь муса тэ век, зарни ныв.

Война пансьөм бөрын, кор пöрысь и том сувтисны дорйыны Рөдинанымөс, Николай эз вермы пукавны да велөдчыны, сьөлөмыс тшөктіс петны враглы паныд. Октябр 24 лунө Сыктывкарын сійө вөчө блокнотас медбөрья гижөд и бара жө — муса нылыс дорө шыөдчө:

Оз ков, Настя,
пыдди ставсө босьтны,
Унатор зэв овлывлө и оз.
Ог өд прөста сьөлөм
ассьым косьты,
Ог өд радейт тэнө
дуригмоз.

Мөд лунас, водз асылө, петө кузь туйө, гортланьыс. Асылыс вөлөма көдзыд. Лунтыр усьөма слөт да лым. Көрткерөсө воөма вит час рытын, вөзйысьөма узыны. Лэдзөмаөсь, но муздөм том морттө абу весиг вердыштөмаөсь. Аскинас, Важкурья прөйдитөм бөрын, паныдасьөмаөсь батыскөд, коді сиктсаясыскөд вөлі мунө фронт вылө. Тайө аддзысьлөмыс ая-пиалөн вөлі медбөрья.

Бур кывйөн казтыштө Вомын сиктысь «Ён вын» колхозса

предлысь гөтырсө, көні вок коллялөма мөд войсө. Туй мортто вердөмаөсь. Ёна юасьөмаөсь. Челядьыс вөлөма уна да, вок колөма налы куим метр сатин, кодөс босьтлөма карысь аслыс дөрөм вылө.

Коймөд войсө узьөмаөсь Аныбын. Пөддельнойын сюрөмаөсь тшөтш кайысьяс. Сэні туй йөзтө вердөмаөсь и юкталөмаөсь бур йөзыд.

Ставсө тайөс ме төдмалі Николайлөн важиник блокнотсыс, кодөс меным козьनावліс бать.

Гортас воөм бөрын вок пыраліс недыр кезлө школаө велөдны, но том сьөлөмыс корис сійөс тышө, тшөктіс батыскөд орччөн дорйыны Рөдинасө, и 1941 вося декабр төлысьө муно доброволечөн фронт вылө. Служитіс сійө 28 Невельскөй дивизияса 112 артиллерийскөй полкын. Вөлі сержантөн, стрелок-радистөн. Ая-пия кутөмаөсь йитөд, письмөасьөмаөсь, но сөмын медбөрря письмөсө бать вермөма нуны би пыр да вайны гортөдзыс. Тайө — батыслөн юөр вылө вочакыв:

«Здравствуй, дорогой папаша! Разрешите поделиться моей радостью, которую доставило мне твоё письмо.

Я писал тебе больше двух десятка писем, но ответа на них не получал;

Я был крайне встревожен твоим молчанием. Я думал, что ты не выдержал и случилось с тобой несчастье.

Но к счастью моему, это не так. Живу хорошо, здоровье приличное. Папаша, меня вторично представили к награде орденом Славы. Вообще, бил немцев хорошо.

Я прошу Вас получше следить и воспитывать моих братишек, когда вернётесь домой.

Я буду с мужеством и бесстрашием биться с немецкими извергами. Отомщу им за твою рану, за твою кровь, за все их злодеяния. Мой адрес на конверте, Полев. почта 81031.

Желаю быстрее выздороветь.

Твой сынишка Коля!

25-го декабря 1943 г.

Н.Самарин.»

Но... төлысьөн-джынійөн мысти сьөкыд ранаясысь кувсьө, и өнөдз кольө ставыс төдмавтөг. Уна во сайын шыасьлі республикаса военкоматө, но некутшөм вочакыв эз воны.

Ме думысь, Коля вок гижліс таdzi батыслы, медым кыпөдны сылысь ловсө тайө сьөкыд кадас. Шыөдчө корөмөн: бура быдтыны да воспитайтны посни вокьяссө — Федяөс да Василийөс. Федя вок өні на олө Керчөмъяын. Сылы нин 82 арөс. Гөтырыскөд, Анна Михайловнакөд, чужтісны-быдтісны вит ныла-пияөс, шань, мывкыд йөзөс.



Вась вок кувсыліс сьёлөм висьомысь 1993 вося май тöлысьö. Усьöм вокыс моз жö сійö зэв бура сьыліс да ворсіс баянөн.

Да, ёна радейтлөма олөмсö Николай Самарин, абу вольтөм вылö мунлөма фронт вылад. Со кызди сійö шыödчөма мамыс дінö:

Муса мам, тэ ме вöсна эн шогсы,
Курыд синва сыркъяліг эн кисьт.
Эн шу сідз, мый, пиук, тэнад локсис,—
Пуля менам кучик пыр оз письт.

А мамыс, батылөн медводдза гөтырыс — Лидия Ивановна Самарина — кувсис война кадö карса больничаян пиыслөн усьöм йылысь нинөм тöдмавтөг.

Муса нылыс, Настя, Кулөмдінын петалис верöс сайö, лөсьö-дісны челядь. Но верöсыс вөлөма зэв вежөг, да юксылөмаөсь.

Школаын велөдчигөн на ме төдмасьлі Настяыскөд (воліс Керчомъяö батынымöс видлыны). Сэки висьтавліс, мый воклысь кывбурьяссö да письмөяссö сетіс архивö, но ме эг куж на сэки спуги юасыны, кытчö, да öнөдз на аслам эновтчөмла эг некытчö шыасылы. Настя Липина (верөссияныс овыс) медбөрья лунъяс-өдзыс сьыліс Кулөмдінса ветераньяслөн хорын.

Тайö мича нывбабаыслы, воклөн медводдза и медбөрья мус-луныслы сиөм кывбурнас и помала Самаринъяс йылысь гижөдөс.

Настялы

Югыд шонді моз,
Зарни нылöй, тэ
Меным мыгчысьлің.
Рыгья кыа моз
Менам син водзысь
Кусін, саялің.
Көдзыд асылö
Сьёлөм дінсьым тай
Жбыргин кытчөкө...
Эн мөй думыштлы,
Сөкөл-птицаөй,
Асья көдзыдсö?
Эн мөй думыштлы
Менсьым, ныланöй,
Шөгсö-печальсö?..

Снимокъяс вылын:

1. Степан Семёнович Самарин (комынөд вояс).
2. Николай Самаринлөн война вылын усьöм йылысь юөр.
3. Николай Самарин пединститутын велөдчигөн (1940 во).
4. Степан Семёнович (шуйгаладорас) Фёдор (шöрас) да Василий пияныскөд.

Снимокъясыс Е.С.Самариналөн гортса архивысь.



Победа лун некор оз вун

*Важсö тöдысьлы выльыс бурджыка
тыдалö да водзö олöмыс петкöдчö.*

Коли сизимдас во Ыджыд Победа лунсянь, но кадыс некор оз вушты ичöт и верстьö войтыр паметгысь сийö пемыд вояссö. Быдöнлы, кодi прöйдитiс сьöкыд фронтöвöй туйяс, кодi уджалiс тылын да матыстiс Победа — сийö кадыс век кежлö кольö сьö-лöмас пыдi вурысöн. Ыджыд аттьö Айму дорйысьяслы да ты-лын уджалысьяслы, кодлөн нимгьясыс нэм кежлö лоöны миян паметгын.

Немечкöд пансьöм Ыджыд война ме тöда нель арöссиянь, кор тышгяс мунiсны мöдöд во нин. Менам вежөрö йиджис Наста баблөн некымын лунся бöрдöм. Верстьö йöз сёрниын кывсис, мый сылөн Иван пиыс усьöма ылыс муясын. Уна сьöд пас колис война, гудралiс йöзлысь олöмсö. Победа лун менам некор оз вун. Бөрдисны-радлiсны вермысьясöс виччысьысьяс, шогсисны верöс да пинысö воштысь ангьяс.

Воысь-во пыр чинö ветерангьяслөн лыдыс. Ловгья Айму дор-йысьясöс кызди вермам видзам, нимöдам Победа лунгьясö. Найö вуджисны тайö повзёодана войнасö, вермисны зэв вына вөрөгöс да кышöдiсны страналысь жуглöм овмöссö. А мукöд странаын талун эм уна йöз, кодгьяс вежлалöны Ыджыд тышлысь збыль историясö. Та могысь öнiя том войтырлы, ветерангьяслөн че-лядь-внукгьяслы колö тöдны да водзö видзны сийöс некор вунö-дöм вылö.

«Колö тöдны олан туй. Колö тöдны, кызди важөн олісны йöзыс, кызди уджалiсны,— гижöма «Далёкое и близкое Сизяб-ска» менам небöгын,— медым том йöз оз вунöдны пöль-пöчлысь традицияс». Книгалөн шөр авторыс Хатанзейский Никон Кон-дратьевич, республикаын нималана журналист, асму туялысь, Айму дорйысь, Отечественнöй война первой да Слава коймöд степеня орденгьяса кавалер. Аслас книгагасын Никон Кондратьевич гижис нин став ёрт йывсьыс, изьватас ветерангьяс, Рöдинасö повтöг дорйысьяс йылысь. Изьва муыс озыр гижысьясöн, да сылөн олан туйыс, слабог, абу жö вунöма. Ыджыд аттьö Сизяб грезд йылысь гижысьяссянь Гликерия Пантелеймоновна да Анатолий Семёнович Каневгьяслы, Сизяб школаса велöдчысьяслы боевöй да уджалан слава музей лöсьöдöмысь. Сэни чукöртöма материал сизябса Айму дорйысьяс, тылын уджалысьяс йылысь, кодгьяс победаөн локтiсны гортаныс, кодгьяс олöмсö сетiсны миян Рöдиналөн водзö олöм вöсна.

Нель вося война дырйи шоглун пырис быд керкаö. Врагкöд тышкасьны Сизябысь мунiсны 517 морт, на пиысь 248 морт усисны фронтгьяс вылын воюйтiгөн да кувсисны госпитальасын.

Война медводдза лунгьясö дас сизим арöса Агния Чупрова чукöртiс школаын велöдчысь ныв-зонмöс, да мунiсны куртны

турун. Турун ытшкан-куртан машинаяс дзоньталісны Семён Фролович Чупров да Константин Яковлевич Самодуров (Кузнеч Косьта). Зорёдасисны школаса велодысьяс Николай Григорьевич Канев да Пантелеймон Григорьевич Калинин. Том нывъяс — Анна Вокуева, Клавдия да Миропия Чупроваяс — мунісны тундра, кордор. Ставон шойччитог уджалісны быд лун. 1939—41 воясө «Трактор» колхозон веськөдліс Василий Александрович Артеев (Олик Вась). 17–18 арөса бригадиръяс Константин Чупров, Ульяна Филиппова, Фекла Артеева, Агния Терентьева, велөдчысьяс да нывбабаяс 1941 вося урожай чукортөм помалісны сентябр 20 лунө.

1942 воын миян сусед, 17 арөса Вокуев Николай Иванович, ас сөгласон муніс дорйыны Рөдина, ранитчыліс, бурдөдчис Будапештын да 1946 воын тышкасис Дальнөй Востокин японечьяскөд. Аддзыліс чептөн дорөм самурай-смертникъясөс, кодъяс харакири вөчөм бөрын дыр, страшнөя кувсьөдчисны. Молдавияын служитөм бөрын Вокуев Н.И. (радист Коль) локтіс Сизябө, Изьва районса юрсиктын сувтөдіс ыджыд керка да гөтырыскөд быдтісны куим ныв, талун найө радпырысь казтылөны ыджыд сьөлөма, кыпыд лола, бур киподтуя батынысө.

Миян семья мөдөдіс фронт вылө сизим дорйысьөс. Мамлөн, Марина Афанасьевна Чупровалөн, вокъясыс — Степан Афанасьевич, Пётр Афанасьевич да Иван Афанасьевич Чупровъяс — тышкасисны врагкөд да вермысьясөн бөр локтісны гортө. Томджык вокыс, Прокопий Афанасьевич Чупров, усис война вылын, дзөбөма ылын Коми мусянь.

Батьөй, Чупров Тимофей Павлович, 1920 воө вөлі гражданскөй война вылын, том красноармеечьяскөд вуджис Сиваш (Сісь море). Перекоп босьтігөн сьөкыда ранитчис, бурдөдчис лунвылын да локтіс Сизябө. Великөй Отецественнөй войналөн медводдза лунъяссянь тышкасис врагкөд, Краков кар мездігөн ранитчис да локтіс гортө 1945 вося сентябрын. Ми Петя воккөд, сәки детсадйө на ветлысьяс, сьылім Айму дорйысьлы, кыдзи помнита, гражданскөй войнаса дальневосточнөй партизанъяс йылысь роч сьыланкывъяс. Нимкодъыд, детсадса зонпосни да воспитатель, Ульяна Васильевна Артеева, роч кыв төдтөг сьылім дас кымын сьыланкыв.



Батьлөн вокыс, Чупров Михаил Павлович, война помас ранитчис, веськаліс госпитальө да локтіс гортас инвалидөн. Сьылысь ичөтджык воксө, Чупров Иван Павловичөс, 1941 вося юнь 29 лунө изьваса райвоенкомат ыстіс Великий Устюгө велөдчыны Пуховичскөй военнөй пехотнөй училищеө. Училище помалөм бөрын Чупров И.П. гижис чойыслы письмө. Талун сө арөса Зоя Павловна (батьлөн чойыс) видзө вокыслысь 1942 вося

ноябр 25 лунö медбörъя гижом писъмöсö, көнi сийö чолöмалö семьясö Октябрса революциялы 25 во тырöмөн. Стрелковöй взводса командир лейтенант Чупров И.П. босътöма удждон да ыстöма Зоя чойыслы 2000 шайт, сы мында жö мамыслы, Чупрова Анастасия Кузьминичналы. Письмöас ни öти кыв абу фронтлөн сьöкыдлунъяс йылысь, помасьö тайон: «Остаюсь жив, здоров, чего и вам желаю». Недыр кад мысти менам бабö Анастасиялы воис похоронка: «Ваш сын Чупров И.П. погиб смертью храбрых». Сыктывкарса 1 номера школа-интернатса «Поиск» клубысь следопытъяс аддзисны Псков обласътса Борки сиктысь Иван Павлович Чупровлысь дзедан гусö.

Журналист Александр Фёдорович Ануфриев помалис ПВПУ 1942 вося май тöлысьын. «Не кланялись пулям» книгаын сийö гижис öтлаын велöдчысь, фронт вылын тышкасьысь ёртъяс йывсьыс, «Поиск» клублөн Боевöй да Трудöвöй Слава комната йылысь. Следопытъяс чукöртöмаось коми пуховчанинъяслысь писъмöяс, фотокарточкаяс, похоронка копияяс. Книгаас тшöтш гижöма изьватас курсантъяслөн фронтöвöй да войнабörся олан туйсö.

1940 воын сизябса дас көкъямыс арöса зонъяскöд тшöтш армияö мунöны Василий Иванович Чупров да воча вокъяс: Василий Егорович и Тимофей Семёнович Чупровъяс. Война заводитчöм бöрын салдатъясöс нуöмаось Латвияö, сөсся Каунас кар дорын найö торъялöмаось. Тимофей Семёнович ранитчöм-бурдöдчöм бöрын локтöма чужан Сизябö, уджалöма избачөн, веськöдлöма культура керкаөн. Бергöдчис гортас и Василий Иванович, бура дыр олис. Сöмын тай эз нин тырмы дзоньвидзалуныс, эз виччысь Победалы 70 во тырöмсö, неважөн кувсис. А Василий Егорович усьöма Смоленск обласътса Десногорск кар дорын. Кольöмвося сентябрын салдатöс аддзöмаось-кыпöдöмаось «За Родину» отрядса корсьысьяс. Сюрöма и медальоныс, көнi вөлöма «Новик Бож, совхоз №3, Чупрову Егору Евграфовичу» гижöда кабала. Сы серти и корсьöмаось рöдвужсö. Бать-мамыс, Александра Павловна да Егор Евграфович Чупровъяс, мунлöмаось овны Печораö. Батьыс кувсьылöма 1982 вося март 3 лунö, а мамыс сё арös вуджлöма, мунлöма таладор югыдысь 1994 воö.

Смоленскса корсьысьяс шыödчöмаось Сыктывкарса «Северная звезда» да «Весна Победы» корсьысян отрядъясөн веськöдлысьяс Ольга Ивашина да Андрей Лызлов дорö, и салдатлысь шойсö вайисны Комиö. Март 11 лунö Василий Егорович Чупровös дзедисны Печора бердса Белый-юын, Ыджыд войнаын усьöмаяслөн гуяскöд орччөн.

Öнi миян медшöр да медыджыд мог — кольны паметъын да видзны водзö Рöдина дорйысьяслысь подвигсö.

Победа лунөн тiянös, войнаса ветеранъяс, тылын Победа матыстысьяс да война воясö быдмысь челядь! Кыпыд лов, дзонь-видзалун да бур шуд тiянлы, Ыджыд Победалы 70 во тырöмөн!

СНИМОК ВЫЛЫН: *Тимофей Павлович Чупров.*



Разведчиклөн туй

Кулөмдинса зонмөс, Иван Михайлович Ногиевөс, война суис ГУЛАГ-ын, кытчө сийө кадө веськавны вөлі зэв кокни. А пуксьөдісны дзик нинөм абусьыс: колхозө сёрөн пырис. Митрей воқыскөд ветлісны Печора вылө, дольнөй пилаөн лэдзисны тьөс да плака, өти кывйөн кө — нажөвитчисны. Локтіс Печора вылысь, пырис колхозө, но бригадир суклялөма, уджысь пө пышьяліс, дыр колхозө эз пыр. Таысь и пуксьөдісны, нуисны кытчөкө Воркуталань, көні буретш көрт туй нюжөдісны. Кыдзи олісны да уджалісны, мый сөйсны сәні заключённойяс, төдса. Иван слабмис, висьмис цингаөн. Сідзи эськө и помасис оломыс да уна мукөдөс моз сөйсны көрт туй насып улө, эз кө пансы войнайд.

Иванлы сәки тыри 21 арөс, буретш ён кадыс.

Сәсся, кор пондісны нин босьтавны фронт вылө, и лагерысь заключёнойясөс мода вылас чукөртісны медкомиссия вылө. Омөльтчөм йөзлөн куш лы да ку, но ёна эз и видлавыны, видзөдласны, тапкасны пельпомад, шуасны: «Годен»,— и ставыс. Нөштә юаласны: «Көсьян Рөдинатө дорйыны?» Он, дерт, шу, ог пө көсйы... Ногиев шыөдчис комиссияса председатель дорө: «Ме Рөдина дорйыны муна окотапырысь, но сөмын оз-ө позь лэдзлыны көть нин лун-мөд кежлө гортө, пөрысь мамөс медбөръяысь аддзөдлыны?» Но өткажитісны: «Войнаыс помасяс да сәки аддзысянныд». «А удайтчас-ө бөр локны?» «Локтан! Тә кодъыс войнаяс вылын оз усьны!»

Өти морт нарөшнө гач пиас прудитөма, петіс комиссия водзад да нюмгялө. А дукуыс! «Не годен!»— шуисны. Петіс коридорө да шуө: «Ме көть гортө вола, семьякөд аддзысьла, а ті сідзи и прөпадитанныд». Код төдас, мый ськөд водзө лои.

Мобилизуйтөмаясөс пуксьөдісны скөт новлөдлан вагонъясө: сөйсны трескаөс моз, мыйта төрисны. Туйын вердісны сола чериөн. Мукөдыс тшыгвывсьыд черитө ёна сөйсны, сәсся, солаыд юктөдө да, ва вылө уськөдчисны. Пыктавыны да кулавыны пондісны. Квайт мортөс сідзи и шыбитісны туй бокө. Печора станция дорын налысь составсө сөйсны тупикө. Лун сулалөны, мөдөс, коймөдөс... Паровозыс пө абу, шуөны. Вагон пөвъяс костөд видзөдөны: керкаяс сулалөны, магазин эм, йөз пырөны-петөны, нянь чөвпанъяс нуөны. А найө тшыгөсь, скөрөсь, фронт вылө нуөм пыдди тупикын видзөны-мөритөны. Вагон өдзөсьяс жуглісны, составсьыд ызөбтісны, здук-мөдөн магазинад нинөм эз коль. И бөр вагонъясө. Та бөрын начальствоыд кватитчис — составтө вохровецъяс кытшалісны, шобисны, но мый нө сәтысь сурас... Мый босьтлісны, ставсө нин ньылыштісны. Өдйө, небось, паровозыд сюри и туйыд прөстмис. Котласөдз эз нин сувтөдлыны.

...Вагонъясысь петалөны, мода-мөдсө усьөмысь кутыштөны,

дзикөдз омөльтчөмаось. Содтөд на и шмонитöны: «Öнi видзчысь, Гитлер! Со кутшöм ён воякаяс локтам тэнö гындыны, вот и пуж тэныд петкөдлам!»

Котласын формируйтисны подразделенияяс. Танi вердiсны лагерын дорысь бурджыка нин, капустаөн да мый да. Витамина сёяннад том йöз öдйö и справитчисны.

Но тылын дыр эз видзны, мөдöдiсны фронт вылö. Сеталисны кузь штыка важ пöлöс винтовкаяс да штрафнöй батальонөн мөдöдiсны мыльк босьтны. Немечыд муö пыдöдз кодйысьбöма, лöсьöдалöма дзотъяс да дотъяс, а бөрвылын — асланым пулемётъяс лöсьöдöмаось. Уськөдчисны атакаö, оз «ура!» горзыны, а маткöны. Немечыд оз узь, гындö и гындö, шырö пулемётъясысь, миномётъясысь, öрудиеясысь. Он, небось, бөр бергöдчы, асланым пуляяс улö сюран. Мукöд вöвлöм фронтöвикыс шуöны, война вылад пöнинöмысь эг повлöй, но, дерт, ставныс повлiсны, сöмын оз быдөн вермы венны полöмсö либö веськыда висьтаваны. Кор атакаö уськөдчан, полöмыд вошö, кулöм йывсьыд некор думайтны, а сэсся, кыз шуласны, кодлөн кутшöм судьба.



Иван тайö тышас коли ловйөн, весиг эз ранитчы. Ловйөн колъысьяслысь киритисны судимосьтсö, сетисны документъяс — найö вермöны воюйтны мукöдкөд öтлаын. Разöдалисны ротаясö да батальонъясö. Тадзи кулөмдинса зон лои 28 стрелковöй дивизияын 144 полкса радöвöйөн. Первой воюйтiс пехотаын, а сэсся вöзйысис разведкаö. Кыйсысь мортыдлы сэнi лои кивывджык.

Велöдыштисны, кызди мортöс шытöг вины, кызди садьсö воштымöныс кучкыны да кöртавлыны, мед ловйөн босьтны сiдз шусяна «язык» вылö.

Командиръясыд первойсö эз жö кужны воюйтнытö, опытыд эз вöв. Мөдöдлiсны языкöс босьтны морт сё кымынöс, сiдз шусяна «бойөн разведкаö». Войнад вуджисны немечладорад, öзталисны, йöйясыд, керкаястö. Öшиньöдыс немечьясыд улыс гач кежсыныс чеччалисны. А пулемётчикъясыс öд оз узыны. Лэдзöны ракетаяс да нöшта на и керкаясыс сотчöны — лун кодъ югыд. Крöшитисны сэнi разведкатö капустаöс моз, джынсьыс этшаджыкыс бöрсö воис. И, дерт, «языктöг».

Сэки командованиеыс и гөгөрвоöма, мый тадзи разведкаад ветлыны оз позь. Ичöтик группаяс вылö вуджисны. Вöлисти «языкъяс» вочасөн мөдiсны воавны. Дерт, кор мойвиас: немечыд абу жö йöй.

Разведкаö ковмылiс мунны шогмытöм лөк поводдя дырйи, кор прамöй көзяин понсö ывла вылö оз лэдз. А разведчикъяслы

татшом кадыд буретш медся бур: пемыд, нином оз тыдав, то-ла, ставыс шувго, шумито. Озджык ков видзчысьны, одйоджык позьо ассыд уджто гартыштны. Оз ко удайтчы да «языктөг» воан, локтан войнас бара ковмас мунны. И сидз водзо, кытчодз ловья фашистос он кыскы. Та борын пыр жо шойччог сетлисны. Землянкаад стокан чистой спиртто клопнитан, да немечыдлон синмыс плешкас кайлас, со по кодьяскод тышо пырөдчим. Став киссьом-ротйысьом паськомто пыр жо вежасны, дзык выльос сетасны, од формаид фашист тылын рушку вылад кыска-сигад регыдон чайыссыо да ниномо воо. Артмас ко, пывсянын мыссыштан, гатшасян нар вылад и... сутки-мод кезло быттьо «кувлан».

Мод луннас разведчикьясос некод оз пальод, узоны став узьтом вой весьтас. И начальство налы нюмъяло, оз чиршодлы, сэки разведчикьяс быттьо нимлунасьысыас. Но кольо лун-мод, и бара лоо мододчыны «языкла».

Враг тылын, мед кольны ловйон, быдторсо лои сейны. Дерт, лягушаос да лекгагийос Иван эз видлы, но вот ежос удайтчылис. Куйлөны отчид ертыскод фашистьясладорын зор му бокын. Луннад нином он вермы вочны, кольо сомын дзедьсысьны, мед эз казавны. Друг кыло: кодко шародчо. Волөмко, еж тупыльтчо. Тупкис сийос боец пилотканас, босьтис киас да видзодо, кызди пемосыд куткыртчис, емьяснас тупкысис. А кынөмыд ена сю-малө. Сатшкисны штыкөн, кос посни увьясысь бипур пестисны, мед тшыныс эз тодчы, да и жаритисны. А госа волөма, сомын сьялодчо би вылад. Видлисны да, зэв на и чоскыдон кажитчис. Муртса быри, мод котортө. И сийос тшотш сейисны. Тшыг кы-нөмыд тай велодас.

Отчид фашистьяслон траншеяын токотьо пом эз во боецлы. Пырисны сэтчо кыкөн, мукодыс вылиас кольччисны. Немечыд-лон ставсо бура вочома, пыдодз кодйома, джуджыд, джоджйома, и оз веськыда мун, а тшуподьясон. Веськыдасо петны он вермы. Сомын пулемет позьяссо лосьодома выло, пос моз сати кайо. Гусьоникон кийодчигмоз мунисны траншея кузя и зурасисны пулеметчикьясад. Шытог вины эз удайтчы, удитис немечыд автоматысь сяркнитны, виис Иванлысь ертсо, но и асьсо суодис пуля. Мод пулеметчикыс уськодчис пышйыны, но коми зон суодис сийос, крукодис, и немеч тювгысис муо. Туплясьоны траншея пыдосас, тышкасьоны. Оружиеыс кытчоко усис да пемыд-над оз тыдав. А немечыс ен веськалома, некыз оз удайтчы одолитны. Модыс вермыны нин кутис, бертовтчис, став тушанас валитчис Иван выло, горшас тшапкысис. Разведчиклон став эбос быри, слабитис, сомын думыштитис: «Эштитис тай, буракө, Миш Вань, тэнад олөмыд». Дугдис лолавны, кияссо уськодис, люсмунис. И ылалис фрицыз, эскис, мый джагодис Иванос. Лэдзис кабырсо да надзоникон кыподчис борынтчигмоз, а кияссо водзас кутө, век на полө. Тайо здукас разведчиклы ки улас и сюри пистолетыс. Кватитис сийос да став вынсьыс, мый колис, колкис фашистлы косичаас. Каскаыс тышкасигад сылон вошө-ма жо, юрыс куш, и веськалис лосьыда. Сутшкысис муас немеч, Иван тэрыба кортавлис сийос, вокас тойыштитис кляп, а лэптыны траншеясыс оз вермы. Лои городны вылиас кольччөмаяслы:

«Татчө, татчө!» Кылісны, кыпөдісны көрталвөм фашисттө, а Иван коли, и петны оз вермы.

А немецьяс траншея мөдар помас дзик нин матын увтчөны ас ногыс, кылө, котөрөн матыстчөны. Кыптіс тревога, сынөдас качөны ракетаяс, сяргөны пулемётьяс. Сэки зон котөртис траншея кузя и, шудыд вылө, пулемёт позъяд веськаліс, кайис тшупөдьяс вывті да кыссис ас йөз бөрся.

Вежон та бөрын сёрнитнысө эз вермы, сымөть шамралөма фашистыд горшсө. Наградитисны зонмөс тайө операциясы «За отвагу» медальон. А сылы, коді кыскис языксө траншеясы, вичмис Гөрд Знамя орден. Эз төдны, коді немецсө кутіс да көрталвіс, весиг сувтөдісны разведчикьясөс стройө да тшөктисны пленнойлы петкөдлыны босьтыссьсө. И төдіс өд, көть и пемыд вөлі, со тайө мортыс пө менө гартіс, Иван вылө петкөдліс. А документьясыд наградаяс вылад мунісны, найөс он нин веж. Сэки Иван шуис: «Ог орденьяс понда воюйт, Рөдина вөсна!» Вот пө молодец, ошкыштисны боецөс командирьяс.

Веськавліс разведчик шойччан керкаө, мөдөдлісны дас лун кежлө бура служитөмысь. А мый сәні вөчан? Лунтырьясөн өд он куйлы, көть эськө и лөсьыд небыд вольпаяс, сөстөм прөстыняяс вылад нюжмасьнытө. Öд важөн нин та йылысь вунөдліс. Дерт, вөліны и нывьяс персонал пөвстас, но на дорын мукөдьяс нин гартчисны, нинөм и мөвпавнысө. Дзик гажтөм босьтіс. И локтісны видлыны салдатьясөс кутшөмкө генеральяс, быдөн дорө матыстчылөны, кисө кутлөны, неыджыд козиньяс сетөны. Главнойыс, код гөгөр гутьяс моз мукөд начальникьясыс бергалісны, юаліс Иванлысь, эмөсь-ө пө кутшөмкө корөмьяс. Боец и шуис: «Генерал ёрт, миянлы фронт вылын пыр сетлісны 100 грамм, а вот тані кедзөвтөны, эз на кисьтылыны». Нюммуніс генерал, тапкис пельпомас салдатлы, но нинөм эз шу. Сылөн петөм бөрын ставныс уськөдчисны Иван вылө, видөны, мый лысьтіс тадзи сёрнитны: «Тайө өд ачыс Рокоссовский вөлі! Öні вөтлаласны миянөс бөр фронт вылө шойччигкөсті. Эк тэ...»

Эз на ног ло. Рокоссовскийкөд адзысьлөм бөрын шойччысьяслы быд сөйигөн мөдісны кисьтавыны фронтөвөй сө грамм. Сэки нин Иван вылө видзөдласныс вежсис: «А тэ, вөлөмкө, абу дзик йөй».

Коми зон дорйис вөрөгысь Москва, мездіс Калинин, Великие Луки, Невель. Аслас ёртьяскөд кыскыліс фронт визь сайысь кызь нель «языкөс», кутіс юрас дум воөдчыны Берлинөдз. Казьтывлөм нин медаль кындзиыс сійөс наградитөма кык Красной Звезда орденөн. А война кадад беспартийной салдатьясыдлы найө эз кокниа шедны.

Эз удайтчы кулөмдінса зонлы воны Берлинөдз. Невель кар босьтігөн фашистьяслөн пуля пасьвартіс сылысь шуйга кисө, госпитальын бурдөдчыштөм бөрын лэдзисны гортас.

Сыкөд тшөтш веськаліс ранитчылөм жө мөд коми морт, керчөмьяса. Госпитальын сетісны карточкаяс, на кузя салдатьяс вермисны сөйны туй вылас столөвөйясын. Но керчөмьяса салдатыд кытчөкө воштөма асьыс карточкатө. Ногиевлы сөян сетісны, а мөдыслы оз. Иван кутіс корны, мед вердісны и ёртсө. Петіс столөвөйса заведующөй да шуис, карточкатөг пө вердны некодөс ог вермы. Иван кыпөдіс шум. Сэки корисны патруль,



пырисны старшой лейтенант да кык салдат. Налы ставсö кылөн-вомён салдатъяс висъталісны, мыйын делöйс. Но офицер тшöтш сувтіс заведующой дор: абу кө карточка, вердны оз вермыны. Сэки Ногиев пузис:

— Ак тэ, тылövöй крыса!— и дзоньвидза веськыд кулакнас швачкöбтіс офицерлы ныр-во-мас, мöдыс и нюждöчис джоджö.

Патрульнöй салдатъяс уськöдчисны Иван вылö, көртавлісны кияссö да нуöдісны комендатураö, öттор-мөдтор юасьöм бöрын пуксьöдісны куим лун кезлö, но сэсса век жö лэдзисны.

Кузя ковмис локны салдатлы гортöдзыд, то подөн, то вөлөн коркö нуыштасны, то машина сюрлас. Озыр керкаясад эз радейтны татшöм йöзтö: либö оз восьтны, либö понйöс усьöдасны. Шойччөг вылö бөрйивліс медся голь, пөлöстчөм керкаяс, көні дасьöсь бөръя нянь торнас юксьыны.

Веськаліс öтчюд татшöм керкаö, көні эз тöдчы көзяинлөн кийс, а олісны көзьяйка да сьлөн шег кодь посни челядьыс. Нывбаба мыйкö көтшасын ноксис, а Иван, личöдчыштіс да, матыстчис стенö öшөдөм карточкаяса рама дорö. А сэні сьлөн разведка взводса старшиналөн фотоыс. Көзьяйка висътасис: «Тайö верöсöй менам, война вылын усис». И ыджыд лачаөн тырөм синьясөн видзөдліс Иван вылö: «А мый? Көнкö паныдасьлін?» «Да öтлаын воюйтім, öти пöртйысь сөйим!» Тайö кывъяс бөрас сэтшөм рад лои аньыд, быдторсö ваяліс пызан вылад, мый вöлі дзеблöма медся пыді йөртөдъясас.

Рытывбыд лои висътасьны салдатлы сьлөн да старшиналөн öтувъя служба йылысь, мый муніс налөн юръяс вывті да кызди усис аслас му вöсна нывбабалөн верöсыс.

Асывнас мөдөдчис водзö, көть дөваыд и ёна корис олыштны сы дорын да шойччыштны, бурдөдчыштны.

Бөрö колис Сыктывкар, узьмөдчыны вөзйысис Затонö. Зэв бура примитісны салдатöс, кодлөн туяс ёна нин и кынмис раниччөм кийс. Вердісны-юкталісны, шойччөдісны. Асывнас туйö петігас көч куөн төбисны доймөм кисö, адрессö сетісны, корисны гижны, кызди гортас воис, но гижөм, дерт, эз лолы. Овсö көзяиныслысь нэм чөжыс помнитіс — Белых.

Горт дорас матыстчис, видзөдö, мамыс да Лиза чойыс гиджгöны-пилитöны ныж пилаөн пес вылö потшöс потшъяссö. Мамыс омөльтчöма, косьмөма, вөлөмкö, нянь карточкатö налы абу сетöмаось. Босьтіс Иван ки вылас мамсö, ёна сійö кокнялöма, нинөм абу кольöма. Пыртіс гортас, ломтіс көрт пач. Нопъяс рок концентрат вöлі, туяс видзтыштіс, эз ставсö сөй, пуис

да пöттöдзыс мамсö да чойсö вердiс. Ловйöн воис, и тайö медбурыс...

Олыштiс-велалыштiс неуна да пырис уджавны кладовщикöн. Öтчыд катöдiс Иван тулыснас Эжва кузя груз, но ваис ямис да эджык во Помöсдiнöдз, ковмис ректыны грузсö Скöрöдум дорö видз вылö. Сэни кутшöмкö кузь кияяс гусявлöмаöсь тöвартö. Таясь морттö пуксьöдiсны дас во кежлö, эз видзöдны ни боевöй наградаяс, ни инвалидносьт вылö. Тадзи нарсуддя аттьöалис Иванöс фронт вылын асьсö жалиттöг фашистъяскöд тышкасьöмысь. Сöмын Сталин кулöм бöрын амнистия кузя лэдзисны Ногиевöс гортас.

Тöдмасис Иван ичöтик Парма грездса Маша нывкöд, гöтрасис да вуджис овны Пармаö. Чужтiсны-быдтiсны гозъя куим челядьöс, стрöбитiсны керка. Пыр уджалiс колхозын, вöралiс.

1988 воын Иван Михайловичлы, кызд вöвлöм фронтöвиклы, вичмöдiсны благоустроитöм патера, и гозъя вуджисны овны Кулöмдiнö.

Кувсис Иван Михайлович 2006 воын 86 арöсөн.



Снимокъяс вылын:


1. Иван Ногиев фронт вылын.
2. И.Ногиев (веськыдладорас) ёртыскöд госпиталь бöрын.
3. Иван Михайлович Ногиев.

Снимокъясыс И.И.Ногиевлөн гортса архивысь.



Михаил Дмитриевич Игнатов
(Илля-Игнат-Дане-Тима-Йиге-Вась-
Наум-Артей-Закар-Попан-Подь-Трөш-
Онисем-Миколай-Митрей-Миш-Чуд-
Игнаторд) чужис 1931 вося октябр
6 лунö Кулөмдин районса Сордйыв
грездын.

1952-57 воясö Михаил Дмитриевич
велөдчис Донецкса политехнической
институтын, горной факультетын.
1962-66 воасын босьтис төдөмлун
ВГИК-ын. Режиссёрской факультет
помалис гөрд дипломон. Сэсся 1986 во-
өдз вөли «Леннаучфильм» киностудия-
ын документальной да научно-попу-
лярной фильмгяс пуктысь режиссёрон.



Пенсия вылас петөм бöрын босьтчис туявны ас му. Йöзöдлис
уна научной да краеведение гижөд. Лöсьбөдö коми топонимика
серти ыджыд удж.

Михаил Дмитриевич вöзйис котыртны да вөли медводдза
веськөдлысьон Санкт-Петербуркса «Неватас», а бöрынджык
Сыктывкарын «Орду» котыргясын. Нуөдö ыджыд обществен-
ной удж.

Михаил Дмитриевич — Россияса кинематографистгяслөн
котырö, Россияса географической котырö да Россияса журна-
листгяслөн котырö пырысь.

Öнi олö Сыктывкарын.

Михаил ИГНАТОВ

Эжва йывса Игнат орд*

*Сиа мамöлы, Илля-Игнат-Дане-Тима-
Йиге-Вась-Наум-Ер-Трөш-Лар-Сава-Ер-
Кузьма-Йиге-Микита-Семён Вералы.*

Дзолядырсянь менам кыптис интерес гырысьяслөн важ олөм
йылысь сёрнияс дорö, миян Важ Чуд-Игнат орд йылысь висьгь-
яс дорö. Первойсö дзик на челядь любопытство кодь вөлис,
сэсся Олексан чождö, мамлөн дзоляджык вокыс, чуйдис. Ачыс
сийö велөдчис начальной классын на, да менö велөдис нель
арөссиянь лыддьысьны. Сэксянь книгагысы школаö пыртөдз ло-
исны менам медбур ёртгясон, сы вöсна мый мукөд гажыс эз
тшөкыда сюрлы. Меным куим арös на эз вöv, семьянымös ку-
лакалисны: мырддисны керка-карта и став овмөснымös, а бать-
мамös пуксьөдисны. Батьös этапон куим во кежлö ыстисны
кодйыны Беломорканал, сылысь бать-мамсö, менсьым пöль-
пöчös, ыстисны Печера вылö кык во кежлö ссылкаö. Мамлы
ки вылас кык челядбөн ковмис мунны бать-мам дорас, кодгяс
олисны ылыс вөр куторын. Сёрөнджык, кор пöль-пöч локтисны

* Авторон дасьтан книгагысь воддза юкөн. Журналын петö дженьдөдөмөн.

ссылкасы, ме куті юасыны, коді да кор медводдзанас локтіс Сордйив грездас да орчча Помөсдін сиктас. Аслым зэв виччысь-төмөн лоис, мый найо быдтор төдісны: весиг медводдза овмөд-чысыясылысь ним-вичсө висьтавыны кужисны, көть налөн во-лөмянь некымын нэм нин колис. Стөч насянь ме и кывлі медводдзаысысө миян Игнатовъяслөн нэмөвөйся олөм йывсыс.

Сиктсаяс да суседъяс пөчөс нимтывлісны Митрей-Пиля-Иван Паладьөн. Казенной гижөдъясын сійөс гижлөмаөсь Пелагея Ивановна Игнатоваөн, 1871 воын чужлөм коми-зырянкаөн. А ми, зонпосни, дай гырысыясыс, шулім прөстө «пөчөн». Төдтөм йөз-лы ачыс висьтасьліс ордвужнас, ассыс пөляссө сизим көле-наөдзыс, улө копыртчывлөмөн, төдтөм мортлы висьтасьліс: «Трөш-Закар-Трөш-Митрей-Пиля-Иван Паладь, Важ Чуд-Игнат ордыс. А тэ код лоан, бур мортыс?» Эз быдөн вермы казь-тыштны весиг пөрысь пөльсө, ог нин сёрнитөй важджык пөль-пөч йылысь.

Унджыкөс казтьывліс пөчө асывъяснас пөсь нянь дорө вош-йөдігөн. Асывводзнас, пөсь пачысь медводдза няньсө перйигөн, пөч пуктывліс няньсө ен пельөсө, образ водзө, чегліс шөри да пызан пельөсас пуктөм бөрти пернапасасьліс, сэсса зэв сьөлөм-сянныс лыддьөдліс ай-мамсө, пөль-пөчсө, ыджыд мам-ыджыд батысө да став кувсьөм рөдвужсө. Тадз нин комияслөн нэмыс вөліс. Вошйөдліс важ йөзсө пөчө пөшти быд лун. Сэксянь па-метьö колисны лыддьөдлөм нимъясыс, а бөрас на серти ме сэсса корси вужъясөс.

Кодсюрө йылысь, важөн мунлөмъяс йывсыс, Паладь пөч висьтавліс уна. Шуам, миян Игнат орд панысь йылысь (өні тай роч ног рөдвужөн шуоны-а). Игнатыс пө вөлөма кутшөмкө Важ Чуд рөдыс, кутшөмкө шаман ли, төдыс ли, Новгород дорса сиктын овлөм чуд войтырлөн юрөн ли... Быттьö овлөма сэтшөм важ еньяслы эскысь чуд войтыр, язычникъяс быттьö. Кор православной рочьяс сы дорө локтөмаөсь да тшөктөмаөсь Крестос вераө пырны да важ еньясысь өткажитчыны, ковмөма мунны православнойясысь ылөджык. Сідз и мунөма Игнатыд Висер вылө, көн олөмаөсь на важ еньяслы юрбитысь гөгуличьяс. Сэн овмөдчөма да лөма «государлөн крестьянинөн».* Челядыс нин сэсса разалөмаөсь Эжва пөлөн да шусьөмаөсь Важ Чуд-Игнат ордөн. На пөвстын зэв уна вөлөма төдыс да чудитчысь мортыс, кодъяс абу век лөсявлөмаөсь властьяскөд да пышъявлө-маөсь овтөминьясө. «Немдін, Мыс, Помөсдін вөлөсьтыясын, Агафоновка, Вильгорт, Öнись Иван, Джуджыд му, миян Сорд-йылын – быдлаын медводдзанас пуксьывлөма миян Важ Игнат орд чукарыс. Бара на эскө кадъяс пуксисны, көть пышйөма кытчөкө тайö антикритьясыс да, оз нин өд овтөминыс сюр. Кытысь тайö бес-коммунистьясыс пышъян?»— тадз кымын

* *Збыльысө Игнатов овыс медводдзаысь паныдась Писцовөй книгагасын сюрс квайтсөд во помъясын Немдінын да сэсса Висерын. Немдінысь Игнатовъясыс Кармановъяскөд волөмаөсь Помөсдінö («Ревизкөй мөйдыясын» пасйө-ма локтөмнысө тадзи: «До 1707 году вновь возник починок на реке Помосе. А в хозяйствах тех Кормановы да Игнатовы из селения Устьнемского...»). Дерт, манси («гогуличьяс») сэкса кадъясас вермисны на овны Эжва йылын, но на йылысь Помөсдін кузя Ревизияясын оз нин пасйыны: аманатö (заложникö) босьтөм вогулъясөс индöны сөмын Нёбдінын да Ыдждывиддзын.— ред.*

сёрнитліс Паладь пöчö комынöд вояс помын, кувтöдзис, кор пöлькöд бөр локтісны кулачитöм бöрас.

Важ йывсьыс Паладь пöч казътывліс бать-мам вылас ыстысьöмөн. Батьсö шулісны Ер-Педот-Трöш-Закар Трöш-Митрей-Пиля Иванён. Мамсö шулöмаöсь Парасьён. Сэсся и Тина пöчсьянь да Марпа пöрысь пöчсьянь уна кывлöма. Марпаыс олöма сё сайö во. Налён висьталöм серти, Важ Чуд-Игнатислөн пöрысь пöльён шуысь Тима-Йиге Вась овмöдчывлöма Висерысь Немдін погостса Мыс сиктö, а сылөн куим пиыс — Артей, Ермил да Симон — вуджöмаöсь Помöсдінö, Помöс шуйгаладорса вöралан угоддьöясланьыс. Найö и панлöмаöсь Помöсдін сиктсö. Игнатов вокъяскöд волöмаöсь Кармановъяс, но налы абу лов вылас воöмаöсь Помöс веськыдладорса угоддьöясныс да, бөр лэчöмаöсь Немдінö, Көрман сиктö. Сэсся кык во мысти бара локтöмаöсь Помöсдінас да кутöмаöсь вöравны важ угоддьöяс вылас.

Игнатов вокъяс котырөн да став овмöсөн катлöмаöсь Мыссьянь Помöсдінöдз Эжва кузя ыджыд пыжъясөн. Помöс вомöдзис воöмаöсь пö да, öти вок и шуас: «Слабог, воим кузь туй помас! Мед сэсся юыслөн нимыс лоас Помас ю. Татчö и овмöдчам». Но медыджыд вокыс, Ер, пыксьöма: «Тан увтасін да, ытванад босьтны кутас. Вылöджык катыштам да пуксям». Сідз и вöчасны, катыштасны на öнیا Помöс посланьö. Воддза сувтланінсö налысь помöсдінса öнi на шуöны: Улі Ер йир, а мöд сувтланінсö — Вылі Ер йир. Помöсыс кык йир костас чуκληлö поводнöя, а шуйгаладорас артмöма зэв ыджыд кöдж, сэтчö Еремейыд дзик медводдза керкасö лэптöма да, сійөн шуöны Ер кöдж.

Вокъясыс, Артей да Сим, вылöджык поздысьласны, көн тай мельничыс сэсся лоис. Но дзескыд лоöма овмöстö паськöдны да, чой йылас вешйöмаöсь. Сэн вогулъяслөн юрбитанін вöлöма, Кап тылаөн* и шулісны, сэсся вежаинад вичкотö лэптöм бöрад Вичкодор лоис.

Коркö пöчöлысь юалі: кор Помöсдінас волöмаöсь? Сійö мен вочавидзис:

— Кор и волöмаöсь? Сэк öд важ ног на воястö артавлісны — Му пуксьöмсьяньыс. Важ вераа йöзыд Печераясад öнi на сідз лыддьöны. Пöрысь пöч тай, Марин, висьтавліс, медводдза Игнатовъяс дырйиыс пö Рочад кык сар вöлöма — Ыджыд Иван да Дзоля Петыр. Кык во мыститö Кармановъясыд Мыссьыд локтасны да, висьталасны: öнi пö öти сар нин Рочад, Иваныс пö кувсис, а Петыр Öлексеевичыс колис, Петыр Первойнад кодöс сэсся нимтісны. Водзынтö öд выльлаад мунлісны водз тулысын, мед гөртöдз-көдзтöдз удитны овмöдчынысö. Менам пöрысь ыджыд мам Тина, Йиге-Вась-Наум-Ерыслөн пöрысь-пöрысь пöльён шуысь, висьтавліс Марин пöчсьяньыс нин, мый Мыс вöлöсьтса Агапон грездысь Еремей, Артей (Артемон?) да Симон вокъясыс волöмаöсь юяс ойдтöдзис на. Ыджыд пыжъяснас сувтöмаöсь Помöс вомö стöч Троича лунö, сійöс сэсся зэв ыджыд празникөн лыддьöны помöсдінсаыд, гу вылö ветлöны, казътылöны рöдительясöс.

Справочникъяс кузя эз сьöкыд вöв корсьны, мый Иван Алек-

* Кап, капище — важ йöзлөн юрбитанін; вежаин.

сеевич да Пётр Алексеевич отлаынсö саралисны 1696 вося январ 29 лунöдз, а воддза Троиचाыс усьлöма 1695 вося май кызы квайтöд лун вылö (виль стильнас кö, июнь көкъямысöд лун). Сийö кадсö и колö лыддыны, сідзкö, Помöсдин чужан луннад. Паладь пöч серти, Помöсдинö вокъяслөн волöм йылысь вөлöсь-тас унаён на тöдöны. Бать вожсянныс пöчö петöма Вась-Наум-Ерсянь, а пöльö — мöд воксянныс: Вась-Наум-Артей-Закар-Попан-Подь-Трöш-Öнисем Миколай. Сідзкö, найö сизимöд коленаын чоя-вока на лооны. Батьö, Миколай Митрейыс да мамö: Илля-Игнат-Дане-Тима-Йиге-Вась-Наум-Ер-Трöш-Лар-Сава-Ер-Кузьма-Йиге-Микита-Семен Вера öкмысöд коленаын чоя-вокаөн жö артмöны. Кыкнанныс Йиге-Вась-Наумсянныс. Отлаасьтöдзыс на тöдöны вөлöм тайöс. А Öнöсь ыджыд мамöй (Педот-Педет-Митрепан Öнöсь) петö Корман ордсянныс нин. Пöль мян пöчь-яс дорысь вöлі топыдджык кывъя, эз ёна висьтасьлы, но мый-сюрö и сысянь кывлим.

Шуам, кызд пöрысь пöлыс, Артей, кык вокыскöд ыджыд ваён кывтöма пурйөн Помöс йылын вöраланінсянь. Сиктас верст дас вотöдз ыджыд ванад кырöдöма берегтö да ва весьтад öшöдöма чегъясьöм увъяса поводной конда. Вокъясыд пур вылад водöмаöсь, мед пу увтыд тювгысьны, а Артейыд козьяннас пысасьöма кыз вожийö да öшйöма. Вокъясыд эськö и мездöма-öсь, но йирыслы нимыс öшйöма «Артей йир».

Дзолядырйи эски пöль-пöчлөн быд кывйö. Сэсся велöдчан книгагясыд мыйсюрö нетшкышті да, мыйкö и сумленне лоис: эз жö öд уна сё восайсясö вермыны морта-мортлы, гижтöг ни нинöм, сэтшöм стöча вуджöдны. Ещö сёрнджык, краеведалігам нин, ёна и шензи, кор архивысь кутісны сюрны важ йöзлысь висьтъяссö вынсьöдысь гижöдъяс.

1975 воын нокси коми вужъяс йылысь документа фильмөн. Киам сюрис сэки Архангельскын 1869 воын на йöзöдлöм П.С.Ефименколөн «Заволоцкая чудь» книга. Комын нельöд лист бокын сийö гижö: *«Чудъяслөн öнйя Шенкурск уездын [Новгородлөн важся Вага пятина, Вой Двинаö усьысь шуйга вож дорын] олöм йылысь гижöма 14–16 нэмгясö на. Новгородса посадник Василий Своеземцев 1315 воын ньöбöма чудъяслөн старöстаяслысь — Азик, Харганец, Ровда, Игнатлысь — муяссö «Шенкурск погостсянь Ростов муясöдз, Ваймуга вывлань, Яно тыöдз, а Яно тысянныс веськыда Пезаöдз». Век на Шенкурскыслы воча сулалö Харгала грезд, водзö, ветымын верст ылнаын, Ровдаса приход, а водзö Игнат ям. Тыдалö, тайö нимгясыс и петкöдлöны Харганец, Ровда да Игнатлысь оланінгяссö».*

Водзö авторыс гижö, мый сы серти кö, Новгородса воеводалы муяссö вузалöм бöрын чудъяслөн öксыясыс чукорнаскотыргяснас вешйöмаöсь асиввойлань, пöшти Излань. Ассьыс мөвпгяссö авторыс подулалö сийөн, мый *«Камалөн Чусовой вож вылын сулалö нэмвöйся Ревда кар, кодöс 14 нэмын на кыпöдлöма, гашкö, и ачыс чудъяслөн öксы Ровдаыс».* Азика (Асыка) öксыыс вуджис Печераса гогуличьяс дорö да сэтысянь, гогуличьяскöд, Эжва йывса пермянакöд да рöдвужыскöд, усьласис Степан Храп вылö, мед вöтлыны Храплысь йöзсö Пан-сотниклөн шöр Эжваса-Емваса муяс вывсьыс. Игнат öксыыс ас

йöзыскöд, тыдалö, пуксьöма Висерö, кодi торйöдлiс Эжваса перымлысь (комияслысь) да Эжва йывса гогуличьяслысь (мансылысь) вöралан угодьöяссö.

Вага да мукöдлаысь черносошной (государев) крестьяналöн гöра муясысь прöстладорьясас вуджöм йылысь казътывлöны оз сöмын йöзыс, но и важ архив документьяс. Шуам, Яренск уездса 1678 вося Переписной книгаын пасйöма: «Усть-Пожег пöчинокын 1676 воын олісны: бöбыль Анкудинка Петров дас кык арöса пиысöд волöмаöсь Вага вылысь; ашшöр олысь Лучка Иванов, челядътöм, а воöма Каргопольысь, сыкöд орччаыс Архипка, волöма Тотьма уездысь. (РГАДА, ф.1209, оп. Поместный приказ, д.15057, л.462).

Медьёна шензьöдiс, мый Новгородса купчöй сертиыс, воевода Василий Своеземцев ньöблöма «чудьяслöн старöстаяслысь» сы пасьта муяссö и вöрьяссö донтöм донысь, дерт, абу вузалысь-ясылöн бур вöляысь: кызь вит сюрс урысь (сэкся кадö урыс сулалiс көпейка). Мöдтор шыбитчис синмö: Игнатлöн йылöмыс содтö сылöн ним водзö ВАЖ ЧУД-Игнат, быттö индöны сы вылö, мый Игнатыс вöлöма важ вераа мортöн, язычникöн. Но збылысьсö тайö нимас кольöма Эжваса олысьяс пöвстын выль локтысьлöн важ оланiн вылас индöдыс: «Вага вылысь локтöм чуд Игнат». Сэсся Вага пöлөнса муясыд, дерт, колисны Новгород пятинанад (витöд юкөннад) да, выль олысьясыдлöн вунiсны эновтöм му нимьясыд.

Сiдз, тыдалö, Петыр Первой кадьясад, крестьяналы овьяс сеталiгад, «Вагаса/Важенин/Важчук Игнат» прöзвищeyд и вуджис быдтасьясылöн ов туйö. Комияслöн тай овьясыд 1600 воясöдз абу тшöкыда паныдасьлöмаöсь. На пыдди вöдитчывлöмаöсь важ пöль-пöчсö лыддьöдлöмөн. Сöмын 16–17 нэмьясын, Петыр сар реформаяс бöрын, дворяна бöрся овьяснад кутöмаöсь гижавны и государлысь черносошной крестьянатö. Да и сэк уна ов артмöма ордвуж нимсяныс, быттö важöн нин овлöм мортыскöд нэм кежлас йитöмаöсь став быдтассö-йылöмсö. Кулöмъясöс вошйöдiгөн и öнi на лыддьöдлöны пöрысьджыкьяс этша вылö сизим көленаöдз, аттьöалöны, пыдди пуктöны, отсöг корöны. Сийöн, тыдалö, и колисны овьяскöд орччөн ордвуж нимьясыд. Дай быдлунья олöмад сиктса нимьяснад жö тöдлісны йöзтö, эз кабала нимөн нимтывлыны.

Ещö на öти бур вöлі сиктса олöмад ордвуж нимьястö лыддьöдлöмсыд. Комиыд абу уна лыда: верöс-гöтыр бöрйигөн колiс тöдны, ылын-ö ныла-зонмаыс öта-мöдсьыс, мед не йитны вывтi матыс рöдöс, не дзескöдны рöдвужтö. Вичкосянь корисны квайт көлена кост, комияс лыддьöдлісны — сизимöдз.

Дай дзик тöдтöм сиктысь йöз кө паныдасьлісны, вöраланiн-ын ли ылі муын, ордвуж лыддьöдлöмнад öдйö и волiсны вир йитчанiнас. Ас вужьяыдкöд быдтор вöчсьö кокниджыка. Важ традицияссö кө эськö кутны сяммам, колям и асьным ОРДЪЯ-ВУЖЪЯ комиясөн.

Ордвуж туялöм да вуджöдöмыд кыпöдас и челядьлысь ас дорас интерессö, и ичöтсянь (семьясяныс, школасяныс) мортыд кутас гöгөрвоны, мый сэтшöмыс традиция, культура, войтыр, история. Дзик сы понда, мый суи на ловья традициясö, и сямми корсьны витсё вося историясö Эжва йывса став Игнатов-

ыслысь. Дерт, унатор гижёма и писцово́й да похозяйственнóй книгагасын, и вичкоса метрика гижодъясын, и вот чукóртан книгагасын. Но ме эськó нинóm эг вермы вóчны, эз кó компас-матканас лоны дзoлядырсянь кывбур моз велодлóm орднимъ-ясыс.

Ордвуж нимос водзвыв тóдóмыс отсаліс меным кыпóдчыны нимсянь нимодз бать вужйод, и то сизимод кóленаодзыс кымын, сыысь важсó эз вермыны казтыштны ни пóчьяс, ни пóльяс: эз тóдны ни чужан-кулан вояссó, ни пóрысьясыслысь гóтыр-верос нимъяссó. Ковмис шыодчыны архивъясó. Да и тан эз кокни ло первойсó: 19 нэм мóд джынсьыс унатор вошóма. И ставыс сы понда, мый сідз шусяна «Ревизскóй мойдъяс», став Роч империяса олысьос арталомсó дугóдисны 1858 восянь, а 1897 вося медводдза ставроссияса войтыр гижóда материалъяс-сó бырóдлóмаось. Шудыд вылó, кольóмаось вичкоса метрикаа книгагас, кытчó пасъявлісны быд кулысьос, выль чужысьос, пыртчысьос, веничайтчысьос. Гижодъяссó воысь воó видлалómон позьó быд ордвуж кыпóдны да восьтыны. Но абу кокни тайó уджыс, сы вылó колó зільлун кындзи и важ гижанногъяс да каллиграфия тóдóm, быд почерк дорó велалóm. Сійон ме и видлі первой энóвтчыны асянь мунómсó да видлыны медся пóрыссяньыс.

Игнат нима Новгородса купчóйтó аддзóm бóрын ме верми сóмын ылóсас шуны, мый Эжва йывса Игнатовъяс петóмаось сійó вужсьыс (этша, кóнкó, Игнатыд му вылас вóліс да). Зэв нин ыджыд костыс Новгородса купчóйсяньыс медводдза переписнóй книгагасодзыс. Ф.В.Плесовский да И.Л.Жеребцовъяслон óткымын гижодысь тóдмалі, мый кутшómкó архивъясын эм 18 нэмся став документыс, кóні пасйóма Помосдін сиктса став медводдза олысьсó, сóмын популярнóй гижодъясад авторъясыс абу пасйóмаось, кон да кутшóm архивъясын. Сэсся И.Л.Жеребцов пыр тóдмалі, мый документъясыс Москваса РГАДА-ын, а миян Республикаса архивын абу весиг копиясыс. Документ нимъяссó да шрифтьяссó пасйыштóm бóрын москваса ёртъяс пыр кори ксерокопияяссó. Недыр мысти киó веськалісны дона копиясыс, да шемос уси: не сóмын Игнатов ордвуж туялómó, но и коми краеведение да наукаыслы дзоньон позяс бур подув пуктыны.

«Ландратская книга Яренского уезда 1707 года»-ын гижóма, мый Помосдін пóчинок чужóма 17 нэм помын, вичко лэптывлóмаось 1706 воын, но медся главнóйыс — казтывлóмаось Игнатов да Кормановъяслысь нель кóлена. Индóма и арлыднысó, и рóдсó, шуам: *«Еремей Наумов сын Игнатовых семидесяти лет. У него дети: Федот тридцати лет, Семён двадцати лет. У Федота дети: Трофим семи лет, Тарас пяти лет. А у переписи он сказал, что родом того Усть-Немского погосту»*. (РГАДА, ф. 350, опр. 1, кн. 477, л. 521).

Сэсся и босьтчи ме куим вокó, Еремей, Артамон, Симонó — Наум пиянó. «Ландратскóй книгаын» индóm «Усть-Немского погоста» серти кутчыси 1678 да 1646 воясся Яренскóй уездса переписнóй книгагасó, кóні лыддьóдлóма Эжва пólонса став крестьянскóй овмóссó. Немдін погостса подворнóй описысь пыр и сюрис Игнат ордыд. 1646 вося Переписнóй книгаас: *«Деревня*

Устьнеми на реке на Вычегде и на устье Неми, а в ней крестьян:... Васька Игнатъев сын с детьми, с Наумком да Ивашком, да с Ваською, да с Федькою» (РГАДА, ф. 1209, оп. 1 Поместный приказ, кн. 143, л. 329 об), а кызь кык во мысти Вась Наумтö гижöмаöсь нин олысьöн «по дер. Агафоновская на реке на Вычегде на Усть реки Мылвы, а поселились после переписных книг 1646 года, десять лет тому, а поселились они с погосту Устьнеми от семей: ...во дворе крестьянин Наумка Васильев сын, у него дети Ермилка да Артюшка, да Симонка, все в возрасте» (РГАДА, ф. 1209, оп. 1, Поместный приказ, д. 15057, л. 461). Наумлөн вокъясыс, Васька, Федька да Ивашко, кольччöмаöсь Немдінö, пуксьöмаöсь нин ас овмөсьяс вылö, сюрöсасьöмаöсь. Насянь и мөдöдчöмаöсь Немдінса Игнатовъяс-ыс, но найöс, сы пасьта рöдтö, ме весиг вөрзбöдны эг лысьт. Гашкö, мөд кодкö босьтчас.

1646 вося Переписнöй книгаад пасйыштöмаöсь Наумыслысь Васька Игнатъев сынтö, да дыр эз и ковмы корсьны. Сійö жö вося Переписын пасйöмаöсь Висер погостысь мунöмъяс лыдын: «...двор пуст Игнашки Тимофеева сына, двор пуст Мамонки Васильева сына... а оне сошли того же Еренского уезду Вишерские же волости на новую усадьбу на Усть-Неми во 1637 году» (л. 323 об).

Тайö гижöдсьыс тыдовтчö, мый Игнатыслысь батьсö шулисны Тимаөн, овлöма сійö Висерын, та боксянь кö пöчлөн висьтъяс-ыс и бара збыльмисны, но, вөлөм, и 1637 воын Немдіннад пуксьöм Тима Игнатыс вөлöма медводдза олысьяс лыдас. Ковмис пыдöджык пырны кадас да, мед Тимаыслысь бать нимсö стöчмöдны, восьтывлыны 1608 вося Писцовöй книга. И збыль, 1608 воын «на погосте Вишера на реке Вишере крестьянский двор Тимошки Данилова, молотчий» (ПКЯУ 1608:321).

Тимошка Даниловичыслөн пöль да бать йывсьыс сюрис сійö жö вося Писцовöй книга-сыс. Тималөн батьыс, Даниил Игнатов сын овлöма Ильинскöй посёлокын «при погосте на Усть Сысолы реки» (өнiя Тентюково). Кувсьылöма Даниил 1594 воын, а öтка пийс, Тима, и мунöма Висерö: «Двор остался пуст Данилки Игнатова сына, который умер в 1594 году» (ПКЯУ 1608:347). Сидзкö и Данилыслысь батьсö нимтывлöмаöсь Игнатөн: Иге-Дане-Тима-Иге.

Иге Данеыслөн пöль нимыс сюрö 1586 вося Писцовöй книга-ысь, кытысь выписка кольлöма, Сотнöй: «Погост на Усть-Сыsole реки, а на погосте ... починок Ильинской: во дворе Данилка Игнатъев» (Сотная ПК 1586: л. 15 об, л. 17). Явö пöчинок подулалысьнас и вөлöма Илля пöльныс, сы вöсна мый мөд олысьсö гижöмаöсь тыр нимнас дай пöль нимнас — Иван Васильев сын Макариин, а орчча Усть-Сысольскын кольöма вокыс, Кузьма Васильев сын Макарыин (Сотная ПК 1586: л 16, л 17: МИЕС 482—483).

Комиын ордвуж пасъялысь документъяс сэсся абуйöсь, а сы вöсна и ог вермöй стöча корсьны дас нельöд нэмын овлөм Чуд Игнат Важский да дас квайтöд воын Усть-Сысольск погостын овлөм Илляöдзис. Костсьыс вошö нель кöлена.

А Помөсдін пуктысь вокъяссянныс и кокниджык неуна вöли корсьысьнысö «Ревизскöй мойдъяс» серти, кытчö пасъявлисны

быд сиктысь олысьсö вот перйöм могысь. Нуöдсисны «мойдъясыс» быд 15–20 во, 1707 восянь, да энэвтчисны 1858 воын. Ордвуж туялöмын сыысь донэ отсöгыс некытысь оз сюр. Усть-Сысольск уезд кузя кызвыныс кольöма на миян Коми Республика архивъясын. Вошöмаöсь сöмын 1782 вося «Ревизскöй мойдъяс». Сэк нин колö видзöдлыны вичко книгаяс да исповедальнöй ведомостьяс.

А босьтчынысö, дерт, колö ассяньныд, гортсаясыдлысь юасьöмön, матыссаджык кадъяссö позьö тöдмавын и ЗАГС-ясысь, сиктса да районса архивъясысь.

Ёна отсаласны «Книга памяти», «Покаяние» да мукöд справочник. Сэсся öд миян пöляс кызвыннас вöлисны крестьянаöн: видз-му вöдитисны, вöралисны, чери кыйисны. На бöрын кольöны сідз шусяна патронимическöй топонимъяс, на серти нимтöминъяс, тыяс, ёлыяс. Гашкö, аддзанныд сэтись и ассыныд ордвуж нимтö, тайö öд сэтшöм жö гижтöм история, гашкö, и паськөданныд асланыд нимъясöн да корсысьöмön, видзанныд асланыд ордвужлысь, ас войтырлысь историсö да культурасö.

Эжва йывса Игнатовъяслысь ордвужсö туявны босьтчывлі дзолясянь да дзоляторсянь. Батьлысь, мамлысь да пöчлысь лэчысь визьяссö налön висьталöм серти. Артмис, мый петöны найö öти ордвужйысь, кодъяс торъявлöмаöсь дас сизимöд нэмын, мед бөр сöльнитчыны кызьöд нэмын, дас кöлена пыр. Дзугсьöм вожъясöн да вужъясöн. Но öд и мукöд ордвужъяскöд гартчывліс Игнатов ордвужным, и мукöд Эжва йывсалön гартчисны да дзугсисны вужъясыс. Видзöдлыны кö нин ордвужтö, öдвакö позяс öткодявны сійöс öтка пукöд. Стöчджык эськö орччöдны ордвужъяснымöс тропическöй вөркөд, көн быд пу гартчöма лианаясöн, нюжөдчöма вожнас и вужнас мöда-мöдланьыс. Ме вöчи этша на: сöмын Помöсдинса Игнатовъяслысь сюрөссö восьті, яйсьöднысö ёна на колö. Гашкö, и босьтчывлас на кутшöмкö бур морт миянлысь ордвужнымöс туявны, мичмöдны выль нимъясöн. Чайта, менам уджöй налы бур подулön да бур отсөгön лоас.





Владимир Александрович Лыткин чужис 1958 вося декабр 23 лунö Сыктывдін районса Вильгорт сиктын. Помалис Вильгортса шөр школа, 1977-79 воясö служитіс армияын. Сэсса дыр кад шопералис, мыйтакö уджаліс «Коми му» газетын корреспондентöн. Окмыс-дасöд воясö «челнокаліс».

Медводдза висътгъясис — «Ок ті, мужикгъяс!» да «Дой» — петалисны «Войвыв кодзув» журналын 1987 воын. Йöзöдчыліс и мукöд коми газет-журналын.

Владимир Александрович висъталö: «Гижны босътчи дас нель арöсөн. Заводиті гижны аслым, некодлы эг петкөдлы. Сöмын ар кызь көкъямысгъясин смелмөдчи. Гижöдгъясөн окота вөрзёдны мортсö, мед лолас дзевбөм гусяторйыс воссис мукöдыслы, мед коми мортыс эз пов да лоис тыдаланаджык. Окота ассьым да йöзыслысь олөмсö тöдмавны-востны: кутшөмось ми, мыйла олам, мый тишөктö мянös вöчны тадзи. Медшöрыс — эн пов аслад мөвпгъяссыд, олан кө морт ногөн, тэ абу омөльдзык мукöд войтырсыс, а уналаын и вылындзык. Эн пов, эскы аслад сёлөмыдлы. Тайö сёлөм-вешөртö тэныд сетіс мян нэмөвöйся оланногным. А мян оланногыс, слабог, мукöдсыс лёкджык некор эз вөвлы».

Владимир ЛЫТКИН

Öтнас

ВИСЬТ

Öшиньдорса лабич вылын пукалö шег кодь зонка да öшинь пыр видзöдö ывлаö. Сылы гажтөм. Садьмөм бöрас детинка эськö сетліс гөлөссö, думнас чукөстіс гортсаяссö, но некод эз вочавидз. Öні сійö öтнас. Лөнъ.

«Öтнамös колисны! А öд Танялы мам тишөктіс кольчыны асывнас гортö, менö видзны. Ме öд пола на! Но Таня ачыс мукöддырийыс повзёдлö бубуясөн да Ёмаён: «Он кут кывзысьны, бөрдны мөдан — петасны найö гөлбөчысь!» Асывнас, кор Митя узис на, пышйис пöдругаясыскöд кытчөкө. «Мам локтас — ок ёна бөрдны кута, норасыны. Мед Таняös видасны бать-мам. Тöдны кутас, кыдзи менö öтнамös кольны!»

Татшөм мөвпгъяс бергалісны зонка юрын öшинь водзын пукалігөн. Гортын и ывлаын лөнъ. Йöз абу. Сöмын пон тонö котөртö. Ыджыд, сьöд. Вылö асьсö пуктö. Тыдалö, мый збой. Мукöд ыджыд понйыс абу — сы вöсна и збой. Некодысь пö ог пов. Ичöt понгъясыд мөд ног асьсö кутöны. Шы кыласны — котөрөн пышйöны либö дзевсьöны. Бурджыкось. Пелькось да сюсьсь.

А тайё понйыс кукань кодь. Котөртө, быттё петкөдлө: ме пö некодысь ог пов!

Став чой-вокыс зонкалөн ыджыдось нин. Школаё ветлөны. А Митя бөрся видзөдө коді кор прөст. Медся бур Семөкөд. Сійё Митяёс быдлаё босьтлө. Весиг би кусодан машинаяс дорө волісны. Гөрд рөмаось найё. А мукөд машинаыс пемыд рөма. Тракторъяс пемыдось жö. Но сэтшөм гораось! Кор горт дортыс мунö трактор — муыс вөрö. Неважөн Семөкөд ветлісны шырсыны. Сы ёртлөн батыс ичөт челядьёс шырö. Медся ичөтыслысь юрсö дзикөдз шырö, а ыджыдджыкыслы водзас юрси прать кольö. Митя, дерт, пратьтөм на. Но чубанад, дерт, көсйö лоны.

Картупель коръяс костас кодкө-мыйкө быттё тыдалö. Васькакань тай! Тöдса мыгöрсыйс Митялөн весиг сьөлөмыс небзыштис. Васька пыр локтö сы дорö, ок мелі. А киад кө босьтан — мурзö. Зэв пö меным лосьыд, малав менö, малав. Ок и Васька!

А талун сійё быттё вежсьöма. Дзик мөд. Куткыртчöма да скөр сингъясөн видзөдө öшиньö, тыдалö, чеччыштны лосьöдчö.

Неылын ичөтик лэбач чукөр. «Васька на вылö уськөдчыны көсйö,— гөгөрвоö Митя.— Ноко, ноко, кыш!» Сійё неуна кучкыштис öшинь рамаас. «Кыш, Васька, кыш!» Лэбачъяс либö кылісны таркөдчөмсö, либö асьныс аддзисны каньсö да жбыр лэбзисны. Васька эськө чеччыштлис, но сёр нин.

«Ок, Васька! Час, локтан гортö, петкөдла тэд пуж. Татшөм ичөтгъяссö öбидитны оз позы!»

Митялөн сьөлөмыс пузьö: «А öд сэтшөм меліөн асьсö петкөдліс, кургис-мурзис төрыт ме дорын, а талун кайяс вылö усьласьö. Ылөдчысь!» Кань пышйис кытчөкө, вошис, быттё сійё тані эз и вөв. «Некор сійёс малавны ог кут».

Ывлаын эргөм шы кылö. Ылысянь воö. Выліысь. А сэсса му пасьтаыс вочасөн разалö. Митя төдö нин: тайё самолёт лэбö. Веськыда сикт весьттыс. Пемыд крест сяма. Лэбö сьöкыда, гора. «Анда,— думыштис Митя.— А пытшкас дядьö пукалö. Лётчик!» Тайёс неважөн, самолёт лэбигөн жö висьталіс Семö. Митя сэки видзөдіс самолёт вылас, но некутшөм дядьёс эз аддзы. Пытшкас, дерт, дядьёыс, вывсяныыс öд исковтіс эськө. «Налөн кучик шапкаяс, шлем шусьö»,— содтіс на сэк вокыс. Сійё ставсö төдö: первой классын велөдчö. Да! Самолёт! Лэбö, но оз лэбач моз. Бордъясыс оз вөрны. А мыйлакö лэбö...

Самолёт шыыс ньöжйөнникөн ылыстчö, вошö сынөдас. Лэбачъяс жбыркнитісны, самолёт лэбис. Бара чөв-лөнъ. Тонö суседъяс-лөн бабыс петіс, кисьтіс лөканьсыыс помойсö туйбокса гуранö да бөр пырис гортас. Сійё вөлі сьод юрсиа, паськөмыс сьод жö. Митя полö пöчысь: гашкө, сійё бубу, гашкө, еретник. Но, слабог, ас гортсыыс петіс, сэтчö бөр и пырис. Эз Митяясö.

Некод гөгөр абу. Митяёс ньöжйөнникөн унмыс личкө. И унмовсьö ичөт мортыд. Куйлö быттё Митя видз вылын, кытчö сійёс турун пуктігөн босьтлісны бать-мамыс. И аддзö турун костас, неылын, муртса киад он судз, самолёт. Ичөтик, быттё ворсан самолёт. Сійё кос турун рөма, югъялö посни чутгъясөн, мичасъыс-мича. Митя видзөдө тайё дивö вылас, нюжөдö кияссö, мед инмөдчывны көрт лэбачас, но самолёт вошö, сьлö быттё.

И немтор абу. Митя весиг унмас бӱрддзӱ, сэсса садьмӱ да гӱ-
гӱрвоӱ, мый тайӱ сӱмын вӱт. Вӱт. «Сэтшӱм матын вӱли, китӱ
мыччы да босыт». Забеднӱ. Весиг бурджыка видзӱдыны эз слӱймы.
А мый сӱни пытшкас? Кӱни лӱтчыкыс? Мыйла ме киӱс мыччи?
Забеднӱ. Позис видзӱдны да видзӱдны. Синваыс петӱ Митялӱн.
И збыль забеднӱ. Самолӱт сылис, вошис сынӱдас.

«Ноко!»— кодкӱ локтӱ кильчӱлань, перйӱ ӱдзӱс восьтан коль-
чаыс пас.— «Тайӱ мам!»— уна кок шыыс Митя век тӱдас
мамыслыс воӱмсӱ. Сийӱ котӱртӱ ӱдзӱслань, удитӱ думыштны,
мый бӱрдны колӱ гора-гора, мед тӱдӱсны, мый сылы зӱв-зӱв
лӱк. «Мам!»

«Ок, сэтшӱм ӱд рад мамыслы,— сералӱ мӱдыд,— Тӱнӱ бара
колисны ӱтнадтӱ? Ок и ӱна вида ставнысӱ, ок и пуж петкӱдла!
Тӱ ӱд медся дона менам, чиган доддыс усьӱмтор. На, гӱснеч
вайи!»

Недыр мысти Митя пукалӱ лабич вылын да йирӱ какао ку-
бик. Гӱснечыс и юмов, и курыд, Уна-ӱ и колӱ ичӱт мортлы шуд
вылӱ. Ставыс тайӱ югыдас бур...



ПЫДДИ ПУКТАНА АВТОРЪЯС!

Редакцияӱ гижӱдъяснытӱ ыстигӱн бытӱ колӱ юӱртны:

1. Ассыныд ним, вич, ов; кор да кӱни чужлӱмныд (лун, тӱлыс, во).
2. Паспорт юӱръяс: номер, серия, кор да кӱни сетӱсны, гортса адрес (прописка серти).
3. Индивидуальной налогӱвӱ номер — ИНН (коддӱн эм).
4. Страховӱй свидетельствӱ номер.
5. Банкын счӱт реквизитъяс.

Тайӱс юӱрттӱг редакция гонорар оз вешты.

*Журналын йӱзӱдтӱм гижӱдъяс
редакция оз рецензируют и авторыслы найӱс оз мӱдӱд.
Редакция оз век во ӱти кывӱд авторъяскӱд.*

Компьютерный набор **Н.Кузнецова.** Корректор **Н.Габова.**

Учредители: Агентство Республики Коми по печати и массовым коммуникациям, «Союз писателей Республики Коми» — региональное отделение общероссийской организации «Союз писателей России».

Издатель: АУ РК «Издательский дом Коми». Директор: Попов В.В.

Адрес издателя: 167982. ГСП-2, г. Сыктывкар, ул. Карла Маркса, д. 229, Дом печати.

Адрес редакции: 167982. ГСП-2, г. Сыктывкар, ул. Карла Маркса, д. 229, Дом печати.

Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

E-mail: kodzuv@mail.ru; Сайт: www.komimu.com

Подписано к печати 15.06.2015. Формат 70x108^{1/16}. Печать офсетная. Усл. печ. л. 7; усл. кр.-
отт. 8,4; учётно-изд. л. 7,54. Тираж 514. Заказ № 4167. Регистр. ПИ № ФС 3 - 0226 от 20.01.2006 г.
выдано Беломорским управлением Федеральной службы по надзору за соблюдением законодатель-
ства в сфере массовых коммуникаций и охране культурного наследия. Публикация материалов,
направленных на освещение реализации социально значимых проектов, осуществляется при го-
сударственной поддержке в форме субсидии Агентством Республики Коми по печати и массовым
коммуникациям. Отпечатано в ООО «Коми республиканская типография», 167610, г. Сыктывкар, ул.
В.Савина, д. 81. Цена свободная.